

ጾኑሲ ማደም ዳኪንቴዘንሢኮ ማደ ዓይያ ካር

ዳኪንቴዘንሢኮ ማደ ማጻጻ፡- ሉቃስ ፃኣፔ ኮዥ ሃይሶ ማጻጻፓፓ ሄሊ ዓኣዳያኬ፤ ሃኖ ማጻጻፓኮ ዳኤፖ ማሊያ ዩሱሴኮ ጊንያ ሃንታ ቤርታሳ ናኣታ ዓያና ጌኤሺ ዔያቶ ማሊሳዛ ዒዛ ዛሎ ኬኤዛ ኮዥ ሃይሶ ዋይቲ ዩሩሳላሚይዳ፣ ዩሁዳ ዓጮ ቢያይዳ፣ ሳማሪያይዳ ሃሣ ዴንዲ ዓጮ ጋፖ ሄላንዳኣና ዳልጊሺ ኬኤዘቴያ ዔርዛኒኬ (1:8)፤ ሃና ማጻጻፓ ጾኑሲ ጉሙርቂያ ካኣዥ ዓይሁዶ ዓሶ ባኣካፓ ዓርቃያ ዴንዲ ዓጮ ዴሬ ቢያኮ ጉሙርቂሢ ካኣሺ ማዓንዳያ ሄላንዳኣና ዋይቲ ዳልጊ ዴንዴቴያ ኬኤዛ ሃይሴ ዓርቃያኬ።

ሃኖ ማጻጻፓ ፃኣፔ ዓሢ፡- ኪሪሰቶሴ ጉሙርቃ ዓሳ ሮሜ ዓጮ ካኣቱሞ ሎንሣሢ ዴሚና ዘርታ ዓሲ ማዒባኣሢ ሃሣ ጊንሣ ኪሪሰቶሴ ጉሙርቂ ካኣሸኮ ካኣዥ ዓይሁዶ ዓሶኮ ካኣዥ ኩንሣያ ማዔሢ ዔርዛኒ ሚርጌ ላቢ ማዴኔ።

ዳኪንቴዘንሢኮ ማደ ማጻጻ፡- ዩሱሴ ዛሎ ኬኤዛ ኮዥ ቃኣላ ዴንዲ ሄላ ቤዛ ቢያ ዳልጊ ዳልጊ ዓኣዴያ ማዒያና ሃሣ ጊንሣ ሺኢጲያ ማኣርኮ ማዥንቴያ ዔርዛ ሃይሣ ዴኤፒ ዴኤፒ ቤሲ ፓቂንታኒ ዳንዳዒ።

1. ኪሪሰቶሴ ጉሙርቂያ ካኣዥ ዩሩሳላሚይዳ ዩሱሴ ሌካ ዔውቴሰካፓ ዓርቂንቴያ ማዒያ
2. ዩና ካኣዥ ዩሩሳላሚ ዓጮ ቢያ ሄሊያ
3. ሜዲቴራኒያ ባዘ ኮይላ ዓኣ ዓጮ ሃሣ ጊንሣ ሮሜ ዓጮ ሄላንዳኣና ዳልጊ ዴንዲያ

ዳኪንቴዘንሢኮ ማደ ማጻጻፓይዳ ባሽ ማደ ማዒ ጴዳሢ ዓያና ጌኤዥ ማደኬ፤ ዩይያ ጴንጻቆሰጻ ኬሎና ዩሩሳላሚይዳ ዓኣ ኪሪሰቶሴ ጉሙርቃ ዓሶ ዑፃ ዋልቄና ኬዲያና ሃሣ ጊንሣ ሃኖ ማጻጻፓይዳ ዓኣ ማዲንቴ ባኮ ቢያይዳ ጴዳሢፕዲ ዓያና ጌኤዥ ሺኢጲያ ማኣርና ዔኪ ዓኣዳ ዓሶና ማዲንዳ ባኮ ዳዊ ዳዊ ሃሣ ደዲሽያ ማዔሢኬ።

ዩኖ ዋዶና ኪሪሰቶሴ ጉሙርቂያ ዛሎ ኬኤዘንቴ ሃይሶኮ ዓኣፒ ማዔ ባካ ሃኖ ማጻጻፓይዳ ዓኣኔ፤ ዳኪንቴዘንሢኮ ማደ ማጻጻፓይዳ ዓኣ ማዲንቴ ባካ ኪሪሰቶሴ ጉሙርቃ ዓሶ ናንጎና ሺኢጲያ ማኣር ዓሶኮ ፔቱሞናይዳ ዓኣ ዋልቃ ዋሚዒ ዴኤፒ ማዔቶዋ ፔጋሲ ዳዋኔ።
ማጻኣፔላ ዲማ ዲማ ዓርቂ ባኮ

ኮዦ ሃይሶ ኬኤዛኒ ጊኢጊንቶና ሃይሴ (1:1-26)

1. ዬሱሴኮ ጋፒንያ ዓይሢያና ሃሣ ዒ ዒንጌ ዎዘ (1:1-14)

2. ዪሁዳ ቤዛ ሜሌ ዓሲ ዶኦሪንቴሢ (1:15-26)

ኮዦ ሃይሳ ዬሩሳላሜይዳ ኬኤዚንቴሢ (2:1—8:3)

ኮዦ ሃይሳ ዪሁዳና ሳማሪያናይዳ ኬኤዚንቴሢ (8:4—12:25)

ጳውሎሴ ማዶ ማዶ (13:1—28:31)

1. ቤርታሲ ሃንቲ ማዶ ማዶ (13:1—14:28)

2. ዬሩሳላሜይዳ ዴያና ቡኪንቶ (15:1-35)

3. ላሚ ሃንቲ ማዶ ማዶ (15:36—18:23)

4. ሃይሣሲ ሃንቲ ማዶ ማዶ (18:24—21:16)

5. ጳውሎሴኮ ዬሩሳላሜይዳ፣ ቁሳሪያይዳ ሃሣ ሮሜ ዓጮይዳ ቴኡቲያ (21:17—28:31)

1 ቲዎፒሎሴ!

ታኦኮ ቤርታሳ ማፃኦፖይዳ ዬሱሴ ማዶ ባኮና ዔርዜ ባኮ ቢያ ታ ፃኦፔ፤ ታኦኒ ፃኦፔሢያ ዬሱሴ ሳያይዳ ማዶ ዓርቁማፓ ዴንዲ፣
2 ሌካ ጫሪንጮ ዔውቲ ኬሎ ሄላንዳኦና ዒዚ ማዶ ማዶኬ፤ ሌካ ጫሪንጮ ዒዚ ዔውቲሢ ዳኪንቴዘንሢ ጌይንቲ ዶኦሪንቴዘንሢ ማዶ ዓያና ጌኤሺ ዎልቁና ዓይሢያ ዓይሢሢ ጊንፃፓኬ፤³ ዒ ሃይቁሢኮ ጊንፃ ዲቢ ዔርታ ማርካ ማዶ ሳይሢና ሺምፔና ዓኦያ ማዶ ሳናሳኒ ዔያቶም ያይዲታሚ ኬሊዳ ጴዲ ጴዲ ያኦሲኮ ካኦቲም ዛሎ ዔርዜ፤⁴ ዔያቶና ዎላ ዒዚ ዓኦና፡- «ታ ዒንሢሢም ቤርታ ኬኤዜሢ ሃሣ ዓዶይዳፓ ዒንጊንቴ ዎዘ ዒንሢሢ ዬሩሳላሜይዳፓ ኬሰኩዎያ ዒኦኦካ ካፑዎቲ፤⁵ ዮሃኒሴ ቤርታ ዎኦሢና ማሰኬ፤ ዒንሢሢ ጋዓንቴ ሃሢ ዳካ ኬሊኮ ጊንፃፓ ዓያና ጌኤሺና ማሰታንዳ፤» ጌዔ።

ዬሱሴኮ ሌካ ጫሪንጮ ዓኦዲያ (ማር. 16:19-20፤ ሉቃ. 24:50-53)

6 ዒማና ዳኪንቴዘንሢ ፔቲይዳ ቡኪንቲ ዓኦያ፡- «ሳዳሢያ! ዒሰራዔኤሌም ካኦቲም ማሃኔ ዒንጋንዳ ዎዳ ሃሢዳ?» ጌዒ ዬሱሴ ኮራ ያኦጮ።

7 ዬሱሴ ማሃያ፡- «ዓዳሢ ፔ ቢታንቶና ማሊ ጌሢ ዎዶና ማዓንዳ ባኮና ዒንሢሢ ዔራኒ ዳንዳዐብሴ።⁸ ጋዓንቴ ዓያና ጌኤሺ ዒንሢሢዳ

1:1 1:1 ሉቃ. 1:1-4። 1:4 1:4 ሉቃ. 24:29። 1:5 1:5 ማቴ. 3:11፤ ማር. 1:8፤ ሉቃ. 3:16፤ ዮሃ. 1:33።

ከዴ ዎደና ዎልቁ ዒንሢ ዴንቃንዳኔ፤ ዬካፓ ዬሩሳላሜይዳ፣ ዪሁዳ ዓጮ ቢያይዳ፣ ሳማሪያይዳ፣ ዴንዲ ዓጮኮ ጋፒንያ ሄላንዳኣና ዒንሢ ታኣኮ ማርካ ማዓንዳኔ» ጌዔኔ። 9 ያዲ ጌዔሰካፓ ዔያታ ዛጋ ጎይሣ ዓኣንቴ ሌካ ጫሪንጮ ባንሢ ሳዓፓ ዔውታኣና ሻኣሪ ዔያቶኮ ዓኣፓፓ ዒዛ ዓኣቹኔ።

10 ዒዚ ዓኣዳኣና ዔያታ ጫሪንጮ ባንሢ ገዥ ጌዒ ዛገያይዳ ዓኣንቴ ቦኣሪ ዓፒላ ማኣዔ ላሞዎ ዓሲ ዔያቶ ኮራ ዔቃዎ፡- 11 «ዒንሢ ሃይ ጌሊላ ዓጮ ዓሳ ጫሪንጮ ባንሢ ዛገ ዒንሢ ዓይሳሮ ዔቁይ? ሃይ ጫሪንጮ ዔከንታንቴ ዒንሢ ዛጌ ዬሱሴ፣ ጫሪንጮ ዴንዳንቴ ዒንሢ ዛጌማ ጎይያ ዒማይዲ ማዒ ሙካንዳኔ» ጌዔኔ።

ዪሁዳ ቤዛ ማቲያሴኮ ዶኦሪንቴዎ
(ማቲ. 27:3-10፤ ዓይኑ. 109:8)

12 ዬካፓ ዛይቴ ሪሚቲ ዲካ ጌይንታዞይዳፓ ዬሩሳላሜ ባንሢ ዔያታ ማዔኔ፤ ዛይቴ ሪሚቲ ዲካ ጌይንታ ዲካ ዬሩሳላሜይዳፓ ዓሲ ዔኤሌሞ ዎይዛንዳጉዴ ፓዴ ቤሲዳከ። 13 ዬሩሳላሜ ዔያታ ሙካዎ ዎንዴ ናንጋ ኩቦ ማኣሮ ከሰከኔ፤ ዔያታ፡- ጳዲሮሴ፣ ዮሃኒሴ፣ ያይቆኦ፣ ዒንዲራሴ፣ ፒልጶሴ፣ ቶኦማኣሴ፣ ቤርቴሌሞሴ፣ ማቲዎሴ፣ ዒልፒዮሴ ናኣዚ ያይቆኦ፣ ፔ ዓጮ ሚጪንታ ሲሞኦኔንታ ያይቆኦ ናኣዚ ዪሁዳንታከ። 14 ዬያታ ቢያ ከሊ ፔቱሞና ዶዲ ያኦሲ ሺኢቃኔ፤ ዔያቶና ዎላ ፔቱ ፔቱ ላኣሊና ዬሱሴኮ ዒንዶ ማይራሞና ሃሣ ዬሱሴኮ ጌርሲንሢያ ዓኣኔ።

15 ዒማና ጳዲሮሴ ቄኤታና ላማታሚና ማዓ ከሪሰቶሴ ጉሙርቃ ዓሲ ባኣካ ዔቃዎ ሃዚ ጌዔኔ፡- 16 «ታ ዒሾንሦ! ታ ሚሾንሦ! ዬሱሴ ዓርቁ ዓሶኮ ዓርና ማዔ፣ ዪሁዳ ዛሎ ፃኣፒንቴሢፕጉዲ ዓያና ጌኤሺ ቤርታሲ ዳውቴ ዛሎና ከኤዜ ያኦሲ ማሊፃ ኩማኒ ኮይሳኔ።

17 ዪሁዳ ኦኡኮ ፔቱሢ ማዒ ቤርታ ኦኡና ዎላ ማዳያከ።»

18 «ጋዓንቴ ዬይ ዓሢ ፔኤኮ ፑርቶ ማዶ ዛሎር ዔከ ሚኢሾና ሳዓ ሻንቄኔ፤ ሃሣ ባለቲና ሳዓ ጳዲንቲ ዲኡቁ ሄኮ ፓቄንታዛ፣ ሩቁንታኣ ዒዛኮ ከሰከ ሚጪንቴኔ፤ 19 ዬይ ማዲንቴ ባካ ዬሩሳላሜ ዓጮይዳ ቢያ ዎይዚንቴኔ፤ ዬያሮ ዬና ሳዓ ዔያቶ ዓጮ ሙኡጮና <ዓከልዳማ> ጌይንቴኔ፤ ዬኖኮ ቡሊፃ ሱጉሢ ሳዓ ጌይሢከ።»

20 «ዬይ ያዲ ማዓኒ ዳንዳዔሢ ዓይኑሞ ማፃኣፓይዳ፡- ዒዚ ናንጋ ማኣራ ባዔ ማዎንሳ፤

1:8 1:8 ማቲ. 28:19፤ ማር. 16:15፤ ሉቃ. 24:47-48። 1:9 1:9 ማር. 16:19፤ ሉቃ. 24:50-51። 1:13 1:13 ማቲ. 10:2-4፤ ማር. 3:16-19፤ ሉቃ. 6:14-16። 1:18 1:18 ማቲ. 27:3-8።

ያኑኒያ ዒኢካ ናንጎገገ፤
ሃሃ ዒዛኮ ዓኣ ቢታንቶ ማሌ ዓሲ ዔኮንጎ
ጌይንቲ ፃኣፒንቲያ ዓኣሢረኬ።»

21 «ዩያሮ ጎዳ ዩሱሴ ኑ ባኣኮይዳ ኑኡና ዎላ ሃንቲ ዎደና ጉቤ ኑኡና ዎላ ዓኣ ዓሰይዳ፤ 22 ዩያጉዲ ሃሃ ዮሃኒሴ ዎኣያና ማሰካ ዎደይዳፓ ዓርቃያ ደንዲ ጎዳ ዩሱሴ ጫሪንጮ ዔውቲ ኬሎ ሄላንዳኣና ኑኡና ዎላ ዓኣ ዓሰይዳፓ ፔቲ ዓሲ ጎዳ ሃይባገገ ዔቁሢኮ ኑኡና ዎላ ማርካ ማዓኒ ኮይሳኔ» ጌዔኔ።

23 ዩካፓ ላምዎ ዓሲ ዔያታ ዲማሲ ፔ ባንሢ ኬሴኔ፤ ዩያታ ቤርሳባሴ ሃሃ ባጎ ሱንፃ ዒዮሰያሴ ጌይንቲ ላምዎ ሱንሢና ዔኤሊንታ ዮሴፔ ጎምሢና ማቲያሴናኬ። 24 ዩካፓ ጳይሮሴንሢ ሂዚ ጌዒ ሺኢቄኔ፡- «ዓሲኮ ቢያ ዒኔ ዔራ ጎዳሢዮ! ሃንሢ ላምዎንሢዳፓ ያና ኔኤኒ ዶኦሬቲያ ኑና ዳዌ፤ 25 ኑ ሃሢ ሺኢቃሢ ዩሁዳ ፔ ሺኔና ፔ ማሌ ቤዘ ዓኣዳዮ ሃሺ ዳከንቲያ ማዳ ዔኪ ፔ ማዳ ማሂ ዒዛ ቤዘ ማዳንዳሢ ያናታቲያ ኔ ኑም ዔርዛንዳጉዲኬ።» 26 ጋዓዎ ዒፃ ዓጋዘ ዩና ባኬላ ማቲያሴም ኬሰከኔ፤ ዩያሮ ዩይ ማቲያሴ ጎምሢ ታጾ ፔቲ ዳከንቴዘንሢኮ ዎላ ማዒ ፓይዲንቲኔ።

2

ዓያኖ ጌኤዦኮ ኬዲያ

1 ዓይሁዶ ዓሶኮ ዑሣ ዓኣዲሢ ኬሊ ጌዒ ቦንቾ ኬላ ጋፔሰካፓ ደንገታሚ ኬሊ ዴዒ ቦንቾ ጳንጻቆሰፄ ጌይንታ ቦንቾ ኬሎና ኪሪሰቶሴ ጉሙርቃ ዓሳ ቢያ ፔቲምና ቡኪ ፔቲ ቤሰካ ዓኣንቲ።

2 ዔርቲባኣ ዶዲ ዓልጎ ከባሬጉዴ ዑኡሲ ጫሪንጫፓ ሙኪ ዔያታ ዓኣ ጋሮ ኩሜኔ። 3 ዓዳ ታሚኮ ሎሰቶ ማላያ ሚርጌ ዒንዲርሲ ዔያቶም ጳዳዮ፡ ፓቂንቲ ፓቂንቲ ፔቲ ፔቲሢ ዑፃ ዴዔኔ። 4 ዩማና ቢያሢዳ ዓያና ጌኤሺ ኩሙሢ ዎልቄና ኬዴኔ፤ ሃሃ ዓያኖ ጌኤዦ ዔያቶም ጌሰታንዳጉዲ ዒንጌ ዲማ ዲማ ሙኡቸና ጌሰቲሢ ዓርቄኔ።

5 ዓጪ ማዔ ካራና ዓኣ ቤዛፓ ቢያ ሙኬ፡ ያኦሲ ካኣሽካ ዓይሁዴ ዓሳ ዩሩሳላሜይዶ ናንጋኔ። 6 ዒማና ዩኖ ዑኡዜሎ ዎይዘያ ሚርጌ ዓሲ ሙኪ ዒኢካ ቡኪንቲኔ፤ ዩና ጌሰታ ዓሳ ዩያ ሙኪ ቡኪንቲ ዲማ ዲማ ዓሶኮ ሙኡጮና ጌሰታንቲ ዎይዜሰካፓ ዓሳ ጎያንዶ ጎይሢ ባይዜኔ። 7 ሃሃ ዲቃቲ ሄርሺሢና ሂዚ ጌዔኔ፡- «ሃኣታ ሃያይዲ ጌሰታ

1:20 1:20 ዓይኑ. 69:25፤ 109:8። 1:22 1:22 ማቲ. 3:16፤ ማር. 1:9፤ 16:19፤ ሉቃ. 3:21፤ 24:51። 2:1 2:1 ሉቂ. ዓከ 23:15-21፤ ላሚ. ዎማ 16:9-11።

ዓሳ ቢያ ጌሊላ ዓሲቱዋዓዳ? 8 ሂዳያ ሃሢ ዔያታ ኰኡኮ ኰ ሾይንቴ ዓጮ ሙኡጮና ጌሰታንቴ ኰ ዋይዛሢ ዋይቲዳይ? 9 ኰኡኒ ሃሢ ናንጋሢ ጳርቴይዳ፣ ሜዴይዳ፣ ዔላኣሜይዳ፣ ሜሶፖታሚያይዳ፣ ዪሁዳይዳ፣ ቁጳዶቁያዳ፣ ጳንዖሴይዳ፣ ዒሲያይዳ፣ 10 ፒርጊያይዳ፣ ጳንፒሊያይዳ፣ ጊብዔይዳ፣ ቁሬና ጌይንታ ካታሞ ኮይላ ዓኣ ሊቢያ ዓጮይዳኸ፤ ሃሢ ሮሜ ዓጮይ ሙኸ ዓይሁዴ ዓሶንታ ቤርታ ዓይሁዴቱዋዓ ዓይሁዴ ማዔ ዓሳ ኰኡኒያ ዓኣኔ፤ 11 ዬያጉዲ ቁርዔሴ ዓጪ ዓሲንታ ዓሬቤ ዓጪ ዓሲንታ ዓኣኔ፤ ሃይሾ፡- ሃይ ዓሳ ቢያ ያኦሲ ማዳ ፑኡፖ ማዳ ዛሎ ኰ ሙኡጮና ከኤዛሢ ኰ ዋይዛንቴዎ!» ጌዒ፣ 12 ቢያሢ ዲቃቲ ሄርሻዖ ጎዖንዶ ጎይሢ ባይዚ፡- «ሃይ ዓይሳ ባኣዚ ናንዳይ!» ጌዒ ጌዒ ዋሊ ኮራ ያኦጮኔ።

13 ፔቴ ፔቴ ዓሳ ጋዓንቴ ዬያ ባኮ ዓማሊ ማሃዖ፡- «ዋይኔፓ ኮሾና ዑኩ ዑሽኪ ዔያታ ማማሢንቴያዋይ!» ጌዒ ጌዒ ቦሃኔ።

ጳዒርሴ ጌሰቲ ጌኤዘ

14 ዒማና ጳዒርሴ ታጳ ፔቴ ዳከንቴዘንሣኒ ዋላ ዔቁ ዓኣዖ ዴሮሞ ዑኡዘ ፔኤሲ ዳጊዲ ሂዚ ጌዒ ከኤዘኔ፡- «ዒንሢ ዪሁዳ ዓጮ ዓሶ ማዔ ኰ ዓሶንታ ዬሩሳላሜይዳ ናንጋ ዓሳ ቢያ ማዲንቴ ባካ ዓይሳታቲያ ዔራኒ ታ ጋዓሢ ኮሺ ዋይዙዋቲ፤ 15 ሳዓ ሃጊ ሶኦፓ ዋይታሢሮ ዒንሢ ማላሢጉዲ ሃይ ዓሳ ማማሢንቴያቲዋሴ፤ 16 ጋዓንቴ ሃይ ሃኣዲ ማዔሢ ያኦሲ ማሊያ ከኤዛ ዒዩዔኤሌ ከኤዘዖ፡-

17 ያኦሲ ጋፒንያ ከሎና ሃኣዲ ማዓንዳኔ ጋዓኔ፡-
 ታኣኮ ዓያኖ ታኣኒ ቢያ ዓሲ ዑሰካ ላኣላንዳኔ፤
 ዒንሢን ዓቲንቆና ዉዴሮ ናኣቶና ያኦሲ ማሊሢ ከኤዘንዳኔ፤
 ዴጌሢያ ሃሃ ያኦሲ ፔጋሲ ዳዋ ባኣዚ ዛጋንዳኔ፤
 ጋርቾ ዓሳኣ ዓውቲ ዓውታዳንዳኔ።

18 ዬያጉዲ ዬኖ ዋዶና
 ዓቲንቆና ላኣሎና ማዒ ታኣሞ ማዳ ዓሶ ዑዖ
 ዓያኖ ታኣኮ ታ ላኣላንዳኔ፤
 ዔያታኣ ያኦሲ ማሊሢ ከኤዘንዳኔ።

19 ሌካ ጮሪንጮይዳ ዲቃሢ ሄርሺሳ ባኣዚ
 ሊካ ሳዖይዳ ታ ዋልቁና ማዲንታ ዓከ ባኣዚ ታ ዳዋንዳኔ፤
 ሱጉሢን ታሚና ሃሃ ጩቤ ሊኢሎጉዲ ላሂ ጳዳንዳኔ።

20 ዴኤፒ ሃሃ ሚርጌና ቦንቸንታያ ማዔ
 ጎዳኮ ሙኮ ከላ ሄላንዳሢኮ ቤርታ

2:17 2:17 ዓ.ዩ. 2:28-32።

ዓባ ደማንዳኔ፤
ዓገናኣ ሃሣ ሱጉሣ ማላንዳኔ።

21 ጎዳ ማእደም ገዲ ዔኤላ ዓሲ ቢያ ዳቃንዳኔ»
ሂዚ ገዔሣ ኩማንዳጉዲኬ።

22 ጋዓዖ፡ ቃሲ ጊንሣ ጳዲርሴ፡- «ሃይ ኑ ዓሶ ማዔ ዒሰራዔኤሌ
ዓሳ! ሃያ ታ ኬኤዛ ባኮ ኮሺ ዋይዙዋቴ፤ ዒንሣያ ቤርታዲ
ዔራሣጉዲ ሰዚራቶ ዩሱሴ ያኦሲዳፓ ዳኪንቴ ዒንሣ ባኣካ ጳዲያ
ሃሣ ያኦሱሞ ቢታንቶ ዒዛኮ ዓኣያኬ፤ ዩይ ፑኤፑማ ዒዛኮ
ዔርቴሣ ያኦሲ ዒዛ ዛሎና ያኦሲ ዋልቁና ማዲንታ ዓኪ ማዳ፡
ዲቃሣ ባኣዚ፡ ዴኤፒ ማላታ ማዓ ባኣዚ ዒንሣ ቤርታ ማዲያናኬ።

23 ያኦሲ ቤርታዲ ማላሣጉዴያና ሃሣ ማዲንታንዳሣ ዒ ዔሪ ጎይያና
ዒንሣም ዒዚ ዓኣሣንቴ ዒንጊንቴ፤ ዒንሣያ ዒዛ ፑርቶ ዓሶም
ዒንጊ ሱዲንቴ ሃይቃንዳጉዲ ማሄ። 24 ያኦሲ ጋዓንቴ ሃይቤኮ
ዓኣ ዋልቆ ሜንሣ ሃይቤፓ ዒዛ ዔቁሴ፤ ሃይቤያ ዒዛ ዓርቂ ቃዛኒ
ዳንዳዒባኣሴ። 25 ዳውቴ ዒዛ ዛሎ ኬኤዛዮ፡-
ጎዳ ታኣኒ ቢያ ዋዴ ታኣኮ ቤርታ ዓኣንቴ ዛጋ፤

ዒ ታኣኮ ሚዛቆ ዛላ ዓኣሣሮ ታ ሂርጋዓ፤

26 ዩያሮ ታኣኒ ዋዛዳ፤
ዒና ሃሣ ታኣኮ ዋዛና ኩሜ።

ሃይቃ ዓሸኬላ ታኣኮ ሃጊ ማዓንዳ ዋዛና ናንጋ፤

27 ሸሞፔሎ ታኣኮ ኔ ሃይቁ ዓሶ ባኣካ ሃሸንዲሞሴ፤

ኔኤኮ ጉሙርቁንታ ዓይላሣ ዲኡፖ ዔቶይዳ ኔ
ዋዒሲንዲሞሴ።

28 ናንጊኮ ጎይሣ ታኣም ኔ ዳቄ፤

ሃሣ ኔኤኒ ታኣና ዋላ ዓኣሣሮ ዋዛ ታኣኮ ጉቤ ዒናፓ ማዓንዳኔ
»

ሂዚ ገዔ።

29 ገዒሰካ፡- «ዒሸንሣዮቴ! ቤርታኣ ዓደንሣዳፓ ፔቴሣ
ማዔ፡ ዳውቴ ሃይቁ ዲኡቴሣና ሃሣ ዒዛኮ ዲኡፓ ሃሮ ሄላንዳኣና ኑ
ኮራ ዓኣሣ ፔገና ታ ዒንሣም ኬኤዛኒ ዳንዳዒ። 30 ዳውቴ ያኦሲ
ማላሣ ኬኤዛያ ማዔሣሮ ሃሣ ያኦሲ ዒዛም «ኔኤኮ ዜርፃፓ ፔቴ ዓሲ
ታኣኒ ኔ ካኣቱሞ ቤዛ ገሣንዳኔ» ገዒ ጫኣቁሣሮ ዒዚ ዩያ ዔሪ፤

31 ዩያይዳፓ ዔቁያና ሜሲሃ ዲኡፖ ዔቶይዳ ዓቲንዲሞኣሣና ዓሸካ
ዒዛኮ ዒኢካ ዋዒንዲሞኣሣ ቤርታዲ ዔሪ ዔቁያ ዛሎ ኬኤዜ።

2:23 2:23 ማቴ. 27:35፤ ማር. 15:24፤ ሉቃ. 23:33፤ ዮሃ. 19:18። 2:24 2:24
ማቴ. 28:5-6፤ ማር. 16:6፤ ሉቃ. 24:5። 2:28 2:28 ዓይኑ. 16:8-11። 2:30
2:30 ዓይኑ. 132:11፤ 2ሳሙ. 7:12-13።

32 የኦሲ ዬያ ዩሱስ ሃይባፓ ዔቁሴኔ፤ ኑኢኒያ ቢያሢ ዬያ ባኮኮ ማርካኬ። 33 የኦሲ ፔኤኮ ሚዛቆ ዛላ ቦንቸንቴ ቤዘ ዒዛሞ ዒንጌኔ፤ ሃሣ ዓዳሢዳፓ ዒንገንጎንዳኔ ጌይንቴ ዓያኖ ጌኤዠዋ ዔኬኔ፤ ሃያ ዒንሢ ዛጋ ባኮና ዋይዛ ባኮ ዒዚ ላኦሌ።

34-35 «ዓካሪ ጫሪንጮ ዓኦዳሢ ዳውቴቱዋሴ፤ ዳውቴ ፔ ቶኦኪና፡

ናንገና ናንጋ ጎዳ ታ ጎዳሢሞ (ሜሲሄሞ)

ኔ ሞርኮ ታ ኔና ባሺ ሳንዳያ ሄላንዳኦና
ታኦኮ ሚዛቆ ዛላ ዳዔ» ጌዔኔ ጌዒ ኬኤዘኔ።

36 «ማይ ዓካሪ ሃያ ዒንሢ ሱጸ ዩሱስ የኦሲ ሜሲሄ ሃሣ ጎዳቴ ማሃሢ ዒሰሪዔኤሌ ዳራ ቢያ ጎኔና ዔርንጎ!» ጳዲሮሴ ጋዓዛ፡ 37 ዓሳ ዬያ ዋይዘሰካፓ ዒኔ ዱጲ የያየ ጳዲሮሴንታ ዒዛና ዋላ ዓኦ ዳኪንቴዘንሢኮ ኮራ፡- «ዒሾንሢዮቴ! ዓካሪ ኑ ዋዶንዶይ?» ጌዒ የኦጮኔ።

38 ጳዲሮሴ ማሃዮ፡- «ጎሞ ቡኤፀዋቴ፤ ጎማ ዒንሢኮ ዓቶሞ ጌይንጎንዳጉዱ ዩሱስ ኪሪሰቶሴ ሰንጾና ዋኦጾ ማሰቱዋቴ፤ የኦሲ ዒንገሢ ማዔ ዓያኖ ጌኤዠ ዒንሢ ዔካንዳኔ። 39 ዓይጎር ጌዔቶ የኦሲኮ ዋዘ ቃኦላ ዒንሢንታ ዒንሢኮ ናኦቶንታሞ ሃሣ ጎዳ የኦዛሢ ፔ ባንሢ ዔኤላንዳ ሃጋ ሴካ ቤርታ ሙካንዳ ዓሶሞ ቢያኬ» ጌዔኔ።

40 ሃሣ ዬያጉዱ ቃሲ ሚርጌ ባኦዚ ማርካ ማሃ ኬኤዚ ኬኤዚ፡- «ሃያ ዋሶ ሾይንቶይዳ ሄላንዳ ባይሰንቶይዳፓ ዒንሢ ቶኦኮ ዳቂሾዋቴ» ጌዒ ዔያቶ ዘሬኔ። 41 ዬያ ዓሶይዳፓ ሚርጌሢ ጳዲሮሴ ጌዔ ባኮ ጎኔኬ ጌዒ ዔኪ ዋኦጾ ማሰቴኔ፤ ዬኖ ኬሎና ሃይሃ ሺያ ማዓ ዓሲ ኪሪሰቶሴ ጎናሲ ዔኪ ዔያቶይዳ ቃሲንቴኔ። 42 ዬያታ ዳኪንቴዘንሢኮ ዔርዚያ ዋይዚ ዋይዚ፡ ፔቴሞና ናሽኪንቲ ዋላ ናንገ ናንገ፡ ካሣኦ ዋላ ሙዒ ሙዒ ሺኢጲሢያ ዶዱ ሺኢቃኔ።

ኪሪሰቶሴ ጉሙርቃ ዓሶኮ ፔቴሞ ናንጎ

43 ዬኖ ዋዶና ዳኪንቴዘንሢኮ ዛሎና ሚርጌ የኦሲ ዋልቄና ማዲንታ ዓኪ ባኦዚና ዱቃሣ ባኦዚና ማዲንታያ ማዔሢር ዒዘ ዋዶና ዒኢካ ናንጋ ዓሳ ቢያ ዬያ ባኮ ዱቃቲ ዛጋኔ። 44 ኪሪሰቶሴ ጉሙርቃ ዓሳ ጋዓንቴ ፔቴሞና ናንጋኔ፤ ዔያቶኮ ዓኦ ባካ ቢያሢርኬ። 45 ዔያታ ፔኤኮ ዓኦ ሳየና ቆሎና ሻንቺ ሻንቺ ሚኢሾ ዋለሞ ኮይሳሢ ጎይያ ፓቃኔ። 46 ቢያ ኬሊ ጌኤዠ ማኦርይዳ ፔቴሞና ቡኪንታኔ፤ ፔቴ ፔቴሢኮ ማኦር ዓኦዲ ዓኦዲ ካሣ ዋላ ሙዒ ኮሺ ዒኔና ዋዛዲ

2:34-35 2:34-35 ዓይኑ. 110:1። 2:44 2:44 ዳኪ. ማዳ 4:32-35።

ናንጋኔ፤ 47 የኦሲያ ዔይታ ጋላታኔ፤ ዓሲ ቢያ ዔይቶ ቦንቻኔ፤ የኦሲ ሃሣ ዔይቶ ገዳ ዳቃ ዓሲ ቢያ ኬሊ ቃሳኔ።

3

ጳጳርሴንሣ ዋቦ ዓሲሰኬያ ዳቂሼሣ

1 ፔቴ ኬሊ ጳጳርሴና የሃኒሴና የኦሲ ሺኢቆ ዋዳ ሄሌም ጌኤዢ ማእሪ ዓኣዳኔ፤ ዬና ዋዳ ማሣ ደምቦልሳ ዋዳ ማዓኣናኬ። 2 ዒማና ጌኤዢ ማእሪ ጌሎ ካራ «ሚዛጲ ካራ» ጌይንታ ቤሲ ዓኣኔ፤ ዒዛ ቤዜሎይዳ ሸይንቴማፓ ዓርቃዎ ዋቦ ማዔ ዓሲ ዓኣኔ፤ ዬያ ዓሣ ዓሳ ቢያ ኬሊ ዔኪ ሙኪ ሙኪ ዒኢካ ጌሣኔ፤ ጌሣሰካፓ ዒዚ ዒኢካ ዴዒ ጌኤዢ ማእሪ ጌላ ዓሳ ዒዛም ዔኤቢ ዒንጋንዳጉዲ ሸኢቃኔ። 3 ጳጳርሴና የሃኒሴና ጌኤዢ ማእሪ ጌላሣ ዬይ ዓሣ ዛጋዎ ዔኤቢ ዒንገም ዔይቶ ሸኢቃኔ። 4 ዔይታ ጋዓንቴ ዓሣ ኮሺ ዛጌሰካፓ ጳጳርሴ ዓሣ ኮራ፡- «ሂንዳ ኑ ባንሣ ዛጌ» ጌዔኔ። 5 ዋቦ ዓሣ ታኣም ዔኤቢ ዒንጋንዳሲኑዋይ ጌዒ ኮሺ ዔይቶ ዛጌኔ። 6 ጳጳርሴ ጋዓንቴ፡- «ቢራና ዋርቄና ታኣኮ ባኣሴ፤ ታኣኮ ዓኣማ ታ ኔኤም ዒንጋንዳኔ፤ ሩዚሬቶ ዬሱሰ ኪሪሰቶሴ ሰንገያና ዔቂ ሃንቴ» ጌዒ፤ 7 ሚዛቆ ኩጮ ዓሣኮ ዓርቂ ዔቂሴኔ፤ ዓሣኮ ቶኮና ጨጌጮና ቤዘና ዶዴም። 8 ለዓ ጌዒ ዔቂ ዔይቶና ዋላ ሃንቴ ጌኤዢ ማእሪ ጌሌኔ፤ ሴካ ሃንጋ ጌዒያ ሃንቴ ሃንቴ ሃሣ ኮኦሚ ኮኦሚ የኦሲ ጋላቴኔ። 9 ዓሳ ቢያ ዒዚ የኦሲ ጋላቴ ጋላቴ ሃንታሣ ዛጌኔ። 10 ጌኤዢ ማእሪ ጌሎ ካራ «ሚዛጲ ካራ» ጌይንታ ቤዛ ዴዒ ሸኢቃሣ ዒዛ ማዔሣያ ዔይታ ዔሬኔ፤ ሃሣ ዒዛይዳ ማዳንቴ ባኮ ዛጋዎ ዲቃቴ ሄርሺሣ ዓርቄኔ።

ጳጳርሴ ጌኤዢ ማእሪይዳ ጌሰቴ ባኮ

11 ዬይ ዳቂ ዓሣ ጳጳርሴና የሃኒሴናይዳፓ ታ ደማዳዓ ጌዒ ዴንዶ ዒዒ «ሴሎሞኔ ዴማ ሃንታ፡ ዴኤፖ ዛምፓሣ» ጌይንታ ቤዘይዳ ዓኣንቴ፡ ዓሳ ዲቃቴ ሄርሺሣና ዒዛ ቤዜሎ ዔይቶ ባንሣ ጳሽኪ ሙከኔ፤ 12 ጳጳርሴ ዓሰ ዛጋዎ፡- «ዒሰራዔኤሌ ዓሲዮቴ! ሃያ ባኮ ዒንሣ ዓይጎር ዲቃቴ ሄርሻይ? ዓይጎር ዒንሣ ሃያይዳ ፔቶ ጊዥ ጌዒ ኑና ዛጋይ? ኑኡኒ ሃያ ዓሣ ኑ ዋልቄና ሃሣ ኑኡኒ ኮሺ ማዳያ ማዒ ዔቂሲ ሃንቴሴያ ዒንሣ ኮራ ማላ? 13 ጋዓንቴ ዒብራሃማኮ፡ ዪሳኣቄኮ፡ ያይቆኦቤኮ የኦዛሣ ሃሣ ቤርታኣ ኑ ዓዶንሣ የኦዛሣ ፔኤኮ ናዓሣ ዬሱሴ ቦንቻኔ፤ ዒንሣ ጋዓንቴ ዒዛ ሃይቃንዳጉዲ ጲላጆሴም ዓኣሣ ዒንጌኔ፤ ጲላጆሴ ዒዛ ሃሻኒ ኮዓዛ ዒንሣ ኑ ዒዛ ኮዑዋሴ» ጌዔኔ። 14 ጌኤሺ ማዔ ዒላሣ ኑ ዒዛ ኮዑዋሴ

3:13 3:13 ኬሲ. ማፃ 3:15።

ዲንሢ ጌዒ ፔቴ ዓሶ ዎዳ ዓሢ ቡሊንታንዳጉዲ ጲላዎሴ ኮራ ዲንሢ ሸኢቁኔ። 15 ሼምፖ ዲንጋያ ማዕሢ ዲንሢ ዎዳንቴ፣ ያኦሲ ዒዛ ሃይባፓ ዔቁሴኔ፤ ዬያ ባኮኮ ኦኡኒ ሃሢ ማርካኬ። 16 ሃይ ሃሢ ዲንሢ ዛጋ ዓሢ፣ ቤርታኣ ዲንሢ ዒዛ ዔራ ዓሢ ዳቁ ደዳሢ ዬሱሴ ሱንዖና ጴዳ ጉሙርቁሢናኬ፤ ዬሱሴ ሱንዖ ጉሙርቁዖና ዲንሢ ቢያሢኮ ቤርቶይዳ ዳቁ ዓሲ ማዒ ዒዚ ጴዳኔ» ጌዔኔ።

17 ጴዳርሴ ሃሃ ኬኤዛዖ፡- «ዒሾንሢዮቴ! ዬሱሴይዳ ዲንሢ ማዳ ባኮ ዲንሢኮ ሱኡጎጉዲ ዲንሢያ ዔራዎዖ ማዳሢ ታ ዔራኔ። 18 ያኦሲ ጋዓንቴ ዬያ ማዳሢ ሲዛም ደማዳ፣ ማሲሄ ማቶ ዔካንዳያ ኮይሳኔ» ጌይንቴ ያኦሲ ማሊዖ ኬኤዛ ዓሶ ዛሎና ኬኤዚንቴሢ ኩማንዳጉዲኬ። 19 ዓካሪ ጎማ ዲንሢኮ ዓቶም ጌይንታንዳጉዲ ጎም ቡኡፀዎቴ፤ ያኦሲ ባንሢያ ማዕዎቴ፤ 20 ዬያይዳቴ ዲንሢም ጎዳይዳፓ ዓያና ዛላና ደዲሢ ዎዳ ሙካንዳኔ፤ ያኦሲ ቤርታዲ ዒዛ ደኦሬ ማሲሄያ ዲንሢም ዳካንዳኔ። 21 ዒዚ ጨሪንጮይዳ ዳዒኒ ኮይሳሢ ጌኤሺ ማዔ፣ ያኦሲ ማሊዖ ኬኤዛ ዓሶ ዛሎና ያኦሲ ቤርታዲ ኬኤዜሢጉዲ ዓጪ ካራና ቢያ ዓካዲንዳ ዎዳ ሃላንዳኣናኬ። 22 ሙሴያ ኬኤዛዖ «ያኦሲ ታና ኬሲ ዲንሢም ኬኤዚሳሢጉዲ ዲንሢኮ ጌርሲንሢ ባኣካፓ ያኦሲ ማሊሢ ኬኤዛዖ ኬሳንዳኔ፤ ዬይ ኬኤዛ ባኮ ቢያ ዎይዙዎቴ፤ 23 ዬይ ያኦሲ ማሊዖ ኬኤዛሢ ኬኤዛ ባኮ ዎይዙዎይ ቢያ ዳሪፓ ዳማዲ ባይቆንጎ» ሃዚ ጌዔኔ። 24 ያኦሲ ማሊዖ ኬኤዛ ጎሙዔኤሌይዳፓ ዓርቁ ያኦሲ ማሊዖ ኬኤዛ ዓሳ ቢያ ሃኖ ዎዳ ዛሎ ኬኤዜኔ። 25 ያኦሲ ማሊዖ ኬኤዛ ዓሶ ዛሎና ኬኤዚንቴ ሃጊ ማዓንዳ ዎዛ ዲንሢሮኬ፤ ዬያጉዲ ያኦሲ ዓብራሃማም ሳይይዳ ዓኣ ዳራ ቢያ ኔ ዜርዖና ዓንጂንታንዳኔ» ጌዒ ኦኡኮ ዓድንሢና ዎላ ጨኣቁ ጨኣቁማ ዲንሢማኣ ማዓያኬ፤ 26 ዬያር ያኦሲ ቤርታዲ ፔ ናዓሢ ዳኬሢ ዲንሢምኬ፤ ዬያ ያኦሲ ማዳሢ ዬይ ናዓሢ ዲንሢ ፔቴ ፔቴሢ ፑርቶ ጎይፃፓ ማሃ ሃሃ ዲንሢ ዓንጂንዳጉዲኬ» ጌዔኔ።

4

ጴዳርሴና ዮሃንሴና ዎጎ ዎጋ ዓይሁደ ዓሶ ቤርቶ ሸኢኬሢሢ

1 ጴዳርሴና ዮሃንሴና ዳርም ኬኤዛ ጎይሢ ዓኣንቴ፣ ቁኤሶና * ጌኤዦ ማኣሮ ካፓ ዓሶኮ ሱኡጋሢና ዬያጉዲ ሃሃ ሶዶቁ ጌይንታ ዓሳ

3:14 3:14 ማቴ. 27:15-23፤ ማር. 15:6-14፤ ሉቃ. 23:13-23፤ ዮሃ. 10:12-15።
3:22 3:22 ላሚ. ዎማ 18:15፤ 18። 3:23 3:23 ላሚ. ዎማ 18:19። 3:25
3:25 ማዢ. ማፃ 22:18። * 4:1 4:1 ቁኤሶና፡- ጋዓዜ ፔቴ ፔቴ ሚናኣ ማፃኣፓ
«ቁኤሶኮ ሱኡጎና» ጋዓኔ።

ዔያቶ ኮራ ሙካዎ፥ 2 ዩንሢ ላምዎ ዳኪንቴዘንሣኒ ዩሱሴኮ ሃይባፓ ዔቂዎ ዛሎ ዒኢካ ዓሶ ዔርዘሢሢረ፤ ሃሣ ዩያፕዲ ሃይቁ ዓሶኮ ዔቂሢ ዓኣያ ማዔሢ ዓሶም ፔጋሲ ከኤዘሢረ ዔያታ ዳጋና ጎሪንቴኔ። 3 ሃሣ ዔያቶ ዓርቁኔ፤ ዒማና ሳዓ ዓሚያታሢረ ሳዓ ካራንዳኣና ቱኡዘ ማኣራ ቱኪ ዎይሢ። 4 ያዒ ማዔቶዎ ዔያታ ከኤዘ ቃኣሎ ዎይዜ ዓሶይዳፓ ሚርጌሢ ኪሪሰቶሴ ጉሙርቁኔ፤ ዩማና ኪሪሰቶሴ ጉሙርቃ ዓቲንቆኮ ፓይዳ ደንጎ ሺያ ባንሢ ዴግ ጌዔኔ።

5 ዚሮ ጉቴሎ ዓይሁዶ ዓሶኮ ሱኡጎና ጨሞ ማዔ ዓሶና ሙሴ ዔርዘ ዎጎ ዔርዘ ዓሶና ዎላ ዩሩሳላሚይዳ ቡከንቴኔ። 6 ዒኢካ ቡኩ ዓሶ ባኣካ ቁኤሶ ቢያኮ ሱኡጋሢ ማዔ፥ ሃናንታ ቃያፓንታ ዮሃኒሴንታ ዒሰኪንዲሮሴንታ ቁኤሶ ሱኡጋሢ ሲገሮ ማዔ ዓሳኣ ዓኣኔ። 7 ዩካፓ ዔያታ ላምዎ ዳኪንቴዘንሣኒ ዔኪ ሙኪ ዔያቶ ባኣካ ዔቁሳዎ፡- «ሃያ ዒንሢ ዓይጎ ዎልቁና ሃሣ ዎ ሱንሢና ማዴይ?» ጌዒ ያኦጩኔ።

8 ዩማና ጳዳሮሴ ዓያና ጌኤሺ ቢታንቶ ዴሞ ጌሊ፡- «ዒንሢ ዴሮኮ ሱኡጎና ጨሞ ማዔ ዓሳ! 9 ኑኡኒ ሃኖ ያኦጩንታሢ ፔቴ ዎቦ ዓሢም ኮሺ ባኣዚ ማዲንቴሢረና ሃሣ ዒዚ ዎይቲ ዳቁታቶዎ ዩኖ ዛሎሮ ማዔቶ፥ 10 ሃይ ዓሢ ዳቁ ዒንሢ ቤርታ ዔቁሢ፡- ዒንሢ ሱጻሢ ሃሣ ያኦሲ ሃይባፓ ዔቁሴሢ፤ ናዚሬቶ ዩሱሰ ኪሪሰቶሴ ሱንጾና ማዔያታሢ ዒንሢንታ ዒሰራዔኤሌ ዴሮ ቢያሢም ዔርቴያ ማዎንጎ። 11 ዒንሢ ማኣሮ ማኸ ዓሳ ቦሃ ከኤሬ ሹጫሢ ዒዛከኔ፤ ጋዓንቴ ዒዚ ማኣሮ ዶዲሺ ዓርቃ ሄላሢ ማዔኔ። 12 ዩያሮ ዳቁንታ ዒዛና ማዓንዲፓዓቱም ሜሌ ዓይጎ ዓሲናታዎ ባኣሴ፤ ዓይጎሮ ጌዔቶ ኑ ዳቃኒ ኮይሳያ ሃሣ ያኦሲ ዓሲም ዒንጌ ሱንሢ ዒዛ ሱንጾይዳፓ ዓታዛ ዓጮ ቢያይዳ ያኦኒያ ባኣሴ» ሂዚ ጌዔኔ።

13 ዎጎ ዎጋ ዓሳ ጳዳሮሴና ዮሃኒሴና ዒጊጩዎዎ ቢያ ባኮ ጎናሲ ከኤዛሢ ዛጌ ዎዶና ዔርዘ ማኣሮ ጌለባኣ፥ ጉሪ ዓሲታሢ ዔያቶ ዔራያታሢረ ዲቃቲ ሄርሻዎ፥ ዔያታ ዩሱሴና ዎላ ዓኣያ ማዔሢ ዔሬኔ። 14 ዳቁ ዓሢያ ጳዳሮሴና ዮሃኒሴና ኮራ ዔቁ ዓኣሢ ዛጋዎ ጎዎንዶ ጎይሢ ዔያታ ባይዜኔ። 15 ዩያሮ ዎጎ ዎጎ ቤዘይዳፓ ዳካሮ ዔያቶ ሺኣሻዎ ሂዚ ጌዒ ዔያታ ዘርቴኔ። 16 «ዓካሪ ሃንሢ ዓሶንሢ ኑ ዎዶንዶይ? ሃይ፥ ያኦሲ ዎልቁና ማዲንታ ዴኤፖ ዓኮ ባካ ዔያቶ ዛሎና ማዲንቴሢ ዩሩሳላሚ ዓጫ ናንጋ ዓሶም ቢያ ዎይዘንቴኔ፤ ዩያሮ ኑ ዔሩዎሴ ጋዒኒ ዳንዳዑዎሴ፤ 17 ጋዓንቴ ዴሮ ባኣካ ሃይ ዳልገ ዴንዲዎንቴ ሃካፓ ሴካ ዩሱሴ ሱንጾ ዔኤሊ ያኦማኣ ዔያታ ዔኤቢ ከኤዙዎፕዲ <ዒንሢና ዔሩዎቲ!> ኑ ጋዓንዳኔ» ጌዔኔ።

4:11 4:11 ዓይኑ. 118:22።

18 ዩካፓ ዔያታ ጳጳርሴና ዮሃንሴና ዔኤላዎ ዩሱሴ ሱንዖ ዔኤሊ ፔቴታዎ ዔኤሊ ኬኤዙዋጉዲና ሃሣ ዔርዙዋጉዲ ኮሺ ላቲ ዓይሣኔ። 19 ጳጳርሴና ዮሃንሴና ጋዓንቴ ማሃዎ፡- «የኦሲም ዓይሣንቴፃፓ ባሺ ዒንሣም ዓይሣንቴሣ ያኦሲ ቤርቶይዳ ኮይሳያዳ? ዒንሣ ሂንዳ ዒንሣ ቶኦኪና ዋጉዋቴ። 20 ኦም ጋዓንቴ ዛጌሣና ዋይዜሣና ኬኤዚሣ ሃሺንታዓኬ» ጌዔኔ። 21 ዳርኮ ሱኡጎና ዋጎ ዋጋ ዓሶና ጳጳርሴና ዮሃንሴናይዳ ጌሰቲ ዋጎንዶ ባኣዚ ዴንቁባኣሣረ ዴርዋ ሃሣ ዔያታ ዒጊጨሣረ ጊንሣ ሃሣ ዒንሣና ዔሩዋቴ ጌዒ ላታዎ ሃሺኔ። ዓይጎር ጌዔቶ ዴራ ማዲንቴ ባኮር ያኦሲ ጋላታያ ማዔሣረኬ። 22 ዩያ ያኦሲ ዋልቆና ማዲንቴ ዓኮ ባኮና ዳቂ ዓሣኮ ለዓ ያይዲታሚፓ ዑሣኬ።

ኪሪሰቶሴ ጉሙርቁ ዓሳ ዳውሲንቴያና ሺኢቁ ሺኢጲሣ

23 ጳጳርሴና ዮሃንሴና ቡሊንቴ ኪሪሰቶሴ ጉሙርቆዞንሣ ኮራ ሙካዎ ቁኤሶኮ ሱኡጎና ዓይሁዶ ዓሶኮ ጨዋና ዔያቶ ኮራ ጌዔ ባኮ ቢያ ኬኤዜኔ። 24 ዔያቶኮ ላጎንሣያ ዩያ ዋይዛዎ ዑኡዘ ፔኤሲ ዴጊዲ ያኦሲ ሂዚ ጌዒ ሺኢቁኔ፡- «ጫሪጎጮንታ ሳዎንታ ባዞንታ ሃሣ ዩያ ባኮ ቢያይዳ ዓኣ ባኮ ቢያ ዋይሣሣና ማዜ ጎዳሣዮ! 25 ዓያና ጌኤዣ ማኣዴም ማዳ ኔ ዓይላሣ፤ ኦ ዳዳሣ ዳውቴ ዛሎና፡- ዓይሁዴ ማዒባኣ ዓሳ ዓይጎር ጎሪንቴ ጉንዲሜይ?

ዴራ ሃሣ ጉሪ ፓሡዋ ባኣዚ ዓይጎር ማሌይ?

26 ሳዎኮ ካኣታ ዋሊ ጊንዖ ዔቁ ዋይሣ ዓሳኣ ፔቴይዳ ቡከንቴ ጎዳና ሜሲሄናይዳ ሞርኬ ማዒ ዔቁኔ »

ሂዚ ጌዒ ኬኤዜሣ ጎኔኬ።

27 ሃሣ ዔያታ ጋዓዎ፡- «ጎኔና ሄርዲሴንታ ጳንዖሰጲላዎሴንታ ዓይሁዴ ማዒባኣ ዓሶንታ ዒሰራዔኤሌ ዴርንታ ዋላ ሃኖ ካታሜሎይዳ ቡከንቴ ኔኤኒ ሜሲሄ ማሄ ኔኤም ማዳ፣ ዲማዳ፣ ዩሱሴ ዑያይዳ ዔቁኔ። 28 ያዲ ዔያታ ማዳሣ ቤርታዲ ኔኤኒ ኔ ዋልቆና ሃሣ ኔ ማሊያና ማሌ ባኮ ኩንሣኒኬ፤ 29 ሃሣያ ጎዳሣዮ! ዔያቶኮ ዚርቁዎ ዋይዜ፤ ኔኤም ማዳ ዓይላ ቃኣሎ ኔኤሲ ዒጊቹዋ ባኣያ ጫርቁ ኬኤዛንዳጉዲ ማዳ፤ 30 ኔኤም ዲማዲ ማዳ፣ ዩሱሴ ሱንዖና ሃርጊንቴ ዓሳ ዳቃንዳጉዲና ሃሣ ኔ ዋልቆና ማዲንታ ዓኪ ባኣዚና ማላታና ማዲንታንዳጉዲ ዋልቆ ኔኤሲ ዳቁ» ጌዒ ሺኢቁኔ።

4:24 4:24 ኬሲ. ማፃ 20:11፤ ኔሂ. 9:6፤ ዓይኔ. 146:6። 4:26 4:26 ዓይኔ. 2:1-2። 4:27 4:27 ማቲ. 27:1-2፤ ማር. 15:1፤ ሉቃ. 23:1፤ 7:11፤ ዮሃ. 18:28-29።

31 ሺኢቂ ዔያታ ጋፓማና ዔያታ ዓኣ ቤዛ ዓገፂኔ፤ ጉቤሢ ዬማና ዓያና ጌኤሺ ቢታንቶ ዴሞ ጌሌኔ፤ ያኦሲኮቶ ቃኣሎ ዔያታ ዒገቺሞ ባኣያ ጫርቂ ከኤዜኔ።

ቤርታዲ ኪሪሰቶሴ ጉሙርቂ ዓሶኮ ፔቱሞ ናንጎ

32 ኪሪሰቶሴ ጉሙርቂ ዓሶኮ ቢያ ፔቱ ዒኔና ፔቱ ማሊሢና ዓኣኔ፤ ያና ማዔቶሞ «ሃይ ታኣርኬ» ጋዓ ባኣዚ ባኣሴ፤ ዔያቶኮ ዓኣ ባካ ቢያ ፔቱይዳኬ፤ 33 ዳኪንቴዞንሢኮ ጎዳ ዬሱሴኮ ሃይባፓ ዔቂቶ ዳኤፔ ሞልቄና ማርካዲ ከኤዛኔ፤ ያኦሲያ ዔያቶ ቢያሢሞ ሚርጌ ዳኤፔ፤ ኮሺ ማዶ ማዳኔ። 34 ሳዓታቶሞ ማኣሪታቶሞ ዔያቶኮ ዓኣ ባኮ ቢያ ሻንቺ ሻንቺ ሚኢሾ ዔኪ ሙኪ ፔቱይዳ ጌሢ ማኣዲንታሢር ዔያቶ ባኣኮይዳ ፔቱታዎ ሜታዳ ዓሲ ባኣሴ። 35 ሚኢሾ ዔያታ ዔኪ ሙካዎ ዳኪንቴዞንሢኮ ሚንጋኔ፤ ዬያር ፔቱ ፔቱሢሞ ኮይሳሢጉዴያ ጌሻኪንታኔ።

36 ቆጶርሴ ጌይንታ ዓጪዳ ሾይንቴ ዮሴፔ ጌይንታ ፔቱ ለዊ ፃጶፓ ማዔሰኬያ ዓኣኔ፤ ዳኪንቴዞንሢኮ ሚዛኮ ሱንዎ «ባርናባሴ» ጋዓኔ። ዬኖኮ ቡሊፃ «ዶዲሻ ናይ» ጌይሢከ። 37 ዒዚያ ፔኤኮ ሳዎ ሻንቺ ሚኢሾ ዔኪ ሙኪ ዳኪንቴዞንሢኮ ሚንጌኔ።

5

ሃናኒያና ሳጲራና

1 ፔቱ ሃናኒያ ጎዎ ዓሲሰኬያ ሳጲራ ጌይንታ ዒዛኮ ማሻሰኬኖና ሞላ ሳዓ ሻንቺኔ፤ 2 ማቻ ዒዛኮ ዔራንጉቴ ሳዎ ሻንቺና ሚኢሾይዳፓ ፓቂ፣ ዓይሲ ዔኪ ሙኪ ዳኪንቴዞንሢኮ ሚንጌኔ፤ 3 ጶጶርሴ ጋዓንጉቴ ዒዛሞ፡- «ሃናኒያ! ዓያኖ ጌኤዦሞ ኔ ሉኡቃንዳጉዲ ሃሣ ሳዎ ኔ ሻንቺ ሚኢሾኮ ዛሎ ፓቂ ዓይሳንዳጉዲ ማዶ ፃላሃ ዒና ኔኤኮ ዓይጋ ጌሌይ? 4 ኔኤኒ ሳዎ ሻንቺባኣንጉቴ ቤርታ ኔኤርቱዓዳ? ሃሣ ኔ ሻንቺሰካፓ ሚኢሻ ኔኤርቱሞይ? ሂዳዎ ሃያ ባኮ ዓይጋ ኔ ዒኖና ማሌይ? ኔ ሉኡቁሢ ያኦሲሞ ማዓንዳኣፓዓቲሞ ዓሲሞቱሞ» ጌዔኔ። 5 ሃናኒያ ዬያ ሞሞይዛዎ ሎኣሚ ሃይቂኔ፤ ዬኖ ባኮ ሞይዜ ዓሳ ቢያ ኮሺ ዒገጩኖ። 6 ዓሲሰኬንሢኮ ዒማና ሌዞ ዒዛኮ ሱኡዳዎ ዔኪ ዓኣዲ ዴኡከኔ።

7 ዬካፓ ኔንጉቴ ሃናኒያኮ ማቻ ዒዛ ቤዛ ሙከኔ፤ ዓኒዳ ማዲንጉቴ ባኮ ጋዓንጉቴ ዒዛ ዔሪባኣሴ። 8 ጶጶርሴ ዒዛ ኮራ፡- «ሂንዳ ታኣሞ

4:32 4:32 ዳኪ. ማዶ 2:44-45።

ከኤዜ፤ ዲንሣ ሳዎ ዲንሣላት ሻንቼሣላ ሃንሣላጉዴ ሚኢሼምዳ?»
ጌዔ። ዲዛ ማሃዎ፡- «ሂዮ፡ ዩንሣላጉዴ ሚኢሼምድ» ጌዔ።

9 ዩማና ጳጳሮሴ፡- «ጾኑሲኮ ዓያና ዎይታቲ ሂንዳ ኑ ዛጎም» ጌዔ
ዎዲ ዲንሣ ዎላ ጌሰቲይ? ሃይሽ ኔኤኮ ዓኒ ዲኡኪ ማዓ ዓሳ ካራ
ዓኣኔ፤ ኔናኣ ሃሃ ዔያታ ዔኪ ዓኣዲ ዲኡካንዳኔ» ጌዔ። 10 ዲዛኣ
ቤዘማና ቶኮ ዴማ ዲዛኮ ሎኦሚ ሃይቄኔ፤ ዓሶንሣ ጌላንቲ ዲዛ
ሃይቄ ዓኣ ጋዓዛ፡ ዔኪ ዓኣዲ ዓኒ ዲኡጉ ኮራ ዲኡኤ። 11 ሺኢጲዎ
ማኣሮ ዓሶ ቢያሣዳ፤ ሃሃ ጊንሣ ዩያ ባኮ ዎይዜ ዓሶ ቢያሣዳ
ዲጊቹም ጌሌ።

ዳኪንቴዘንሣላ ማዳ ሚርጌ ሃርጌ ዓሲ ፖዔሣ

12 ሚርጌ ያኦሲ ዎልቄና ማዲንታ ዓኪ ባኣዚና ዲቃሣ
ባኣዚና ዳኪንቴዘንሣላ ማዳ ዲማና ማዲንታኔ፤ ሃሃ ከሪሰቶሴ
ጉሙርቃዘንሣላ ፔቲ ዲኔና ማዲ «ሴሎሞኔ ዴማ ሃንታ፡ ዴኤጉ
ዛምፓሣ» ጎዎ ቤዘይዳ ቡኪንታኔ። 13 ዔያቶይዳፓዓቲም ጉሪ ማሌ
ዓሲ ማዔያ ፔቲታዎ ዔያቶና ዎላ ማዓኒ ጫርቁባኣሴ፤ ያዲ ማዔቲያ
ዴራ ዔያቶ ቦቦንቻኔ። 14 ጎዳ ጉሙርቃ ዓሶ ዓቲንቆና ላኣሎናኮ
ፓይዳ ኮሺ ሚርጌ ሚርጌ ዓኣዴ። 15 ዳኪንቴዘንሣላ ማዳ ማዲንታ
ዲቃሣ ማዳሮ ጌዔ ዓሳ ዲቢ ሃርጊንቲ ዓሲ ጎይዎይዳ ኬሲ ኬሲ፡
ዛሎ ሻኣላይዳ ዛሎ ሃላሣዳ ላይሣኔ፤ ያዲ ዔያታ ማዔሣ ጳጳሮሴ
ዩይና ዓኣዳኣና ዔኤኮ ሺባታዎ ፔቲ ፔቲ ዓሶ ዑዎ ሃላንዳጉዲኤ።
16 ዩሩሳላሚ ኮይላ ዓኣ ካታማፓ ዓሳ ፔኤኮ ሃርጊንቲ ዓሶና ፑርታ
ዓያና ማታዳ ዓሶ ዔኪ ሙካኔ፤ ቢያሣያ ዶርዓሣዳፓ ፖዔ።

ዳኪንቴዘንሣላ ዲዲ ዳውሶናሣ

17 ዩያይዳፓ ዔቄያና ቄኤሶኮ ሱኡጋሣና ዲዛና ዎላ ዓኣ ሶዶቄ
ዓሶ ዜርፃ ቢያ ሞርኬ ማዲ ዳኪንቴዘንሣላ ዑፃ ዔቄኔ፤ ሃሃ ዔያቶ
ዒናፓ ቁኢራ፤ 18 ዓርቄ ዔኪ ዴሮኮ ቱኡዘ ማኣራ ጌልዚ ቱኤ።
19 ያኦሲኮ ከኢታንቻ ጋዓንቲ ዲሞና ቱኡዘ ማኣሮኮ ካሮ ቡሊ ዔያቶ
ኬሳዎ፡- 20 «ዴንዲ ሺኢጲዎ ማኣሮይዳ ዔቄ ዴሮም ሃያ ሸምፖ
ቃኣሎ ቢያ ከኤዘዎቲ» ጌዔ። 21 ዳኪንቴዘንሣላ ዩዮ ዓይሣዎ
ዔኪ ጉቲ ዓሚ ሺኢጲዎ ማኣራ ጌላዎ ቃኣሎ ከኤዘሣ ዓርቄኔ፤
ዲማና ቄኤሶኮ ሱኡጋሣንታ ዲዛና ዎላ ዓኣ ዓሶንታ ሃሃ ዎጎ ዎጎ
ዓሶንታ ዓይሁዶ ዓሶኮ ጨምንታ ቢያ ሙኪ ፔቲይዳ ቡኪንቲ፤
ዩካፓ ዳኪንቴዘንሣላ ቱኡዘ ማኣራፓ ዴንዲ ዔኪ ሙካንዳጉዲ ዓሲ
ዳኤ። 22 ከኢቶና ዓኣዴ ዓሶንሣ ጋዓንቲ ቱኡዘ ማኣራ ዓኣዳዎ
ዳኪንቴዘንሣላ ዲኣካ ዴንቁባኣሴ፤ ዩያሮ ማዲ ሙካዎ፡- 23 «ቱኡዘ
ማኣሮኮ ካራ ኮሺ ዎዲንቲ፡ ካፓ ዓሳ ሃሃ ካራ ዔቄ ዓኣንቲ ኑ ዴንቄኔ፤

ቱኡዘ ማኣሮኮ ካሮ ኑ ቡላዎ ጋሮይዳ ፔቴታዎ ዓሲ ዳንቁባኣሴ» ጌራ ኬኤዜኔ።²⁴ ጌኤዡ ማኣሮ ካፓ ዓሶ ዓይሣሢና ቁኤሶኮ ሱኡጎና ዬያ ዋይዘዎ፡- «ሃይ ዓይጎ ባኣዚ ናንዳይ?» ጌራ ዔያቶ ዘሎ ጎዎንዶ ጎይሢ ባይዜኔ።²⁵ ዬማና ፔቴ ዓሲሰኬያ ሙካዎ፡- «ዒንሢ ቱኡዘ ማኣራ ቱኬ ዓሶንሢ ሃይሾ ጌኤዡ ማኣሮይዳ ዓቁ ዳሮ ዔርዛኔ» ጌራ ዔያቶም ኬኤዜኔ።²⁶ ጌኤዡ ማኣሮ ካፓ ዓሶኮ ሱኡጋሢ ዒዘኮ ዓይሢንቲ ማዳ ዓሶና ዋላ ኔጉዋዎ ዳንዲ ዳኪንቴዘንሢ ዔኪ ሙኬኔ፤ ዔያታ ዔኪ ሙኬሢ ዋልቁናቴዋንቴ ጌሺሢናኬ፤ ያዲ ዔያታ ማዳሢ ዳሮ ዔያቶ ሹቻ ዲዓንዳኔ ጌራ ዒጊጩሢሢ።

²⁷ ዔያታ ዔኪ ሙካዎ ዋጎ ዋጋ ዓሶ ቤርታ ዔቁሳዛ፤ ቁኤሶኮ ሱኡጋሢ ዔያቶ ኮራ፡- ²⁸ «ዬሱሴኮ ሱንዎ ዔኤሊ ፔቴ ባኣዚታዎ ዒንሢ ዔርዙዋጉዲ ላቲ ዒንሢ ኑ ዓይሢኔ፤ ሃሢ ዒንሢ ጋዓንቴ ዬሩሳላሜ ዓጮ ቢያ ዔርዚ ሃይሾ ኩርሴኔ፤ ዒንሢ ሃና ዓሳ ዬያ ዓሢኮ ሱጉዎ ኑ ዑፃ ማሃኒ ኮዓያኬ ሃይሾ!» ጌራ።።

²⁹ ጸዕርሴንታ ዒዛና ዋላ ዓኣ ዳኪንቴዘንሢንታ ማሃዎ፡- «ዓሲም ዓይሢንቲሢፓ ያኣሲም ዓይሢንቲሢ ኑና ከይሳኔ፤ ³⁰ ኑ ዓደንሢ ያኣዛሢ ሚያይዳ ዒንሢ ሱፃ ዋዳ ዬሱሴ ሃይባፓ ዔቁሴኔ፤ ³¹ ዬይ ዬሱሴ ዒሰራዔኤሌ ዳሮ ጎማፓ ማሃንዳጉዲና ጎሞ ዓቶም ጋዓንዳጉዲ ያኣሲ ዒዛ ዓርና ሃሢ ዳቁሻያ ማሃ ፔኤኮ ሚዛቆ ዘላ ቦንቾና ጌሣኔ፤ ³² ዬያ ባኮኮ ኑናንታ ያኣሲ ፔኤም ዓይሢንታ ዓሶም ቢያ ዒንጌ ዓያኖ ጌኤዡንታ ማርካኬ» ጌራ።።

³³ ዋጎ ዋጋ ዓሳ ዬያ ዋይዘዎ ኮሺ ዳጋዲ ዳኪንቴዘንሢ ዋዲኒ ኮዔኔ። ³⁴ ጋዓንቴ ዳሮ ባኣካ ቦንቾንታያ ሙሴ ዋጎ ዔርዛ ጌማሊያሌ ጌይንታ ፔቴ ፔርሴ ዓሲሰኬይ ዔቃዎ ዳካሮ ዋጎ ዋጋ ዓሶ ቤርታፓ ዳኪንቴዘንሢ ሺኢሻንዳጉዲ ዓይሢኔ። ³⁵ ዬካፓ ዋጎ ዋጋ ዓሶም፡- «ዒሰራዔኤሌ ዓሲዮቴ! ዒንሢ ሃና ዓሶይዳ ዓይጎ ማዳኒ ማላቴያ ዒንሢና ኮሺ ዔራዋቴ፤ ³⁶ ሃያኮ ቤርታ ዬያጉዲ ቴዋዳሴ ጌይንታ ዓሲ ታ ዳኤፔኬ» ጌራ ዔቁኔ፤ ሃሢ ዒዛና ዋላ ያይዶ ቄኤታ ዓሲ ፔቴ ማዔኔ፤ ጋዓንቴ ዬያ ዋዳም ዒዘኮ ገንዎ ሃንታ ዓሳ ላኣለንቲ ባይቃዛ ማሊፃ ዒዛሲያ ባይቁኔ። ³⁷ ዬካፓ ሃሢ ዳራ ፓይዲንቴ ዋዶና ጌሊላ ዓጪ ዓሲ ማዔ፤ ዪሁዳ ጎዎሢ ዔቁ ሚርጌ ዳሬ ዒዛ ገንዎ ሃንታንዳጉዲ ማሃኔ፤ ዒዚያ ዋዲንቴኔ፤ ዒዛ ገንዎ ሃንታ ዓሳኣ ላኣለንቲ ባይቁኔ። ³⁸ ዬያሮ ሃሢ ታ ዒንሢም ጋዓሢ ሃንሢ ዓሶንሢዳፓ ሃኪ ዒንሢ ዔያቶ ሃሻንዳጉዲኬ፤ ዓይጎሮ ጌዔቶ ሃይ ማሊፃ ሃሢ ሃይ ማዳ ዓሲፓ ሙኬያታቶ ባይቃንዳኔ፤ ³⁹ ያኣሲፓ ሙኬያ ማዔቶ ጋዓንቴ ዔያቶ ዒንሢ ባይዛኒ ዳንደዑዋሴ፤ ፔቶ

5:28 5:28 ማቲ. 27:25።

ዬይ ዲንሢኮ ያኦሲና ዋላ ፑርቲሢ ማዓንዳኔ» ጋዓዛ፣ ዔያታ ጌማሊያሌኮ ዞር ዋይዚ ዔኬኔ።

40 ዩካፓ ዔያታ ዳኪንቴዞንሢኮ ዔኤላዎ ጳርቁሲ ዩሱሴኮ ሱንዎ ዔኤሊ ዓሶ ዔርዙዋጉዲ ላታዎ ዳኬኔ። 41 ዳኪንቴዞንሢኮ ጋዓንቴ ዩሱሴ ዛሎና ቦርሲንቴታቶዋ ዔካኒ ገእጌያታሢር ዋዛዲ ዋዛዲ ዋኅ ዋጋ ዓሶ ቤርታፓ ኬሰኪ ዴንዴኔ፤ 42 ቢያ ኬሊ ጌኤዥ ማኣርና ዓሶኮ ማኣርናይዲ ማሰሢ ማዔ፣ ዩሱሴ ዛሎ ኬኤዚያንታ ኮዥ ሃይሶ ኬኤዚያዋ ዔያታ ሃሺባኣሴ።

6

ማዳ ማዳ ላንካዎ ዲያቆኖኮ ደኦሪንቴዎ

1 ዩካፓ ኪሪሰቶሴ ጉሙርቃ ዓሶኮ ፓይዳ ሚርጊ ሚርጊ ዓኣዳዛ ጊሪኬ ሙኡጮ ጌሰታ ዓይሁዶ ዓሳ ዩሩሳላሚይዳ ናንጋ ዓይሁዶ ዓሶ ዑያይዳ ጉንዲዋ ዓርቄኔ፤ ዓይጎር ጌዔቶ ኬሊ ኬሊ ሙዎ ባካ ዲንጊንታ ዋዶና ዔያቶኮ ባኣካ ዓኒንሢ ሃይቄ ላኣሎ ዩሩሳላሚ ዓይሁዶ ዓሳ ዋላሢርኬ። 2 ዩያር ታጳ ላምዎንሢ ኪሪሰቶሴ ጉሙርቃ ዓሶ ፔቲይዳ ቡኩሳዎ፡- «ሙኡዚ ጊሸኪሢር ጌዒ ያኦሲ ቃኣሎ ዔርዚያ ማዳ ኑና ሃሻኒ ኮይሱዋሴ። 3 ዓካሪ ታ ዲሸንሦ! ታ ሚሸንሦ! ኮሺ ዲኔና ዓኣያ ማዒ ማዳና ቢያሢ ጋላቲሳያ፣ ዓያና ጌኤሺ ኩሙሢ ዋልቁና ማዳያ ሃሃ ሚርጌ ዔራ ማዔ ላንካይ ዓሲ ዲንሢ ባኣካፓ ደኦሪዋቴ፤ ዩያቶ ኑኤኒ ሃና ማዳ ማዳሻንዳኔ። 4 ኑኤኒ ጋዓንቴ ሺኢጲያንታ ያኦሲ ቃኣሎ ዔርዚያ ማዳዋ ደዲ ማዳንዳኔ» ጌዔኔ።

5 ዩና ጌኤዛ ቢያሢ ዋዛሴኔ፤ ሃካፓ ሊካ ዓኣ ዓሶዋ ዔያታ ደኦሪኔ፤ ጉሙርቁሢ ዓኣያ ሃሃ ዓያና ጌኤሺ ቢታንቶ ዴዋ ጌሌ ዲሰዲፓኖሴ፣ ፒልጳሴ፣ ጲርኮርሴ፣ ኒቃርና፣ ዲዋና፣ ጳርሚ፣ ዓይሁዴቱዋዎ ዓይሁዴ ማዔ ዓንዎኪያ ዓጮ ዓሢ ኒቆላዋሴ ጎሣንታኬ። 6 ዩንሢ ዔያታ ዳኪንቴዞንሢኮ ቤርቶ ሺኢሸኔ፤ ዳኪንቴዞንሢኮ ሺኢቃዎ ኩጮ ዔያቶ ዑፃ ጌሢኔ።

7 ያዲዲ ያኦሲኮ ቃኣላ ዳልጊ ዳልጊ ዓኣዴሢር ዩሩሳላሚይዳ ኪሪሰቶሴ ጉሙርቃ ዓሶኮ ፓይዳ ሚርጊ ሚርጊ ዓኣዴኔ፤ ቄኤሶይዳፓኣ ሚርጌሢ ኪሪሰቶሴ ጉሙርቄኔ።

ዲሰዲፓኖሴኮ ዓርቄንቴዎ

8 ዲሰዲፓኖሴ ያኦሲኮ ኮሹዋ ዲንጊያ ዔኪ ዋልቁና ማዒ ዲቃሃ ባኣዚንታ ያኦሲ ዋልቁና ማዳንታ ዓኪ ባኣዚያ ዴር ባኣካ ዩና ዋዶና ማዳኔ፤ 9 ዲማና «ዲማዲ ኬሰኬ ዓሶ ሺኢጲያ ማኣር»

ጌይንታ ዓይሁድ ዓሳኮ ሺኢዲያ ማኣራፓ ማዔ ዓሳ፣ ቁሬናና ዒሰከንዲሪያ ዓጮ ዓሳ፣ ኪልቁያንታ ዒሲያ ዓጮ ዓሳንታ ፔቴይዳ ዔቁ ዒሰዲፓኖሴ ዒዲ ማርማኔ። 10 ጋዓንቴ ዒሰዲፓኖሴ ኬኤዛ ዔራቶና ዓያኖና ዔያታ ባሻኒ ዳንዳዒባኣሴ። 11 ዒማና፡- «ሃይ ዓሢ ሙሴና ያኦሲና ጫሽካንቴ ኑ ዋይዜኔ» ጋዓንዳ ዓሲ ዔያታ ዴማና ገኢጊሼኔ። 12 ዩያይዲ ዴሮንታ ጨሞንታ ሃሃ ሙሴ ዔርዜ ዋጎ ዔርዛ ዓሳዋ ዔያታ ዔቁሲ፣ ዒሰዲፓኖሴያ ዓይሢሲ ዋጎ ዋጋ ዓሳ ቤርቶ ሺኢሼኔ። 13 ዒማና ዒዛ ዑፃ ሉኡዙሞና ማርካዳንዳ ፔቴ ፔቴ ዓሲያ ዔያታ ዔኪ ሙኬኔ፤ ሉኡዙሞና ማርካዳ ዓሳ ኬኤዛዎ፡- «ሃይ ዓሢ ሃያ ጌኤዡ ማኣሮና ሙሴ ዔርዜ ዋጎና ጫሽካኔ። 14 ሃሃ ሩዝሬቶ ዩሱሴ ሃያ ማኣሮ ሻሃንዳኔ፤ ሙሴ ኑና ዓይሢ ዋጎዋ ለኣማንዳኔ» ጌዒ ኬኤዛንቴ ኑ ዋይዜኔ» ሂዚ ጌዔኔ። 15 ዩማና ዋጎ ዋጊያይዳ ዓኣ ዓሳ ቢያ ዒሰዲፓኖሴ ኮሺ ዛጋዛ፣ ዓኣፖ ካራ ዒዛኮ ያኦሲ ኪኢታንቻ ዓኣፒ ካራጉዲ ማሊ ጴዴኔ።

7

ዒሰዲፓኖሴ ጌሰቴ ጌኤዞ

1 ቁኤሶኮ ሱኡጋሢ ዒሰዲፓኖሴ ኮራ፡- «ዩይ ጌይንቴ ባካ ጎኔዳ?» ጌዒ ያኦጩኔ።

2 ዒሰዲፓኖሴ ሂዚ ጌዒ ማሄኔ፡- «ታ ዒሾንሦ! ታ ዓድንሦ! ሂንዳ ዋይዙዋቴ፤ ኑ ዓዳሢ ዓብራሃሜ ካኣራኔ ዓጮይዳ ናንጊዶር ዓኣዳንዳሢኮ ቤርታ ማሶፖታሚያ ዓጫ ዓኣንቴ ቦንቺንቴ ያኦዛሢ ዒዛሞ ጴዳዎ፣ 3 ኔ ዓጫፓ ኬሰኪ ሃሃ ኔ ዒጊኖይዳፓ ዴማዲ ታ ኔና ዳዋ ዓጮ ዓኣዴ» ጌዔኔ። 4 ዒማና ዒዚ ካላዳ ዓሳ ዓጫፓ ኬሰኪ ካኣራኔይዳ ዴዔኔ፤ ዒዚ ዒኢካ ዓኣንቴ ዓዴ ሃይቃዛ ካኣራኔ ዓጮይዳፓ ኬሲ ሃሢ ዒንሢ ናንጋ ዓጩሎ ያኦሲ ዒዛ ዔኪ ሙኬኔ። 5 ያዲ ማዔቶዋ ቶኪ ሄርቃንዳ ቤሲጉዴያታዎ ያኦሲ ዒዛሞ ዒንገባኣሴ፤ ጋዓንቴ ሃኖ ዓጩሎ ዒዛና ዒዛኮ ፃጶናሞ ሃጊ ዓጪ ማሂ ዒዛሞ ዒንጋንዳሢ ጫኣቄኔ፤ ዩኖ ያኦሲ ዒዛሞ ጫኣቄሢ ዓብራሃሜኮ ሃጊ ናይ ባኣንቴኬ። 6 ዜርፃ ዒዛኮ ዓሲ ዓጪዳ ዒገንቴሢና ዳውሰንቴ ናንጋንዳሢ ሃሃ ዩኖ ዓጩይዳ ያይዶ ጌኤታ ሌዔ ዓሳ ዔያቶ ዓይሌ ማሂ ማታሲ ዋይሃንዳሢ ዒዛሞ ኬኤዜኔ።

7 ሃሃ ሩይሌ ማሂ ዋይሃ ዴሮ ታኣኒ ፑርታና ዋጋንዳኔ፤ ዩካፓ ዔያታ ዓይሎማፓ ኬሰኪ ሃኖ ቤዞይዳ ታና ካኣሽካንዳኔ» ሂዚ ጌዒ

7:3 7:3 ማኢ. ማፃ 12:1። 7:4 7:4 ማኢ. ማፃ 11:31፤ 12:4። 7:5 7:5 ማኢ. ማፃ 12:7፤ 13:15፤ 15:18፤ 17:8። 7:6 7:6 ማኢ. ማፃ 15:13-14።

ጾአሲ ከኤዜኔ። 8 ቃሳዖ ሃሣ ዓቲንቶ ቤርቶ ቲቂዖ ዎጎዎ ዒንገኔ።
ዬያሮ ዓብራሃሜ ዩሳኣቄ ሾዔሰካፓ ሳላሳ ኬሎና ዓቲንቶ ቤርቶ
ዒዛኮ ቲቄኔ፤ ዩሳኣቄ ያይቆኦቤ ሾዔኔ፣ ያይቆኦቤያ ዲማ ዲማ
ዒሰራዔኤሌ ፃጸኮ ዓደንሢ ማዔ ታጾ ላምዖ ናኣቶ ሾዔኔ።

9 «ያይቆኦቤኮ ናኣታ ዔያቶኮ ገርሲ ዮሴፔ ቂኢሪ ገብፃ ዓጮ
ዓይሌ ማዓንዳጉዲ ሻንቹኔ። ጾአሲ ጋዓንቲ ዒዛና ዎላ ማዔኔ፤

10 ሜቶ ቢያሢዳፓኣ ዒዛ ከሴኔ፤ ሃሣ ገብፃ ካኣቲ ቤርቶይዳ
ቦንቹንቲና ዔራቶና ዒዛም ዓንገኔ፤ ካኣቲያ ገብፃ ዓጮ ቢያና
ፔ ማኣርናይዳ ሱኡገ ዒዛ ማሂኔ። 11 ዬኖ ዎደና ገብፃ ዓጮና
ካኣና፤ ዓጮናይዳ ቢያ ዴኤፒ ሜቶ ማዜ ከሊንኮ ሉማ ዔቄኔ፤
ዓደንሢያ ኦኡኮ ሙኡዚ ዴንቃኒ ዳንዳዒባኣሴ። 12 ያይቆኦቤ
ገብፃ ዓጮይዳ ሃኣኮ ዓኣሢ ዎይዛዖ ኦ ዓደንሢ ቤርታሲ ዒኢካ
ዳከኔ። 13 ላሚያ ማዒ ዔያታ ገብፃ ዓኣጴ ዎደና ዮሴፔ ፔኤኮ
ገርሲንሢም ፔና ፔጋሲ ከኤዜ ዔርቲኔ፤ ዒማና ማኣሮ ዓሳኣ ዒዛኮ
ካኣቲና ዔርቲኔ። 14 ዬካፓ ዮሴፔ ፔኤኮ ዓደ ያይቆኦቤና ዒጊኖ
ቢያ ፔ ኮራ ዔኪ ሙከኔ፤ ዬያታ ዎሊ ዑፃ ጉቤ ላንካይታሚ ደንጎ
ዓሲከ። 15 ዬያሮ ያይቆኦቤ ገብፃ ዓጮ ዓኣዲ ናንጊ ዒዛንታ ኦ
ዓደንሢንታ ዒኢካ ሃይቄኔ። 16 ዔያቶኮ ሌዛ ሴኬሜ ዓጮ ዔኪ
ዓኣዲንቲ፣ ዓብራሃሜ፡- ሴኬሜይዳ ዔሞሬ ናኣቶይዳፓ ፔ ሚኢሾና
ሻንቄ ዲኡፖ ካያ ዲኡቲኔ።

17 «ጾአሲ ዓብራሃሜም ጮኣቄ ዒንገ ሃጊ ማዓንዳ ዎዛ ኩማንዳ
ዎዳ ዑካዛ ገብፃይዳ ዓኣ ኦ ዴሮኮ ፓይዳ ሚርጊ ሚርጊ ዓኣጴኔ።
18 ዬካፓ ሜሌ ካኣቲ ዮሴፔ ዔሩዋያ ገብፃይዳ ካኣታጴኔ። 19 ዬይ
ዓኮ ካኣታሢ ኦ ዴሮ ዑጾይዳ ገኔ ማሊሢና ዔቄ ዬያ ዓሰኮ ናኣታ
ሃይቃንዳጉዲ ሃሣ ከኤሪንታንዳጉዲ ኦኡኮ ዓደንሢ ዎልቄና ዒዚ
ኮሺ ሜታሴኔ። 20 ዬኖ ዎደና ሙሴ ሾይንቲኔ፤ ዒዚያ ሚርገ ሚዛጲ
ናይከ፤ ሃሣ ሃይሃ ዓጊኒያ ፔ ዓደ ማኣራ ዴዒ ዲጩኔ። 21 ዬካፓ
ዒዚ ከኤሪንቲንቲ ገብፃ ካኣቲኮ ናይሰከና ዒዛ ዔኪ ፔ ናይ ማሂ
ዲቹኔ። 22 ዬያይዴም ሙሴ ገብፃ ዓሰ ዔራቶ ቢያ ዔሬኔ፤ ገሰታ

7:7 7:7 ከሲ. ማፃ 3:12። 7:8 7:8 ማዢ. ማፃ 17:10-14፤ 21:2-4፤ 25:26፤
29:31—35:18። 7:9 7:9 ማዢ. ማፃ 37:11፤ 28፤ 39:2፤ 21። 7:10 7:10
ማዢ. ማፃ 41:39-41። 7:11 7:11 ማዢ. ማፃ 42:1-2። 7:13 7:13 ማዢ.
ማፃ 45:1፤ 16። 7:14 7:14 ማዢ. ማፃ 45:9-10፤ 17-18፤ 46:27። 7:15 7:15
ማዢ. ማፃ 46:1-7፤ 49:33። 7:16 7:16 ማዢ. ማፃ 23:3-16፤ 33:19፤ 50:7-13፤
ዒያ. 24:32። 7:18 7:18 ከሲ. ማፃ 1:7-8። 7:19 7:19 ከሲ. ማፃ 1:1-11፤
22። 7:20 7:20 ከሲ. ማፃ 2:2። 7:21 7:21 ከሲ. ማፃ 2:3-10።

ጌኤዞና ማዳ ማዳና ቢያ ደዲ ዓሲ ማዕኔ።

23 «ሙሴኮ ሌዓ ያይዲታሚ ኩሜ ዎደና ፔኤኮ ጌርሲንሢ ጌይፃ ዒሰራዔኤሌ ናኣቶ ዛጋጊ ማሌኔ። 24 ዛጎሮ ዒ ሙካንቴ ዒዛኮ ዒጊኖይዳፓ ፔቴሰኬያ ፔቴ ጊብፃ ዓጪ ዓሲሰኬይ ጳርቂ ሂዓንቴ ዴንቃፃ ዩያ ዒጊናሢ ዒ ማኣዴኔ፤ ዩያ ጳርቂንቴ ዓሢ ዛሎዎ ኮሜ ዔካጊ ጊብፃ ዓጪ ዓሢ ጳርቂ ጳዴኔ። 25 ዒዛ ዛሎና ያኦሲ ዔያቶ ዓይሉማፓ ኬሳንዳሢ ዒጊና ዒዛኮ ዔራንዳያ ዒዛም ማሌኔ፤ ጋዓንቴ ዔያታ ዩያ ዒና ዔኪ ዔሪባኣሴ። 26 ዚሮ ጉቴሎ ላምፃ ዒሰራዔኤሌ ዓሲ ዎላ ዑራዳንቴ ዴንቃፃ ዔያቶ ላኣጋጊ ኮዒ <ዒንሢ ሃይ ዓሳ! ዒንሢ ዎሊኮ ጌርሲንሢኬ፤ ዓይጎሮ ዒንሢ ዎላ ዑራዳይ?> ጌዔኔ። 27 ዩይ ፔ ላጋሢ ጳርቂ ዓሢሢ ሙሴ ሴካ ሂዓፃ ኔና ኑ ዑፃ ዎይሣያና ዎጋያ ማሃሢ ዎናዳይ? 28 ዚጊኖ ኔ ጊብፃ ዓሢ ዎዳ ጎይፃ ታናኣ ኔ ዎዳጊ ኮዓ?> ጌዔኔ። 29 ሙሴ ዩያ ዎይዛፃ ጊብፃ ዓጪፓ ፑጊንቴ ሚዲያሜ ጌይንታ ዓጪ ዓኣዲ ዒኢካ ናንጊ፡ ላምፃ ዓቲንቄ ናይያ ሸዔኔ።

30 «ሙሴ ዒዛ ዓጪይዳ ያይዲታሚ ሌዔ ዓኣሢሰካፓ ሲና ጌይንታ ዲኮ ኮራ ዓኣ ቦኦሎይዳ ካዮ ባኣካ ዔኤታ ታሚና ያኦሲ ኪኢታንቻ ዒዛም ጳዴኔ። 31 ሙሴ ዩያ ዛጌ ዎደና ዲቃቴ ሄርሻፃ፡ ባንሢ ዑኪ ዛጋንቴ ሂዚ ጋዓ ዑኡሲ ዎይዚንቴኔ፤ 32 ታኣኒ ኔ ዓደንሢ ዓብራሃሜ ያኦሲ፡ ዩሳኣቄ ያኦሲ፡ ያይቆኦቤ ያኦሲኬ፡ ጋዓዛ፡ ሙሴ ዒማና ዒጊጪ ጎጋይቄኔ፤ ዛጋጊያ ጫርቂባኣሴ። 33 ያኦሲ ዒዛም ጋዓንቴ ኔ ዔቄ ቤዛ ጌኤሺ ሳዓታሢሮ ቶካፓ ዲርዘ ኔኤኮ ኬሴ፤ 34 ጊብፃ ዓጪይዳ ዓኣ ታ ዴሮኮ ዴኤፖ ሜቶ ጎኔና ታ ዛጌኔ፤ ዎኣዩንቶ ዒላቶዎ ታ ዔያቶኮ ዎይዜኔ፤ ዩያሮ ታ ዔያቶ ዓውሳጊ ኬዳሢሮ ሃሢ ኔ ሃጊ ዩዔ፡ ታ ኔና ጊብፃ ዓጪ ማሃ ዳካንዳኔ፡ ጌዔኔ።

35 «ዒሰራዔኤሌ ዴራ ሙሴ ኮራ ኔና ኑ ዑፃ ዎይሣያና ዎጋያና ማሃሢ ዎናዳይ?> ጌዒ ቤርታ ዒዛ ማኬያ ማዕቶዎ ያኦሲ ጋዓንቴ ዩያ ሙሴም ካዮ ባኣካ ጳዴ ኪኢታንቻሢ ዛሎና ዎይሣያና ዎጋያና ማሃ ዔያቶ ባንሢ ዳኬኔ። 36 ጊብፃ ዓጪና ዙቄ ባዘናይዳ ዲቃሢ ባኣዚና ያኦሲ ዎልቄና ማዲንታ ዓኪ ባኣዚና ማዲ ዴሮ ዓይሉማፓ ኬሴ፡ ዓሲ ናንጉዎ ዳውሎይዳ ያይዲታሚ ሌዔ ጉቤ ዔኪ ሃንቴሢ ዩያ ሙሴኬ። 37 ያኦሲ ታና ዔቄሴሢጉዲ ዒንሢኮ ዒሸንሢ ባኣካፓ ያኦሲ ማላሢ ኬኤዛ ዓሲ ዒንሢም

7:23 7:23 ኬሲ. ማፃ 2:11-15። 7:29 7:29 ኬሲ. ማፃ 18:3-4። 7:34 7:34 ኬሲ. ማፃ 2:14። 7:36 7:36 ኬሲ. ማፃ 7:5፤ 14:21፤ ፓይ. ማፃ 14:33።

ዔቁሳንዳኔ፤ ጌረ ዒሰራዔኤሌ ዳሮም ኬኤዘሢያ ዬያ ሙሴኬ።
38 ዓሲ ናንጉዎ ዳውሎይዳ ቡኪንቴ ዳሮና ዎላ ሃሃ ሲና ደኩይዳ
ጌሰቴ ኪኢታንቻሢና ዬያጉዲ ኑ ዓደንሢና ዎላ ማዔሢያ ዒዛኬ፤
ጆኦሲኮዎ ናንጎ ቃኦሎ ኑም ዳኪ ሄሊሴሢያ ዬያ ሙሴኬ።

39 «ኑ ዓደንሢ ጋዓንቴ ዒዛ ማማኬያፓዓቴም ዒዛም
ዓይሢንጉባኦሴ፤ ዒኖና ዔያታ ጊብፄ ዓጮ ማዓኒ ማሌኔ። 40 ዓኦሮኔ
ኮራ ዔያታ ላይ ጊብፄ ዓጮፓ ኑና ኬሴ ሙሴ ዎዎይቴቴያ ኑ
ዔሩዎሴ፤ ዬያሮ ኦኦኮ ቤርታ ቤርታ ዓኦዲ ኑና ዔኪ ዓኦዲንዳያ
ካኦሽኮንደ ባኦዚ ኑም ማዜ፤ ጌዔኔ። 41 ዒማና ዔያታ ናኦሪ ማላያ
ካኦሽኮንደ ባኦዚ ማዜ ዒንጎ ባኦዚያ ዬያም ዒንጌኔ፤ ዔያታ ፔ
ኩጮና ማዜ ባኮናኦ ዎዛዳኔ። 42 ጆኦሲ ጋዓንቴ ዔያቶይዳፓ
ደማዳኔ፤ ጮሪንጮ ዠኦጋሢ ዔያታ ካኦሽካንዳጉዲ ዔያቶ ማሄኔ።
ዬይያ፡- ጆኦሲ ማሊያ ኬኤዛ ዓሶ ዛሎና

ዒንሢ ዒሰራዔኤሌ ዓሳ!

ዓሲ ናንጉዎ ዳውሎይዳ ዒንሢ ሹኬ ቆልሞንታ
ጆይዲታሚ ሌዔ ጉቤ ዒንሢ ዒንጌ ዒንጊፃ ታኦምዳ?

43 ዔኪ ዒንሢ ዳንዳሢ ዒንሢ ካኦሽካ
ሞሎኬኮ ዓፒሎ ማኦሮንታ
ሬፓኔ ጌይንታ ዒንሢ ጆኦዛሢኮ ዠኦጎ ማላ ባኮንታኬ።
ዬያቶ ዒንሢ፡- ዒንሢ ኩቻ ማዜ
ዬያቶም ዒንሢ ዚጋ ዒንሢኮ ካኦሽኮ ጆኦዛኬ።

ታኦኒያ ባብሎኔ ዓጮፓ ዒንሢ ዳኪንቴ ዳንዳንዳጉዲ ማሃንዳኔ
ጌይንቴ ጆኦፒንቴሢ ጉዳያኬ።

44 «ኑ ዓደንሢኮ ዓሲ ናንጉዎ ዳውሎይዳ ዓፒላና ማዜንጉቴ
ጆኦሲ ካኦሽኪንታ ማኦሪ ዓኦኔ፤ ዬኖ ዓፒሎና ማዠና ማኦሮ ጆኦሲ
ዒዛ ዓይሢ ጎይያና ሃሃ ዳዌ ጎይያና ማዜሢያ ሙሴኬ። 45 ጆኦሲ
ዔያቶኮ ቤርታፓ ዳውሴ ሜሌ ዳሮ ዓጮ ዔያታ ዳካሌ ዎደና ኑ
ዓሶንሢ ዬኖ ዔያታ ዔኬ ዓፒሎና ማዜንጉቴ ማኦራሎ ዒያሶና ዎላ
ዒዞ ቤዞ ጌልዜኔ፤ ዳንዲ ዳውቴ ዎደ ሄላንዳኦና ዬና ዒኦኦኦ።
46 ዳውቴያ ጆኦሲ ዒዛ ቦንቼሢሮ ያይቆኦቤ ዜርያ ባኦካ ጆኦዛሢ

7:37 7:37 ላሚ. ዎማ 8:15፤ 18። 7:38 7:38 ኬሲ. ማፃ 19:1—20:17፤ ላሚ.
ዎማ 5:1-33። 7:40 7:40 ኬሲ. ማፃ 32:1። 7:41 7:41 ኬሲ. ማፃ 32:2-6።
7:42 7:42 ዓዎ. 5:25-27። 7:44 7:44 ኬሲ. ማፃ 25:9፤ 40። 7:45 7:45
ዓዲ. 3:14-17።

ዋርቃንዳ ማኣሪ ማዣኒ ያኦሲ ሺኢቄኔ። 47 ጋዓንቴ ዬኖ ማኣሪ ያኦሲም ማዣኒሢ ሲሎሞኔኩ።

48 «ያዲ ማዔቶዋ ደኤፖ ያኦዛሢ ዓሲ ኩቸና ማዣኒጉቴ ማኣሪዳ ናንጉዋሴ፤ ዬይያ፡- ያኦሲ ማሊያ ከኤዛሢ ዛሎና

49 ጫሪንጫ ታኣኮ ዴያ ያይቶኩ፤

ሳዓ ታኣኮ ቶካ ሄርቃ ቤዘኩ፤

ሂዳያ ታኣም ዒንሢ ዋዚጉዴ ማኣሪ ማዣንዳይ?

ታ ዴዒ ሃውሻንዳ ቤዛ ዋዚጉዴያዳይ?

50 ዬያ ቢያ ታኣኒ ታ ኩጮና ኮሺሢቱዓዳ?

ያኦሲ ሂዚ ጋዓኔ ገዒ ያኣፔሢጉዴያኩ።

51 «ዒንሢ ባቃኖ ዴይሄ፡ ፑርቶ ዓሳ! ዒና ዒንሢኮ ዔኩዋያ፤ ዋያኣ ዒንሢኮ ዋይዙዋያ፡ ዒንሢኮ ዓድንሢጉዴ ዒንሢያ ቢያ ዋዴና ዓያኖ ጌኤዙ ማካኔ። 52 ዒንሢኮ ዓድንሢ ዒዲ ዳውሲ ባኣያ ያኦሲ ማሊያ ከኤዛ ዓሶይዳፓ ያናዳይ? ዔያታ ጌኤዣሢኮ ሙኪያ ቤርታዲ ከኤዜዘንሢኮ ታዎ ዋዴኔ፤ ዒንሢያ ሃሢ ዬያ ጌኤዣሢ ዓኣሢ ዒንጊ ዋዴኔ። 53 ዒንሢ፡- ከኢታንቾ ዛሎና ያኦሲ ዋጎ ዔኬኔ፤ ጋዓንቴ ዒንሢ ዬያ ካፒባኣሴ።»

ዒሰዲፓኖሴኮ ሹጮና ዲይንቴ ሃይቁያ

54 ዋጎ ዋጋ ዓሳ ዬያ ዋይዜ ዋዶና ዒናፓ ኮሺ ዳጋዴኔ፤ ዒሰዲፓኖሴ ዑያይዳኣ ዳጋና ሃኣሚ ዳዔኔ። 55 ዒዚ ጋዓንቴ ዓያና ጌኤሺኮ ዋልቆ ጋር ጌሊ ጫሪንጫ ባንሢ ጊቸገ ገዒ ዛጋያ፡ ያኦሲኮ ቦንቾ ዴንቄኔ፤ ዬሱሴያ ያኦሲኮ ሚዛቆ ዛሊ ዔቂ ዓኣንቴ ዛጊ፡

56 «ሃይሸ፤ ጫሪንጫ ቡሊንቴ፡ ያኦሲኮ ዋናዒሢ ያኦሲኮ ሚዛቆ ዛሊ ዔቂ ዓኣንቴ ታ ዛጋኔ» ጌዔኔ።

57 ዬማና ዔያታ ዴጊዲ ዒላቴ፡ ዋኖ ጉቤሢ ፔኤኮ ዓርቃያ ፔቱሞና ዒዛ ባንሢ ጳሽኬኔ። 58 ዬካፓ ዔያታ ዒዛ ዓርቂ ካታሞይዳፓ ኬሲ ሹቻ ዴዒ ዋዴኔ፤ ማርኮ ማዔ ዓሶንሢያ ዒሰዲፓኖሴ ዴዓ ዓሶኮ ዓፒሎ ዔኪ ሳውሌ ጌይንታ ፔቱ ዴጌሰኬይ ካፓንዳጉዲ ዒዛ ኮራ ጌሢኔ። 59 ዔያታ ዒዛ ሹጮና ዴዓ ጎይሢ ዓኣንቴ ዒሰዲፓኖሴ፡- «ጎዳ ዬሱሴ! ሹምፓሢ ታኣኮ ዔኬ!» ጌዒ ሸኢቄኔ። 60 ሃሃ ዒ ጉምዓታያ፡- «ጎዳሢየ! ሃያ ዔያቶኮ ማዶ ዳቢንቴ ማሂ ፓይዲፖ!» ጌዒ ዴጊዲ ዒላቴ፡ ሃይቄኔ። ሳውሌያ ዒሰዲፓኖሴ ዋዶናሢ ቃራኬ ጌዔኔ።

7:46 7:46 2ሳሙ. 7:1-16፤ 1ዎኦሲ. ዓሃኬ 17:1-14። 7:47 7:47 1ካኣቶ. ማ 6:1-38፤ 2ዎኦሲ. ዓሃኬ 3:1-17። 7:49 7:49 ዒሲ. 66:1-2። 7:51 7:51 ዒሲ. 63:10።

8

ሳውሌኮ ሺኢዲያ ማኣሮ ዓሶ ዳውሲያ

1 ዒሰዲፓሮሴ ሃይቄ ከሎና ዩሩሳላሜይዳ ዓኣ ሺኢዲያ ማኣሮ ዓሶይዳ ዴኤፒ ዳውሲሢ ዒቄኔ፤ ያኦሲ ማዶም ዳከንቴዞንሢኮ ማኣሮ ዓሶ ዓሶ ሃንጎ ያኦሲ ጉሙርቃ ዓሶ ቢያ ዩሁዳ ዓጮና ሳማሪያ ዓጮና ባንሢ ላኣሊንቲ ዴንዴኔ። 2 ያኦሲ ዶዲ ካኣሸካ፣ ፔቴ ፔቴ ዓሶ ዒሰዲፓሮሴ ዴኤኮኔ፤ ሃሣ ዒናፓ ማዔ ዴኤፒ ዩኤፒያ ዩኤኮኔ።

3 ሳውሌ ጋዓንቴ ዩና ዎዶና ሺኢዲያ ማኣሮ ዓሶ ባይዛሊ ሚርጌ ካራ ኮዓኔ፤ ዓሶኮዎ ማኣሮ ቢያ ጌሊ ጌሊ ኪሪሰቶሴ ጉሙርቃ ዓሶ ዓቲንቆና ላኣሎና ጎቲ ጎቲ ኬሲ፣ ቱኡሲ ማኣሪዳ ቱከሳኔ።

ኮዦ ሃይሳ ሳማሪያይዳ ኬኤዚንቴሢ

4 ዶማ ዶማ ቤዞ ላኣሊንቲ ዓኣዴ ኪሪሰቶሴ ጉሙርቃ ዓሶ ቢያ ቤዞይዳ ያኦሲኮ ቃኣሎ ኬኤኮኔ፤ 5 ፒልጶሴያ ሳማሪያኮ ፑኡፖ ካታዎ ዴንዲ ሚሲሃ ዛሎ ዓሶም ኬኤኮኔ። 6 ዓሶ ፒልጶሴኮ ቃኣሎ ዎይዛያ ሃሣ ዒ ማዶ ያኦሲ ዎልቆና ማዶንታ ዓኮ ባኮዎ ዛጋያ ፔቴዎና ዒዚ ጋዓ ባኮ ኮሺ ዎይዛኔ። 7 ፑርቶ ዓያናኣ ዴጊዲ ዒላቲ ዒላቲ ሚርጌ ዓሶይዳፓ ኬሰካኔ፤ ሃሣ ሚርጌ ሃንታኒ ዳንደዑዎዎ ቦሶ ዓሲና ፒዜ ሃንቱዎ ዎሶ ዓሲያ ዳቄኔ። 8 ዩያሮ ዩና ካታዎይዳ ዴኤፒ ዎዛ ማዔኔ።

9 ዩና ካታሜሎይዳ ሲሞኦኔ ጌይንታ ፔቴ ዓሲ ዓኣኔ፤ ዩይ ዓሢ ካታዎይዳ ዦዎቶና ዓኪ ባኣዚ ማዶ ማዶ ሳማሪያ ዓጮይዳ ሄርሺ ዲቃቲንታያ ማዒና ጎንጎ፤ ሃሣ «ታኣኒ ዴኤፒ ዓሲኮ!» ጌዒ ጌዒ ፔና ኬኤዛኔ። 10 ዓሶ ዳኮንታ ዴኤፓንታ ቢያ፡- «ሃይ ዓሢ ዴኤፒ ጌይንቲ ዔኤሊንታ ያኦሲ ዎልቃሢኮ!» ጌዒ ጌዒ ዒዛሲ ዎይዛኔ። 11 ዔያታ ዒዛሲ ዎይዛሢ ሚርጌ ዎይይዳፓ ዓርቃያ ዦዎቶና ዓኪ ባኣዚ ማዶሢና ዔያቶ ዲቃሢ ሄርሺሳሢሮኮ። 12 ጋዓንቴ ፒልጶሴ ያኦሲ ካኣቱዎ ዛሎና ዩሱሰ ኪሪሰቶሴ ዛሎና ኬኤኮ ኮዦ ሃይሶ ጎናሲ ዔኪ ዓቲንቆንታ ላኣሎንታ ዎኣያና ማሰቲኔ። 13 ሲሞኦኔያ ዓቱዎዎ ኪሪሰቶሴ ጉሙርቄ ዎኣያና ማሰቲ ፒልጶሴና ዎላ ፔቴ ማዔኔ፤ ሃሣ ዒዚ ያኦሲ ዎልቆና ማዶንታ ዓኮ ባኮንታ ማላቶንታ ዛጊ ዛጊ ዲቃቲ ሄርሻኔ።

14 ዩሩሳላሜይዳ ዓኣ ዳከንቴዞንሢኮ ሳማሪያ ዓጮ ዓሶ ያኦሲ ቃኣሎ ጎናሲ ዔኮሢ ዎይዛያ ጳዒሮሴና ዮሃኒሴና ሳማሪያ ዓጮ ዳኮኔ። 15 ዩያሮ ሳማሪያ ዓጮ ዓሶ ዓያና ጌኤሺ ዔካንዳፑዲ ጳዒሮሴና ዮሃኒሴና ዓኣዲ ዔያቶም ሺኢቄኔ። 16 ዓይጎሮ ጌዔቶ

8:3 8:3 ዳኪ. ማዶ 22:4-5፤ 26:9-11።

ሳማሪያ ዓጮ ዓሳ ጎዳ ዩሱሴ ሱንጾና ዋኦያ ማሰቴያጋዓቴም ዓያና ጌኤሺ ሃገ ፔቴ ዓሲዳታዎ ከዲባኦሴ። 17 ዩያር ጳጳርሴና ዮሃንሴና ዔያቶ ዑፃ ኩጮ ጌሃዛ ዓሳ ዓያና ጌኤሺ ዔኬኔ።

18 ዳኪንቴዞንሢኮ ፔኤኮ ኩጮ ዓሶ ዑፃ ጌሃዛ ዓያና ጌኤሺ ዓሶም ዒንገንቴሢ ሲሞኦኔ ዛጋዎ ዳኪንቴዞንሢኮ ማዳ ጌኤሺ ዔኬ ሙኪ፡-

19 «ታኦኒያ ኩጮ ጌሃዛ ዓሳ ቢያ ዓያና ጌኤሺ ዔካንዳጉዲ ሃኖ ቢታንቶ ታኦም ዒንጉዋቴራ» ጌዔኔ።

20 ጳጳርሴ ጋዓንቴ ዒዛም፡- «ጾኦሲኮ ዒንገያ ኔኤኒ ማዳሽና ዔካኒ ማላሢሮ ኔናንታ ኔ ማዳሽንታ ዋላ ባይቁዋቴ! 21 ዒና ኔኤኮ ጾኦሲ ቤርቶይዳ ፒዜ ማዳባኦሢሮ ኦ ማዳይዳ ኔኤኮ ቤሲያ ባኦሴ።

22 ዩያር ሃያ ኔኤኮ ፑርቱም ዳቢንቶ ጎማጋ ማዔ፤ ጎጾንቴ ጾኦሲ ኔኤኮ ዒኖ ማሊያ ዓቶም ጋዓንዳቴ ዒዛ ሸኢቁ፤ 23 ዓይጎር ጌዔቶ ኔኤኒ ባይዛ ቁኢሩም ማላሢና ኩሜያ ሃሃ ጎሜና ቱኡቴ ዓሲ ማዔሢ ታ ዛጋኔ» ጌዔኔ።

24 ሲሞኦኔያ፡- «ዒንሢ ሃሢ ጌዔ ባኮይዳጋ ፔቴ ባኦዚታዎ ታና ሄሉዋጉዲ ዒንሢ ዒንሢሮ ጎዳሢ ታኦም ሸኢቁዋቴ» ጌዔኔ።

25 ጳጳርሴና ዮሃንሴና ዩሱሴ ዛሎ ዔራ ባኮ ማርካዲ፡ ጎዳኮዋ ቃኦሎ ከኤዜሰካጋ ማርጌ ሳማሪያ ዓጮ ጉርዶይዳ ኮኩ ሃይሶ ከኤዚ ከኤዚ ዩሩሳላሜ ባንሢ ማዔኔ።

ፒልጶሴና ካኦቶ ማኦራ ማዳ ዒቶጶያ ዓጮ ዓሢና

26 ጾኦሲኮ ኪኢታንቻ ፒልጶሴ ኮራ፡- «ዔቁ ዩሩሳላሜይዳጋ ጋኦዛ ዴንዳ ጎይጾና ሊካ ዴንዴ» ጌዔኔ፤ ዩና ጎይ፡- ዓሲ ናንጉዋ ዳውሌይዳና ዓኦዳያኬ። 27 ዒዚ ዔቁ ዴንዴ። ዒማና ፔቴ ዒቶጶያ

ዓጮኮ ካኦቶ ማኦራ ዓሸቲንቁ ማዳ ዒቶጶያ ዓጮ ዓሲሰኬያ ጾኦሲም ዛገ ካኦሽካኒ ዩሩሳላሜ ዴንዲ ዒኢካ ዓኦኔ፤ ዩይ ዓሢ ሂንዴኬ ጌይንታ ዒቶጶያ ዓጮ ካኦቱሎና ዋላ ቢታንቶ ዓኦያ ማዒ ማዳያ ሃሃ ማዳሽ ዒዛኮ ቢያ ዛገ ዓርቁ ቆላያኬ። 28 ዩይ ዓሢ ጋራሢ ጎቻ ሳርጌሎ ያይቶይዳ ዴዒ ፔ ዓጮ ባንሢ ማዒ ዴንዲቤቃ ጾኦሲ ማሊያ ከኤዛ ዒሲያሴ ማፃኦጉ ናባባኔ። 29 ዩማና ዓያኖ ጌኤዣ ፒልጶሴም፡- «ዴንዲ ሃሴኬ ሳርጌሎ ያይቶ ባንሢ ዑኬ»

ጌዔኔ። 30 ዩያር ፒልጶሴ ጳሽኪ ዩያ ባንሢ ዴንዳዎ ዒቶጶያ ዓጮ ዓሢ ጾኦሲ ማሊያ ከኤዛ ዒሲያሴ ማፃኦጉ ናባባንቴ ዋይዚ፡- «ኔ ናባባሢኮ ቡሊፃ ኔኤም ጌላ?» ጌዒ ጾኦጮኔ።

31 ዒቶጶያ ዓጮ ዓሢ ማሃዎ፡- «ቡሊ ከኤዛ ዓሲ ባኦንቴ ዋዲ ታኦም ጌላንዳይ?» ጋዓዎ፡ ፒልጶሴም፡- «ሳርጌሎ ያይቶይዳ ከሰኪ

ታኦና ዋላ ዳዔ» ጌዔኔ። 32 ዬይ ዒቶጲያ ዓጮ ዴኤፖ ዓሢ ናባባ ማፃኣፓ፡-

«ሹኪንታኒ ዒሺንታ ማራይጉዲ ማዔኔ፤
ዑፃፓ ጋፓኖ ታይዛ ዓሳ ታይዛኦና ዚቲ ጋዓ ማራይጉዲ
ዒዚ ዳንጎ ፔኤሲ ቡሊባኣሴ።

33 ዒዚ ቦሂንቴኔ፤ ፒዜ ዋጌያ ዒዛም ዋጊንቲባኣሴ፤
ሼምፓሢ ዒዛኮ ሳይይዳፓ ባይቄኔ፤
ዒዛኮ ሾይንቶ ዛሎ ያኦኒ ከኤዛኒ ዳንዳዓይ?»

ሂዚ ጋዓ ቤዛከ።

34 ዬይ ካኦቶ ማኣራ ዴኤፒ ዓሲ ማዒ ማዳ ዓሢ ፒልጶሴ ኮራ፡- «ያኦሲ ማሊያ ከኤዛሢ ሃኖ ጌዔሢ ያ ዛላዳይ? ፔ ዛላም? ማሌ ዓሲ ዛላዳይ? ሃዳራ ታኦም ከኤዜ» ጌዔኔ። 35 ፒልጶሴያ ዬኖ ማፃኣፓ ቤዘይዳፓ ዓርቃያ ዬሱሴ ዛሎ ኮዢ ሃይሶ ዒዛም ከኤዜኔ። 36 ዔያታ ዳንዲቤቃ ዋኣሢ ዓኣ ቤሲ ሄላዛ፡ ካኦቶ ማኣራ ማዳ ዴኤፖ ዓሢ ፒልጶሴ ኮራ፡- «ሃይሾ ሃካ ዋኣሢ ዓኣኔ፤ ታኦኒ ማሰቱዋጉዲ ታና ላኣጋሢ ዓይጎዳይ?» ጌዔኔ።

[37 ፒልጶሴያ፡- «ጉቤ ዒናፓ ኔ ጉሙርቄቶ ዋኣፃ ማሰታኒ ዳንዳዓኔ» ዒዛም ጌዔኔ። ካኦቶ ማኣራ ማዳ ዴኤፖ ዓሢያ፡- «ዬሱሴ ኪሪሰቶሴ ያኦሲ ናኣዚ ማዔሢ ታ ጉሙርቃኔ» ጌዔኔ።]*

38 ካኦቶ ማኣራ ማዳ ዴኤፖ ዓሢ ሳርጌሎ ያይቶ ዔቁሴኔ፤ ዬካፓ ላምዓሢ ዋኣያይዳ ኬዳዛ ፒልጶሴ ዬያ ዓሢ ማሰኬኔ።

39 ዋኣያይዳፓ ዔያታ ከሰኬሰካፓ ያኦሲኮ ዓያና ፒልጶሴ ዔኬኔ፤ ካኦቶ ማኣራ ማዳ ዴኤፖ ዓሢ ላሚ ዒዛ ዳንቁባኣሴ። ዒዚያ ዋዛዲ ዋዛዲ ፔኤኮ ጎይያ ዓኣዳኔ። 40 ፒልጶሴ ዒማና ጋዓንቴ ዓዛያሴ ጎያ ቤሲዳ ጶዴኔ፤ ዒዚ ቁሳሪያ ዓጮ ማዒ ሙካንዳያ ሄላንዳኦና ካታም ቢያ ሃንቲ ሃንቲ ኮዢ ሃይሶ ከኤዜኔ።

9

ሳውሌኮ ላኣሚንቶ
(ዳኪ. ማድ 22:6-16፤ 26:12-18)

1 ዒማና ቢያ ዋዔ ሳውሌ ጎዳኮ ጊንፃ ሃንታ ናኣቶ ዳጋና ዋዳኒ ዘርቂ ዘርቂ ናንጊቤቃ ቄኤሶኮ ሱኡጋሢ ኮራ ዓኣዲ። 2 ጎዳኮ ጎይያ ሃንታ ዓሶ ዓቲንቆንታ ላኣሎንታ ዳንቃያ ቱኪ ቱኪ ዬሩሳላሜ ዔኪ ሙኪሳኒ ዳንዳዓ ኪኢታ ዋርቃታ ዳማሰቆይዳ ዓኣ ዓይሁዶ ዓሶኮ

8:33 8:33 ዒሲ. 53:7-8። * 8:37 8:37 ፔቲ ፔቲ ማፃኣፓ፡- ፓይ. 37 ጊዳ ቃሳኔ።

ቡኪንቶ ቤዘ ወይህ ዓሶም ፃኣፒ ዒንጋንዳጉዲ ቄኤሶኮ ሱኡጋህ ምክጩኔ።

3 ዩካፓ ዒዚ ጎይፆ ዴንዲ ዴማሰቆ ካታሞ ሄላኒ ዑካዛ ዒዚ ዒሩዋንቴ ጫሪንጫፓ ዓኣፒዳ ዲካፖዒ ዒዛ ዓጫፖዒ። 4 ዩማና ዒዚ ቶጊ ዓኣዳ ባካፓ ሳዓ ኬዲ ሎኦማፆ፡- «ሳውሌ! ሳውሌ! ኔ ታና ዓይጋ ዳውሳይ?» ጋዓ ዑኡሲ ዋይዜኔ።

5 ሳውሌፆ «ጎዳሂዮ! ኔኤኒ ምናዳይ?» ጌዒኔ፤

ዒዚ ማሃፆ «ኔ ታና ዳውሳ፣ ታኣኒ ዩሱሴኬ፤ * 6 ሃህሂ ዒቁጋፓ ካታሞ ጌሌ፤ ኔ ማዳንዳ ባካ ዒኣካ ኔኤም ከኤዚንታንዳኔ» ጌዒኔ።

7 ሳውሌና ዋላ ዓኣዳ ዓሶንህሂ ዑኡሲ ዋይዘፆ ምናኣ ዴንቃኒ ዳንዳዒባኣሂረ ዒያታ ጎምጎዶ ጎይህ ባይዚ ዚቲዮ ጌዒ ዒቁኔ።

8 ሳውሌ ሳዓፓ ዒቃፆ ዓኣፖ ቡሌ ዋዶና ዓይጎዋ ዴንቃኒ ዳንዳዒባኣሴ፤ ዩያሮ ዓሳ ዒዛኮ ኩጮ ዓርቁ ጎቺ ጎቺ ዴማሰቆ ካታሞ ዒከ ዓኣዳኔ። 9 ዒዚ ዒማና ዓይጎዋ ዴንቃኒ ዳንዳዒባዎ ሃሃ ሙዒ ዑሽኩዋፆ ዴዒኔ።

10 ዴማሰቆይዳ ፔቲ ሃናኒያ ጎፆ ኪሪሰቶሴ ጉሙርቃ ዓሲ ዓኣኔ። ዩያ ዓሂ ጎዳ፡- «ሃናኒያ!» ጌዒ ዒኤላያ ምክሲ ፔጋሲ ዳዋዛ፣ ዒዚ፡- «ዮ፣ ጎዳሂዮ!» ጌዒኔ።

11 ጎዳ ዒዛም፡- «ፒዜ ጎይህ ጌይንታ ጎይፆሎና ዴንዴ፤ ዒኣካ ዩሁዳ ማኣሮይዳ ሳውሌ ጌይንታ ፆርሴሴ ዓጮ ዓሂ ኮዒ፣ ዒዚ ሃህሂ ሽኢጲሂዳኬ» ጌዒኔ። 12 ሳውሌፆ ዒማና ዓኣፓ ዒዛኮ ላሚ ዘጋንዳጉዲ ሃናኒያ ዒዛ ዑፃ ኩጮ ጌሃንቴ ምክሲ ዒዛ ፔጋሲ ዳዋፆ ዘጌኔ።

13 ሃናኒያ ጋዓንቴ ሂዚ ጌዒ ማህኔ፡- «ጎዳሂዮ! ዩይ ዓሂ ዩሩሳላሚይዳ ዓኣ ኔ ዓሶ ዑፆይዳ ሚርጌ ፑርታ ባኣዚ ማዳሂ ሚርጌ ዓሲዳፓ ታ ዋይዜኔ። 14 ሃካኣ ሃሃ ኔና ካኣሽካ ዓሶ ቢያ ቱኡሳኒ ቄኤሶኮ ሱኡጎይዳፓ ቢታንቶ ዒከ ሙከኔ» ጌዒኔ።

15 ጎዳ ሃናኒያም፡- «ዒዚ ታኣኮ ሱንፆ ማሌ ዴርንታ ካኣቶንታም ሃሃ ዒሰራዒኤሌ ዓሶማኣ ዒርዘንዳያ ታኣኮ ዶኦሪንቴ ዓንጋሞ ማዒሂረ ሃህሂ ዒዛ ኮራ ዓኣዳ፤ 16 ታ ዘሎና ዋዚጉዴ ሚርጌ ማቶ ዒ ዒካንዳቲያ ታ ታኣሮ ዒዛም ዒርዘንዳኔ» ሂዚ ጌዒኔ።

17 ዩያሮ ሃናኒያ ዒኣካ ዴንዲ ሳውሌ ዓኣ ማኣሮ ጌሊ፣ ኩጮ ፔኤኮ ሳውሌ ዑፃ ጌሃፆ፡- «ታ ዒሻሂዮ ሳውሌ! ሃይካ ኔ ሙካንቴ

* 9:5 9:5 ፔቲ ፔቲ ማፃኣፓ ሃሮ ቤዘይዳ፡- «ጫጮ ሚፆ ማሃ ዓከፆና ኔኦሮ ኔ ማኣሳና» ጋዓኔ፤ ሃሃ «ሳውሌያ ጎጋይቁ ጎጋይቁ ዓጊቹሞና ዲቃታፆ ሳዳሂዮ! ዓይጎ ታ ኔኤም ማዳንዳጉዲ ኔ ኮዓይ?» ጌዒኔ ጋዓኔ። ዩና፡- ዓይ. 22:10 ጌዳ፤ ሃሃ ዓይ. 26:14ይዳ ፃኣፒንቴ ዓኣኔ።

ጎይፃ ኔኤም ጳዴ ጎዳ ዩሱሴ ዓኣፓ ኔኤኮ ዛጋንዳጉዲና ሃሃሃ ዓያና ጌኤሽ ኩሙሢ ምልቁና ኔጊዳ ማዳንዳጉዲ ማሆም ታና ዳኬኔ» ጋዓዛ። 18 ቤዞማና ቁኡሪ ማላ ባኣዚ ዓኣፓፓ ኬዳዛ ሳውሌ ዛጋንዳንዳዔ፤ ዩካፓ ዔቂ ዒ ሞኣፃ ማሰቴኔ። 19 ሙኡዚያ ሙዒ ዶዲ ዴማሰቆይዳ ዓኣ ኪሪሰቶሴ ጉሙርቃ ዓሶንሢና ሞላ ዳካ ኬሊ ዴዔኔ።

ሳውሌ ዴማሰቆይዳ

20 ዩካፓ ኔጉሞፃ ሳውሌ፡- «ዩሱሴ ፆኦሲ ናይኬ» ጌዒ ጌዒ ዓይሁዶ ዓሶኮ ቡኪንቶ ቤዛ ዔርዚሢሢሢ ሳርቁኔ።

21 ዩያ ሞይዜ ዓሳ ቢያ፡- «ሃይ ዓሢ ዩሩሳላሜይዳ ዩሱሴ ካኣሽካዞንሢ ቢያ ሞዳሢቱዓዳ? ሃይካኣ ዒዚ ሙኬሢሢ ዔያቶ ቱኪ ቱኪ ቁኤሶኮ ሱኡጎ ባንሢ ዔኪ ዓኣዳኒቱዓዳ?» ጌዒ ጌዒ ዲቃቲ ሄርሴኔ።

22 ሳውሌ ጋዓንቴ ፔቶ ዶዲ ዶዲ ዓኣዳኔ፤ ዩሱሴ ሜሲሄ ማዔሢያ ኬኤዚ ኬኤዚ ዴማሰቆይዳ ናንጋ ዓይሁዶ ዓሶኮ ጎፆንዶ ጎይሢ ሳይዜኔ።

23 ሚርጌ ኬሊኮ ጊንፃፓ ዓይሁዶ ዓሳ ሳውሌ ሞዳኒ ዞርቴኔ፤ 24 ዒዚ ጋዓንቴ ዒዛ ሞዳኒ ዔያታ ዞርታሢ ዔሬኔ፤ ዔያታ ዒማና ዒዛ ሞዳኒ ሮኦሮና ሞንቶና ቢያ ካሮ ካሮ ካፓኔ። 25 ጋዓንቴ ዲሚና ሳውሌኮ ጊንፃ ሃንታ ናኣታ ዒዛ ሮኦጩና ዲሮ ዑሣ ዓኣሢ ካታሞ ዙላ ኬይሴኔ።

ሳውሌ ዩሩሳላሜይዳ

26 ሳውሌ ዩሩሳላሜ ዓኣዳፃ ዒኢካ ዓኣ ኪሪሰቶሴ ጉሙርቃዞንሢና ሞላ ማዓኒ ኮዔኔ፤ ዔያታ ጋዓንቴ ዒዛኮ ኪሪሰቶሴ ጉሙርቁፃ ጎኔ ዔያቶም ማሊባኣሢሮ ቢያሢ ዒዛ ዒጊጩኔ። 27 ባርናባሴ ጋዓንቴ ሳውሌ ዔያቶ ኮይላ ሽኢሽፃ ዒዚ ጎይፃ ዓኣንቴ ጎዳ ዒዛም ሞይቲ ጳዴቶ ሃሃሃ ሞማይዲ ዒዛና ጌሰቴቶ፡ ዴማሰቆይዳኣ ዩሱሴ ሱንፆና ሞማይዲ ዒዚ ጫርቂ ማሳ ዔርዚቶም ዔያቶም ኬኤዜኔ። 28 ዩያሮ ሳውሌ ዔያቶና ሞላ ሞዒ ዩሩሳላሜይዳ ሃንቲ ሃንቲ ጎዳ ሱንፆና ጫርቂ ኬኤዜኔ፤ 29 ጌሪኬ ዓጮ ሙኡጮ ጌሰታ ዓይሁዶ ዓሶና ሞላ ጌሰቲ ማርማዛ፡ ዔያታ ጋዓንቴ ዒዛ ሞዳኒ ማሌኔ። 30 ኪሪሰቶሴ ጉሙርቃዞንሢያ ዩያ ዔራፃ ቁሳሪያ ዓጮ ዒዛ ዔኪ ዓኣዳ ዩካፓ ያርሴሴ ዓጮ ዓኣዳንዳጉዲ ዳኬኔ።

9:23 9:23 2ቆሮ. 11:32-33።

31 ዲማና ዪሁዳ ዓጫ፥ ጌሊላና ሳማሪያ ዓጮናይዳ ቢያ ዓኣ ሺኢጲያ ማኣሮ ዓሳ ሃውሾ ዴንቂ ዶዴኔ፤ ሃሣ ጎዳ ቦንቺ ቦንቺ ዓያና ጌኤሺናኣ ዶዳ ዶዳ ፓይዶና ማርጌኔ።

ጳዊርሴ ሊዳና ዲዮጴ ጌይንታ ዓጮናይዳ

32 ጳዊርሴ ዓጮ ሃንቲቤቃ፥ ሊዳይዳ ናንጋ ኪሪሰቶሴ ጉሙርቃዞንሣ ኮራ ዓኣጳኔ። 33 ዲኢካ ዲዚ ሳሊ ለዔ ጉቤ ላሂ ናንጋ ዓኒያ ጌይንታ ዋቦ ዓሲ ዴንቄ። 34 ጳዊርሴ ዬያ ዓሢ፡- «ዓኒያ! ዬሱሰ ኪሪሰቶሴ ኔና ፓሣንዳኔ፤ ዔቂ ኔኤኮ ዜዶ ማሄ» ጋዓዛ፥ ዓዚ ኔጉዋያ ዔቂ። 35 ሊዳና ሳሮናሜ ጌይንታ ዓጮናይዳ ናንጋ ዓሳ ቢያ ዬያ ዛጋያ ጎዳ ጉሙርቄ።

36 ዲማና ዲዮጴ ዓጮይዳ ፃቢታ ጌይንታ ፔቴ ኪሪሰቶሴ ጉሙርቃሰከና ዓኣኔ፤ ዓዚ ሱንጾኮ ቡሊፃ ጌሪከ ሙኡቺና «ዶርቃ» ጌይሢ ማዓዛ ዬና ጌይፃ «ጌንጾ» ጌይሢኬ፤ ዓዚ ኮሺ ባኣዚ ማዳሢና ሃሣ ጌንሣ ማንቆ ዓሶም ማርጌና ዔኤቢ ዲንገሢና ዔርቲ ላኣሊኬ። 37 ዲማና ዲዛ ሃይቄም፥ ዓሳ ዓዚ ሱኡዳ ማሰካጾ ሹጮና ማዠና ማኣሮ ዑፃ ዓኣ ቤዘይዳ ኬሲ ላይሢ። 38 ሊዳ ጌይንታ ቤዘላ ዲዮጴኮ ዑኬ ማዔያታሢሮ ዲዮጴይዳ ዓኣ ኪሪሰቶሴ ጉሙርቃ ዓሳ ጳዊርሴ ሊዳይዳ ዓኣሢ ዋይዚ፡- «ኔጉዋያ ዑኬ ኑ ኮራ ሙኬ» ጌዲ ዲዛም ከኢታ ላምጾ ዓሲ ዳኬኔ። 39 ዬያሮ ጳዊርሴ ዔኤሊያ ሙኬዞንሢና ዋላ ሙኬኔ፤ ዲኢካ ዲዚ ሃላዛ ሹጮና ማዠና ማኣሮ ዑፃ ዓኣ ቤዘ ዔያታ ዲዛ ዔኪ ኬሴኔ፤ ዬማና ዓኒንሢ ሃይቄ ላኣላ ቢያ ዲዛኮ ዓጫ ዔቃጾ ዬኤኪ ዬኤኪ ዶርቃ ዔያቶና ዋላ ሹምፔና ዓኣጾ ሲኬ ማኣዓሢንታ ዓፒሎዋ ዳዊ ዳዊ ቤኤዚንታኔ። 40 ጳዊርሴ ጋዓንቲ ቢያሢ ካሮ ባንሢ ኬሲጋፓ ጉምዓቲ ሺኢቃጾ ሌዞ ባንሢ ዛጌ፡- «ፃቢታ ዔቂ!» ጋዓዛ፥ ዲዛ ዓኣፖ ቡሌኔ፤ ዲዛኣ ሃሣ ዲዛ ዴንቃጾ ዔቂ ዴዔኔ። 41 ዲዚ ዲዛኮ ኩጮ ዓርቂ ዔቂሳጾ፥ ዓኒንሢ ሃይቄ ላኣሎንታ ኪሪሰቶሴ ጉሙርቃ ዓሶንታ ዔኤሊ ዳቂሺ ዲዛ ዔያቶ ቤርታ ዔቂሴኔ። 42 ዬይ ባካ ዲዮጴ ዓጮይዳ ቢያ ዔርቲሢሮ ማርጌ ዓሳ ጎዳ ጉሙርቄ። 43 ጳዊርሴ ዲማና ሲምኦኔ ጌይንታ ጎሮ ጉኡ ዓሳሲሰኬያና ዋላ ማርጌ ከሊ ዲዮጴይዳ ዴዔኔ።

10

ጳዊርሴና ቆርኔሌዎሴና

1 ቂሳሪያ ዓጮይዳ ናንጋ ቆርኔሌዎሴ ጌይንታ ፔቴ ዓሲ ዓኣኔ፤ ዲዚያ «ዲፃሊያ ፖኦሊሶ» ጌይንታ ፖኦሊሶኮ ጸኤቶ ዓሶ ዓይሣ ሱኡጌኬ፤ 2 ዲዚ ፔ ማኣሮ ዓሶና ዋላ ዓይሁዶ ዋጎ ጎይጾ ጾኦሲ

ካአሽካያና ዓጊጫያ፣ ማንቆ ዓሶዋ ሚርጌና ማኣዲያ ሃሣ ያኦሲ ቢያ ዋዴ ሺኢቃያኩ።³ ፔቴ ኬሊ ማሢ ደንቦልሳ ዋዴ ጉዴያ ማዓኣና ያኦሲኮ ከኢታንቻ ዒዛ ኮራ ጌሊ፡- «ቆርኔሌዎሴ!» ጌራ ዒዛ ዔኤላያ ያኦሲ ዒዛዎ ፔጋሲ ዳዌኔ።

⁴ ዒዚ ገዥ ጌራ ከኢታንቻሢ ባንሢ ዛጋያ ዲቃቲሢና፡- «ጎዳሢያ! ዓይጎዳይ?» ጋዓዛ፣ ከኢታንቻሢ ዒዛዎ፡- «ኔኤኮ ሺኢጲያና ማንቆ ዓሶ ኔ ማኣዲ ማኣዲያ ያኦሲ ቤርታ ጴዳኔ፤⁵ ሃሢ ኔ ኮራፓ ዓሲ ዒዮጴ ዓጮ ዳኪጋፓ ጴዳርሴ ጌይንታ ሲሞኦኔ ዔኤሊሴ፤⁶ ዒዚ ሃሢ ባዞ ዓጮይዳ ዓኣ፣ ጎር ጉኡዓ ሲሞኦኔ ማኣራ ሸኦቹዎይዳ ዓኣኔ» ጌዔኔ።⁷ ዬያ ዒዛዎ ከኤዜ ከኢታንቻሢ ዒዛይዳፓ ዲማዲ ዓኣዳዛ ቆርኔሌዎሴ ዒዛዎ ላምያ ማዶ ማዳሰከንሢና ጉሙርቁንቲ ማዳ ፔቴ ያኦሲ ጉሙርቃ ፖኦሊሴሰኬያ ዔኤሊ፡⁸ ማዔ ባኮ ቢያ ዔያቶም ከኤዜሢኮ ጊንፃ ዒዮጴ ዓጮ ዳኩኔ።

⁹ ዚሬሎ ዔያታ ዓኣዲ ካታሞኮ ዑካኣና ዓባ ሳዛ ሄሌም ጴዳርሴ ዒዚ ቤርታ ሺኢቃ ሹጮና ማዦና ማኣርኮ ዑያ ከሰከኔ።¹⁰ ዬማና ዒዛ ናይዴም ሙኡዚ ሙዓኒ ኮዔኔ፤ ሮኦሪ ሙዎ ሙዓ ዒዛዎ ጌኢጊንታ ጎይሢ ዓኣንቴ ያኦሲ ዒዛዎ ፔጋሲ ዳዋ ባኣዚ ዒዚ ዛጌኔ።¹¹ ዬና ዒዛ ዛጌ ባከላ ያዲኩ፡- ጫሪንጫ ቡሊንቴም ያይዶ ዛላ ዓርቁንቴ ዓፒላ ማላ ባኣዚ ሳያ ከዴኔ።¹² ዬኖ ጊደይዳ ዲማ ዲማ ዳካንታ ጴኤፒ ቦያንታ ሃሢ ካፒያኣ ዓኣኔ።¹³ ዓካሪ ዒማና፡- «ጴዳርሴ! ዔቁ ሃያ ሹኪ ሹኪ ሙዔ» ጋዓ ዑኡሲ ዒዛዎ ዋይዚንቴኔ።

¹⁴ ጴዳርሴ ጋዓንቴ፡- «ጎዳሢያ፣ ዬይ ማዓዓኩ! ሙዒንቴዎ ቁፄ ማዔ፣ ዒኢቲ ባኣዚ ሙዒ ታ ቤቁባኣሴ» ጌዔኔ።

¹⁵ ላሚ ሃሢ፡- «ያኦሲ ጌኤሺ ማሄ ባኮ ኔኤኒ ዒኢቲያኩ ጋዓንዲያ ኮይሱዎሴ» ጋዓ ዑኡሲ ዋይዚንቴኔ።¹⁶ ዬና ሃይሢ ማይንቲ ዒዛዎ ጴዳሰካፓ ዓፒሎጉዴ ባከላ ቤዞማና ለካ ጫሪንጫ ዔውቴኔ።

¹⁷ ጴዳርሴ ዬኖ ያኦሲ ዒዛ ዳዌ ባኮኮ ቡሊያ «ዓይጎ ናንዳይ?» ጌራ ጌራ ፔ ማሊያና ማሊ ሚታዳንቴ፣ ቆርኔሌዎሴ ዳኩ ዓሶንሢ ሲሞኦኔኮ ማኣር ያኦጪ ያኦጪ ዲር ካራ ዔቃያ፣¹⁸ ዔኤሊንቴ፡- «ጴዳርሴ ጌይንታ ሲሞኦኔ ሸኦቹዎና ዓኣሢ ሃካዳ?» ጌራ ያኦጪኔ።

¹⁹ ጴዳርሴ ያኦሲ ዒዛ ፔጋሲ ዳዌ ባከሎ ዛሎ ማሊያይዳ ዓኣንቴ ዓያና ጌኤሺ ዒዛዎ፡- «ሃይሹ፣ ኔና ሃይህ ዓሲ ኮዓኔ፤²⁰ ዔያቶ ዳኩሢ ታናታሢር ዓልቱዎ ከዲጋፓ ዔያቶና ዎላ ዓኣዴ» ሄዚ ጌዔኔ።²¹ ጴዳርሴያ ዓኣ ቤዛፓ ከዲ ዓሶንሢ ባንሢ ሙካዮ፡-

«ዲንሢ ኮዓሢ ሃይሾ፣ ታናኬ፤ ዲንሢ ዓይጋ ሙኬይ?» ጌዒ ያኑጩኑ።

22 ዔያታ፡- «ኑኡኒ ሙኬሢ ጃኤቶ ፖኦሊሶኮ ሱኡጋሢ፣ ቆርኔሌዎሴ ኮራፓኬ፤ ዲዚያ ዓይሁዶ ዓሳ ቢያ ዲዛ ቦንቻያ ሃሣ ያኦሲ ካኣሽካያ ኮሺ ዓሲኬ። ኔና ዲዚ ፔ ማኣሪ ዔኤሊሲ ኔ ጋዓ ባኮ ዋይዛንዳጉዲ ያኦሲ ከኢታንቻ ዲዛም ኬኤዜኔ» ጌዔኔ።

23 ዩካፓ ጳዲሮሴ ዔያቶ ማኣሪ ጌልዚ ሾኦቹንሢ ዋይሣያ ጉቴሎ ዔቂ ዩንሢ ሙኬዞንሢና ዋላ ዓኣዳኔ፤ ዲዮጳይዳ ዓኣ ከሪሰቶሴ ጉሙርቃ ዓሶይዳፓ ፔቴ ፔቴ ዓሲያ ዲዛና ዋላ ዓኣዳኔ። 24 ዚሬሎ ዔያታ ቁሳሪያ ሙካንቴ ቆርኔሌዎሴ ፔኤኮ ዲጊናና ዑኬ ላኑ ማዔ ዓሶዋ ዔኤሊ ጳዲሮሴ ካፓኔ። 25 ጳዲሮሴ ጌሊ ቆርኔሌዎሴና ካኣማዛ ቆርኔሌዎሴ ዲዛኮ ቶኮ ዴማ ሂርኪ ጌዒ ቦንቻ ዔኤሊሢ ዔኤሌኔ። 26 ጳዲሮሴ ጋዓንቴ፡- «ዔቂ! ታኣ ኔጉዲ ዓሲዋይ!» ጌዒ ዲዛ ዔቂሴኔ።

27 ጳዲሮሴ ቆርኔሌዎሴና ዋላ ጌሰቲ ጌሰቲ ጋሮ ጌላዎ ሚርጌ ቡኪንቴ ዓኣ ዓሲ ዴንቄኔ። 28 ዩካፓ ዩያ ዓሶም፡- «ዓይሁዶ ዓሳ ዓይሁዶ ማዒባኣ ዜርዖና ዋላ ፔቴ ማዒ ሃሣ ዋሊኮ ማኣሪ ጌሊኒያ ኑ ካኣኸ ዋጋ ዓይሁዋኣሢ ዲንሢ ዲንሢ ቶኦኪና ዔራኔ፤ ጋዓንቴ ያናኣ ታኣኒ ጌኤሽኪባኣ፣ ዲኢቴ ዓሲኬ ጎዑዋጉዲ ያኦሲ ታና ፔጋሲ ዳቂኔ። 29 ዩያሮ ታኣም ዲንሢ ዓሶ ዳኬ ዋዶና ፔቴታዎ ዓልቱዋዎ ታ ሙኬኔ፤ ዓካሪ ዓይጎሮ ዲንሢ ታና ዔኤሌቶዋ ታ ዔራኒ ኮዓኔ» ጌዔኔ።

30 ዓማና ቆርኔሌዎሴ፡- «ሃሮ ያይዳሳ ኬሊ ሃይማ ዋዴ፣ ማሢ ደንቦልሳ ዋዴ ማዓኣና ታኣኒ ታ ማኣራ ያኦሲ ሽኢቃንቴ ዓኣፒዳ ዲዳካ ቦኦሬ ዓፒላ ማኣዔ ዓሲ ታ ዔሩዋንቴ ታ ቤርታ ዔቃዎ፣

31 ቆርኔሌዎሴ! ያኦሲ ኔኤኮ ሽኢጲ ዋይዜኔ፤ ሃሣ ማንቆ ዓሶም ኔ ዲንጋ ዲንጊዎዋ ኔኤኮ ዔኬኔ፤ 32 ዓካሪ ዲዮጳ ዓጮ ከኢታ ዓሲ ዳኪጋፓ ጳዲሮሴ ጌይንታ ሲሞኦኔ ዔኤሊሴ፤ ሃሢ ዲዚ ባዘ ዓጫ ዓኣ ጎሮ ጉኡዓሢ፣ ሲሞኦኔ ማኣራ ሾኦቹዋይዳ ዓኣኔ» ታኣም ጌዔሢሮ፣ 33 ቤዛና ከኢቶ ዓሶንሢ ታ ኔ ኮራ ዳኬኔ፤ ኔኤኒያ ሃሢ ሙኬሢ ቃራኬ፤ ዓካሪ ያኦሲ ኔና ኬኤዛንዳጉዲ ዓይሣ ባኮ ቢያ ዋይዛኒ ኑኡኒ ቢያሢ ያኦሲ ቤርታ ሃይካ ቡኬኔ» ሂዚ ጌዔኔ።

ጳዲሮሴ ጌሰቲ ጌኤዘ

34 ጳዲሮሴ ዔያቶም ኬኤዛዎ፡- «ጎኔና ያኦሲ ዓሲ ዓሲዳፓ ዲማሱዋኣሢና ፔቴያ ባሽ ማሂ ዛጉዋኣሢ ታ ዔሬኔ፤ 35 ዓይጎ

10:34 10:34 ላሚ. ዋማ 10:17።

ዓጪ ዓሲ ማዕቶዎ ያኑሲ ዒጊጫያ ሃሣ ጎኑሞ ባአዚ ማዳያ ማዕ
 ዓሢ፤ ዬያ ያኑሲ ናሽካኔ። 36 ያኑሲ ዒሰራዔኤሌ ዴሮሞ ቃኦሎ
 ዳኪሢ ዔርቴያኬ፤ ኮዥ ሃይሳ ዩሱሰ ኪሪሰቶሴ ዛሎና ሙኬሢያ
 ዔያቶሞኬ፤ ጋዓንቴ ዩሱሰ ኪሪሰቶሴ ቢያሢኮ ጎዳኬ። 37 ዮሃኒሴ
 ዋኦያና ማሰኪያ ኬኤዜ ዎዳፓ ዓርቃያ፤ ጌሊላ ዓጫፓ ዴንዲ ዪሁዳ
 ዓጫ ቢያይዳ ማዕ ባኮ ዒንሢ ዔራኔ። 38 ሃሣ ያኑሲ ናዚሬቶ ዩሱሴ
 ዓያኖ ጌኤዥና ዳኦሪሢንታ ዎልቄያ ዒዛሞ ዒንጌሢ ዒንሢ ዔራኔ፤
 ያኑሲ ዒዛና ዎላ ማዕሢሮ ዒዚ ኮሺ ባአዚ ማዲ ማዲ ፑርቶ
 ዓያኖና ዓርቄንቴ ዓሶዎ ፓሢ ፓሢ ሃንቴ።

39 «ዪሁዳ ካታሞ ኮይሎና ዩሩሳላሜ ካታሞናይዳ ዒዚ ማዳ
 ባኮኮ ቢያ ኦኡኒ ማርካኬ፤ ዔያታ ጋዓንቴ ዒዛ ሚሢዳ ሱዲ ዎዳኔ።
 40 ያኑሲ ዒዛ ሃይሣሳ ኬሎና ሃይባፓ ዔቃንዳጉዲና ዓሶማኦ ዒ
 ዴዳንዳጉዲ ማሃኔ። 41 ዒዚ ዴዳሢ ቢያ ዓሲሞቱዎንቴ ሃይባፓ
 ዔቄሢኮ ጊንፃ ዒዛና ዎላ ሙዒ ዑሽኬ፤ ያኑሲ ቤርታዲ ዳኦሬ፤
 ኑና ዒዛኮ ማርኮንሢሞኬ። 42 ሃያ ባኮ ዴሮሞ ኑ ኬኤዛንዳጉዲ፤
 ሽሞፖና ዓኦ ዓሶና ሃይቄ ዓሶናይዳ ዒ ዎጋንዳያ ማዒያ ሃሣ ዬያ
 ያኑሲ ማሊ ጌሢያ ማዕሢያ ኑ ማርካዳንዳጉዲ ኑና ዓይሣኔ።
 43 ዒዛና ጉሙርቃዞንሢሞ ቢያ ዒዛኮ ሱንፆና ጎማ ዓቶሞ
 ጌይንታንዳሢ ያኑሲ ማሊያ ኬኤዛ ዓሳ ዒዛ ዛሎ ማርካዳኔ»
 ጌዔኔ።

ዓይሁዴ ማዒባኦ ዜርዮኮ ዓያኖ ጌኤዥ ዔኪያ

44 ዴደሮሴ ዬያ ኬኤዛና ቃኦሎ ዎይዜ ዓሶ ቢያሢዳ ዓያና
 ጌኤሺ ኬዳኔ። 45 ዴደሮሴና ዎላ ሙኬ፤ ኪሪሰቶሴ ጉሙርቃ
 ዓይሁዴ ዓሳ ዓይሁዴ ማዒባኦ ዜርዮሞ ዓያኖ ጌኤዥ ዒንጊፃ
 ላኦሊንቴሢ ዛጋያ ዲቃቲ ሄርሼኔ። 46 ዓይሁዴ ማዒባኦ ዜርዮሞ
 ዓያኖ ጌኤዥ ዒንጊንቴያታሢ ዔያታ ዔሬሢ፤ ዓይሁዴ ማዒባኦ ዜርዮ
 ዲማ ዲማ ዳንጋና ጌሰታንቴ ሃሣ ያኑሲ ጋላቲ ጋላቲ ቦንቻንቴ
 ዔያታ ዎይዜሢኮኔ። 47 ዬማና ዴደሮሴ፡- «ሃኦታ ዓሳ ኑጉዲ ዓያና
 ጌኤሺ ዔኬኔ፤ ዓካሪ ዎኦያና ዔያታ ማሰቱዎጉዲ ያኑኒ ዔያቶ
 ላኦጋይ?» ጌዔኔ። 48 ዬያሮ ዔያታ ዩሱሰ ኪሪሰቶሴ ሱንፆና ዎኦ
 ማሰታንዳጉዲ ዓይሣኔ፤ ዬካፓ ዴደሮሴ ዔያቶና ዎላ ዳካ ኬሊ
 ዴዓንዳጉዲ ዔያታ ዒዛ ሺኦቄኔ።

11

ዴደሮሴ ዓይሁዴ ማዒባኦ ዓሶ ማኦሪ ዓይጋ ጌሌቶዎ ኬኤዜሢ

1 ዓይሁዴ ማዒባኣ ዓሳ ያኦሲ ቃኣሎ ዋይዚ ዔኬሢ ዪሁዳ ዓጮይዳ ዓኣ ዳከንቴዞንሢኮ ሃንጎ ኪሪሰቶሴ ጉሙርቃ ዓሶንታ ዋይዜኔ። 2 ጳዒርሴ ዬሩሳሌም ጊንሣ ማዒ ዓኣዴ ዋደና ዓቲንቶ ቤርቶ ቲቁንቲፃ ፒዜኬ ጋዓ፣ ዓይሁዴታፃ ኪሪሰቶሴ ጉሙርቃ ዓሶ ዛላፓ ማዔ ዓሳ ዒዛ፡- 3 «ዓይጎር ኔ ዓቲንቶ ቤርቶ ቲቁንቲባኣ ዓሶ ማኣሪ ጌሊ ዔያቶና ዋላ ሙዔይ?» ጌዒ ፓሴኔ። 4 ጳዒርሴ ጋዓንቴ ሂዚ ጌዒ ቢያ ባኮ ፓይዲ ፓይዲ ኬኤዚሢ ሳርቁኔ።

5 «ታኣኒ ዒዮጴ ካታማ ሸኢጲሢሢ ዓኣፃ ያኦሲ ታኣም ፔጋሲ ዳዋ ባኣዚ ዛጌኔ፤ ታ ዛጌሢ ፑኡፒ ዓፒላ ማላ ባኣዚ ያይዶ ዛሎ ሳርቁንቲ ጫሪንጫፓ ኬዲ ታ ባንሢ ሙካንቴኬ፤ 6 ዬና ባኬሎ ኮሺ ታ ዛጋዛ ዲማ ዲማ ቆልሞ፣ ካይዚ ቦፃ ዳካንታ ዴኤፒንታ፣ ካፒያ ጊዳ ዓኣንቴ ታ ዛጌኔ፤ 7 ዒማና <ጳዒርሴ! ዔቁ ሹኪ ሹኪ ሙዔ> ጋዓ ዑኡሲ ታ ዋይዛፃ፣ 8 ዬይ ማዓዓኬ ጎዳሢዮ! ሙዒንቱዋ ዒኣቲ ባኣዚ ታ ሙዒ ቤቁባኣሴ» ጌዔኔ። 9 ሃሢ ላሚሢና ዬና ዑኡዜላ <ያኦሲ ጌኤሺ ማሃሢ ኔ ዒኣቲያኬ ጋዓኒ ኮይሱዋሴ> ጌዒ ጫሪንጫፓ ታኣም ኬኤዜኔ። 10 ዬና ሃይሢ ማይንቲ ያዲ ማዔሰካፓ ዬና ዓፒሎ ማላ ባኬላ ጉቤ ሌካ ጫሪንጫ ዔውቴኔ። 11 ዒማና ቁሳሪያይዳፓ ታ ባንሢ ዳኮና ሃይሃ ዓሲ ኑ ዓኣ ማኣር ሙኪ ሄሌኔ። 12 ዓያና ጌኤሺ ታኣኒ ፔቴታፃ ዓልቲሢ ባኣያና ዔያቶና ዋላ ዓኣዳንዳጉዲ ታኣም ኬኤዜኔ፤ ሃንሢ ላሆ ኪሪሰቶሴ ጉሙርቃ ዓሶንሢ ታኣና ዋላ ዓኣኔ፤ ዔያቶንታ ዋላ ኑ ቆርኔሌዎሴ ማኣሪ ዓኣዲ ጌሌኔ። 13 ዒዚያ ያኦሲ ኪኢታንቻ ዒዛም ጴዴም ዒ ዛጌሢና፡- <ዒዮጴ ዓጮ ዓሲ ዳኪ ጳዒርሴ ጌይንታ ሲሞኦኔ ዔኤሊሴ፤ 14 ዒዚ ኔኤና ኔ ማኣር ዓሶና ቢያ ዒንሢ ዳቃንዳ ቃኣላ ኔኤም ኬኤዛንዳኔ> ጌዔሢ ዒ ኑም ኬኤዜኔ። 15 ዬያር ታኣኒ ዔያቶም ኬኤዚያ ሳርቁ ዋደና ዓያኖ ጌኤኸ ቤርታ ኑ ዑፃ ኬዴሢጉዲ ዔያቶ ዑፃኣ ኬዴኔ። 16 ዬማና <ዮሃኒሴ ዋኣሢና ማሰኬኔ፤ ዒንሢ ጋዓንቴ ዓያና ጌኤሺና ማሰታንዳኔ> ጌዒ ጎዳ ኬኤዜ ቃኣላ ታኣም ጳቁኔ። 17 ኑኡኒ ጎዳ ዬሱሰ ኪሪሰቶሴ ጉሙርቁ ዋደና ያኦሲ ኑም ዒንጌ ዒንጌፃ ዔያቶማኣ ዒንጌንቴያታቴ ሂዳፃ ያኦሲ ታ ላኣጋኒ ዋልቁ ታኣኮ ዓኣ?» ጌዔኔ።

18 ዔያታ ዬያ ዋይዛፃ ጎፃንዶ ጎይሢ ባይዚ ዚቲዮ ጌዔኔ፤ ዬካፓ ዔያታ፡- «ዓካሪ፣ ያኦሲ ዓይሁዴ ማዒባኣ ዓሳ ዳቃንዳጉዲ ጎሞ ዔያቶም ዓቶም ጌዔኔ» ጌዒ ያኦሲ ጋላቴኔ።

ዓንጻኪያይዳ ዓኣ ሸኢጲያ ማኣር

11:16 11:16 ዳኪ. ማዶ 1:5።

19 ዲሰጧፓናሴ ሹጮና ዲይንቴ ሃይቄ ዎዶና ዔቄ ዲጂ ዳውሲያ ዛሎና ላኣለንቴ ዳንዴ ኪሪሰቶሴ ጉሙርቄ ዓሳ ዳንዲ ፒንቄ፣ ቆጲርሴና ዓንጾኪያ ዓጮ ሄላንዳኣና ዓኣዳጋ ጾኦሲኮ ቃኣሎ ዓይሁዴ ዓሲዳፓ ዓታዛ ሚሌ ዓሲም ኬኤዚባኣሴ። 20 ማዔቶዎ ቆጲርሴና ቄሬና ዓጮናይዳፓ ሙኬ ፔቴ ፔቴ ኪሪሰቶሴ ጉሙርቄ ዓሳ ዓንጾኪያ ዓኣዳጋ ዓይሁዴ ማዒባኣ ዓሰማኣ * ዓይሱዎጋ ጎዳ ዩሱሴ ዛሎ ኮዦ ሃይሶ ኬኤዜኔ። 21 ጎዳ ዔያቶ ማኣዴሣሮ ሚርጌ ዓሲ ኪሪሰቶሴ ጉሙርቄ ጎዳ ባንሣ ማዔኔ።

22 ዩሩሳላሚይዳ ዓኣ ሺኢጲያ ማኣሮ ዓሳ ዩያ ዎይዜሣሮ ባርናባሴ ዓንጾኪያ ዳኬኔ። 23 ዒዚያ ዓኣዲ ጾኦሲ ኮሹሞና ዒንጋ ዒንጌያ ዳርሞ ዎማይዲ ዒንጌቶዎ ዛጋዛ ሚርጌ ዒዛ ዎዛሴኔ፤ ቢያሣ ጉቤ ዒናፓ ዶዲ ጎዳም ጉሙርቄንታያ ማዒ ናንጋንዳጉዲ ዒ ዞሬኔ። 24 ዒዚያ ዓያና ጌኤሺ ኩሙሣ ዎልቄና ዒዛይዳ ማዳያ ሃሣ ሚርጌና ጾኦሲ ጉሙርቃ ኮሺ ዓሲኬ። ሚርጌ ዓሲያ ጎዳ ባንሣ ማዔኔ።

25 ዩካፓ ባርናባሴ ሳውሌ ኮዒኒ ጭርሴሴ ጎጋ ዓጮ ዓኣዲ፣ 26 ዒዛ ዳንቃጋ ዓንጾኪያ ዔኪ ዒዛ ሙኬኔ። ፔቴ ለዔ ኩሙሣ ዔያታ ዒኢካ ዓኣ ኪሪሰቶሴ ጉሙርቃ ዓሰና ዎላ ፔቴ ማዒ ሚርጌ ዓሲ ዔርዜኔ፤ ኪሪሰቶሴ ጉሙርቄ ዓሳ ፔቴ ጌዒ ዓንጾኪያይዳ «ዓማኖ ዓሶ» ጌይንቴኔ።

27 ዒማና ፔቴ ፔቴ ጾኦሲ ማሊያ ኬኤዛዞንሣኮ ዩሩሳላሚይዳፓ ዓንጾኪያ ዳንዴኔ፤ 28 ዔያቶይዳፓ ፔቴሣ ዓጋቦሴ ጎጋሣ ዔቄ ዓጮ ቢያይዳ ዴኤፒናይዚ ኬሰካንዳሣ ዓያና ጌኤሺ ማሊሴም ኬኤዛዛ፣ ዩይ ናያ ሮሜ ዓጮ ካኣቴ ቄላውዴዎሴ ዎዶና ማዔኔ። 29 ዩያሮ ኪሪሰቶሴ ጉሙርቃ ዓሳ ቢያ ፔቴ ፔቴሣ ፔ ዳንዳዔሣጉዴያ ሚኢሺ ኬሲ ዩሁዳ ዓጮይዳ ዓኣ ኪሪሰቶሴ ጉሙርቃ ዓሰም ማኣዶ ዳካኒ ማሌኔ። 30 ዩካፓ ሚኢሺ ዔያታ ኬሲ ባርናባሴና ሳውሌና ዑፃ ዳኬኔ።

12

ዓማኖ ዓሶኮ ዴኤፖ ዳውሲንቴያ

1 ዓማኖ ካኣቴ ሄሮዲሴ ፔቴ ፔቴ ኪሪሰቶሴ ጉሙርቃ ዓማኖ ዓሶ ዳውሲሣ ሳርቄኔ፤ 2 ዮሃንሴኮ ቶይዲ ያይቆኦኬ ጨንቻ ዓፓሮና ዒዚ ቴቂሲ ዎዲሹኔ። 3 ዩይ ባካ ዓይሁዴ ዓሶ ዎዛሴሣ ዛጋጋ

11:19 11:19 ዳኪ. ማዳ 8:1-4። * 11:20 11:20 ዓይሁዴ ማዒባኣ ዓሶ- ጋዓዛ ፔቴ ፔቴ ማፃእፓ «ጌሪኬ ዓጮ ሙኤጮ ጌሰታ ዳር» ጋዓኔ። 11:28 11:28 ዳኪ. ማዳ 21:10።

ጳጳሮች ሃሣ ዓርቁሱኑ። ዬይ ማዕረሃ ዓይሁዶ ዓሶኮ ዑሣ ዓኣዲያ ጌራ ላኣዶ ሙዒ ቦንቸ ከሎናኩ። 4 ጳጳሮሴ ዒዚ ዓርቁሴሰካፓ ቱኡሲ ማኣሪዳ ቱኩኔ፤ ዓይሁዶ ዓሶኮ ዑሣ ዓኣዲያ ቦንቸ ከሎኮ ጊንፃፓ ዳሮ ቤርቶ ሺኢሻንዳያ ሄላንዳኣና ያይዶ ያይዶ ማዒ ፔቲና ዒዛ ያይዶ ዓሲ ካፓንዳጉዲ ካፓ ዓሶ ዓይሣኔ። 5 ዬያሮ ጳጳሮሴ ቱኡዘ ማኣሮይዳ ቱኡቲ ካፓ ዓሶና ካፒንቴኔ፤ ሺኢዲያ ማኣሮ ዓሳ ጋዓንቴ ዒዛ ጋይቲ ዶዲ ያኣሲ ሺኢቃኔ።

ያኣሲኮ ከኢታንቻ ቱኡዘ ማኣራፓ ጳጳሮሴ ከሴሣ

6 ሄሮዲሴ ዳሮ ቤርቶ ጳጳሮሴ ሺኢሻን ማሌ ዋንቴሎ ጳጳሮሴ ላምዖ ካኒ ቢራታና ቱኡቲ ላምዖ ካፓ ዓሲኮ ባኣካ ላሂ ዓኣኔ፤ ዓቲ ሜሌ ካፓዘንሣ ቱኡዘ ማኣሮኮ ካሮ ካፓኔ። 7 ዬማና ያኣሲኮ ከኢታንቻ ሙኪ ጳዳዛ፣ ቱኡዘ ማኣሮይዳ ጳጳሮሴ ዓኣ ጋራ ፖራ ፖራኔ፤ ዬካፓ ያኣሲኮ ከኢታንቻሣ ጳጳሮሴኮ ቱቱሎ ባዒ ጳቻዖ፡- «ዑኩና ዔቁ!» ጋዓዛ፣ ካሮ ቢራታ ዒዛኮ ኩጫፓ ኬዴኔ። 8 ጊንሣ ያኣሲኮ ከኢታንቻሣ፡- «ቃልሾ ኔኤኮ ቱኡቲ፤ ዱርዘዋ ኔኤኮ ዓኣሣንቴ» ጌራኔ። ጳጳሮሴያ ዓይሣንቴሣጉዲ ማዳኔ፤ ሃሣ ጊንሣ ያኣሲኮ ከኢታንቻሣ፡- «ዓፒሎ ኔኤኮ ማይንቴ ታ ጊንዖ ሙኩ» ጌራኔ። 9 ዬያሮ ጳጳሮሴ ከሰካዖ ያኣሲኮ ከኢታንቻሣ ጊንዖ ዓኣዳኣና ዒዛም ዓውቲ ማሌያፓዓቲም ዬይ ማዳንታ ባካ ቢያ ጎኔ ባኣዚ ማለባኣሴ። 10 ቤርታሳሣና ላምዓሳ ቤዘናይዳ ካፓ ዓሶና ያኣኪ ካታም ደንዳ ዓንጎና ዎዲንቴ ካሮ ሄላዛ ዓሲ ካኣሙዋንቴ ካራ ጉሪ ዔያቶም ቡለንቴም ዔያታ ከሰኪ ፔቲ ሉኡጋ ጎይሣ ጊዳና ቲቂ ዓኣዳኣና ዒዚ ዔሩዋንቴ ያኣሲኮ ከኢታንቻሣ ጳጳሮሴይዳፓ ዲማዲ ዓኣዳኔ።

11 ዬካፓ ጳጳሮሴኮ ዒና ማዓዛ፡- «ያኣሲ ፔኤኮ ከኢታንቻሣ ዳኪ ታና ሄሮዲሴና ዓይሁዳ ዓሳ ካፓ ባኮናይዳፓ ቢያ ዳቂሽያ ማዕረሃ፡ ዓካሪ ታ ጎኔ ዔሬኔ» ጌራኔ።

12 ዬካፓ ዒዚ ሚርጌ ዓሳ ፔቱዋና ቡኪንቴ ሺኢቃ ማይራዎ ጎዖዘ ማኣሪ ዓኣዳኔ፤ ዬና ማይራማ ማርቆሴ ጌይንታ ዮሃንሴኮ ዒንዶኩ። 13 ጳጳሮሴ ዒኢካ ሄላዖ ማርሾ ካሮይዳ ዔቁ፡- «ማኣሪ ዓሲዮ!» ጋዓዛ፣ ሮዳ ጌይንታ ዉዱሮ ናይሰኩና ያናታቴያ ዔራኒ ማርሾ ካሮ ሙኩኔ። 14 ናዔላ ጳጳሮሴ ዑኡሲ ማዕረሃ ዔራዖ ሚርጌ ዎዛፓ ዔቁያና ማርሾ ካሮ ቡሉዋዖ ሃሺ ጳሽኪ ጋሮ ጌሊ፡- «ጳጳሮሴ ካራ ዔቁ ዓኣኔ!» ጌራ ከኤዜኔ። 15 ዔያታ ጋዓንቴ፡- «ኔ

12:4 12:4 ከሲ. ማፃ 12:1-27።

ዣዣአሽካኔ!» ጋዓዛ፥ ዒዛ፡- «ጎኔ ዒዛኬ» ጌዒ ደዲሺ ኬኤዛዛ፥ ዒያታ ገንሣ፡- «ሂዴቶ፥ ዒዛኮ ዒኤዢ ናንዳኔ» ጌዒኔ።

16 ጳዲሮሴ ዒማና ዒኤሊያ ሃሾ ዒፃዛ፥ ዒያታ ካሮ ቡላዖ ዒዛ ዛገ ሚርጌ ዲቃቲ ሄርሼኔ። 17 ዒዚ ጋዓንቴ ዒያታ ዚቲዮ ጋዓንዳጉዲ ኩቻ ዳዎዖ፥ ያኦሲ ዒዛ ቱኡዞ ማኣራፓ ዎይቲ ኬሴቶዎ ዒያቶም ኬኤዜኔ። ዩካፓ፡- «ሃያ ባኮ ያይቆኦቤና ሃንጎ ኪሪሰቶሴ ጉሙርቃዞንሢማኣ ኬኤዙዎቱ» ጌዒ ዒያቶይዳፓ ዲማዲ ሜሌ ቤሲ ዴንዴኔ።

18 ዚሮ ጉቴሎ፡- «ጳዲሮሴ ዎካ ባይቄይ?» ጌዒ ካፓ ዓሳ ሴካ ሃንጋ ጳሽኬኔ። 19 ሄሮዲሴ ዒዛ ኮዒሲ ባሽንታዖ ዩኖ ኬሎና ካፓ ዓሶ ያኦጩሢኮ ገንፃ ዒያቶ ዎዳንዳጉዲ ዓይሣኔ፤ ዩካፓ ሄሮዲሴ ዪሁዳይዳፓ ቁሳሪያ ዴንዲ ዴዔኔ።

ካኣቲ ሄሮዲሴኮ ሃይቦ

20 ሄሮዲሴ ጳሮሴና ሲዶና ዓጮ ዓሶናይዳ ኮሺ ዳጋዴኔ፤ ዩያሮ ዒያታ ፔቱሞና ሙካዖ ካኣቲኮ ላጌ ማዔ፥ ቢላሰዖሴ ጌይንታሢ ዒያቶም ካኣቲ ቃይሻንዳጉዲ ሺኢቁ ዒኤዒሴሢኮ ገንፃ ካኣቲና ቡካኒ ዒያታ ያኦጩኔ፤ ዩያ ዒያታ ማዴሢ ዒያቶኮ ዓጮ ዓሳ ሙዖንዶ ባኣዚ ዴንቃሢ ዩያ ካኣቲ ዓጫፓ ማዔሢሮኬ።

21 ካኣቲ ጌኤዞ ዎይዛኒ ጌሢ ኬሎና ካኣቱሞ ዓፒሎ ፔኤኮ ማኣዒ፥ ካኣቱሞ ያይቶይዳ ዴዒ ዴሮም ኬኤዜኔ። 22 ዴራኣ፡- «ሃይ ያኦሲ ዑኡሲ ማዓንዳፓዓቲም ዓሲ ዑኡሲቱዎሴ» ጌዒ ጌዒ ዒላቲኔ። 23 ዓማና ሄሮዲሴ ያኦሲም ቦንቾ ዒንገባኣሢሮ ቤዞማና ያኦሲ ኪኢታንቻ ፑርታ ዶርዖ ዒዛይዳ ዓጋዛ ዒዚ ዛልቁ ሃይቄኔ።

24 ያኦሲኮ ቃኣላ ጋዓንቴ ቢያ ዎዴ ሚርጌና ዳልጊ ዳልጊ ዴንዴኔ።

25 ባርናባሴና ሳውሌና ፔኤኮ ማዶ ኩንሢ ዩሩሳላሜይዳፓ ዓንፃኪያ ማዓዖ፥ ማርቆሴ ጌይንታ ዮሃኒሴያ ዒያቶና ዎላ ዒኪ ሙኬኔ።

13

ዓያና ጌኤሺ ባርናባሴና ሳውሌና ዶኦሪ ማዶም ዳኪሢ

1 ዓንፃኪያይዳ ዓኣ ኪሪሰቶሴ ጉሙርቃ ዓሶ ባኣካ ያኦሲ ማሊሢ ኬኤዛያና ኪሪሰቶሴ ጉሙርቃ ዓሶ ዒርዛ ዓሲያ ዓኣኔ፤ ዩያታ፡- «ባርናባሴ፥ ካርፃሢ ጌይንታ ሲሞኦኔ፥ ቄሪና ዓጮ ዓሢ ሉኪዮሴ፥ ዓጮኮ ያይዳሳ ቤዞ ዎይሢ ሄሮዲሴንታ * ዎሊ ኮሺ ናሽካ ማናሄና

* 13:1 13:1 ዓጮኮ ያይዳሳ ቤዞ ዎይሢ ሄሮዲሴንታ፡- ዩያ ካኣቲኮ ሱንፃ «ዓንቴጳሴ» ጌይንታያ ጌላላ ዓጮ ዎይሢያኬ።

ሳውሌናኩ።» 2 ዩንሢ ሙኡዚ ሃሺ ሺኢጲሢ ሺኢቃንቴ ሃሢ ያኦሲ ካኣሽካንቴ ዓያና ጌኤሽ፡- «ታኣኒ ዶኦሬ ማዶም ባርናባሴና ሳውሌና ታኣም ዲማሲ ኬሱዋቴ» ጌዔኔ።

3 ዔያታ ላሚ ሃሢ ሙዶ ሃሺ ሺኢቆ ሺኢጲያ ሺኢቁ፡ ኩጮ ዔያቶ ዐፃ ጌሢሰካፓ ዔያቶ ዳኬኔ።

ባርናባሴና ሳውሌና ቆጲርሴ ዓጮይዳ

4 ባርናባሴና ሳውሌና ዓያና ጌኤሽ ዔያቶ ዳኬም ሴሌውቁያ ጌይንታ ዓጮ ዓኣዲ፡ ዩካፓ ዋኣያ ካኣሚሎና ዋኣያ ሳዛ ዓኣ ቆጲርሴ ዓኣዲኔ። 5 ሲልማና ዔያታ ሄላዖ ዓይሁዶ ዓሶኮ ቡኪንቶ ቤዛ ያኦሲ ቃኣላ ኬኤዜኔ፤ ዮሃኒሴ ጌይንታ ማርቆሴያ ዔያቶና ዎላ ማዒ ዔያቶ ማኣዴኔ።

6 ቆጲርሴኮ ጳፑ ጋዓ ቤዛ ዴንዲ ዔያታ ሄላዖ፡ ባሪዬሱሴ ጌይንታ ፔቴ ዓይሁዴ ዓሲ ዠይሰኬያ ዴንቁኔ፤ ዒዚያ ሉኡዙሞና ያኦሲ ማሊሢ ኬኤዛኔ ጋዓ ዓሲኬ። 7 ዒዚ ሴርጊዮሰ ጳውሎሴ ጌይንታ ኮሺ ጫዋ ማዒ ዓጪ ዎይሃሰኬያኮ ላጌኬ፤ ዩይ ዎይሃ ዓሢ ባርናባሴና ሳውሌና ዔኤሊሲ ያኦሲ ቃኣላ ዎይዛኒ ኮዔኔ። 8 ጋዓንቴ ጊሪኬ ሙኡጮና «ዔሊማሴ» ጌይንታ ዠዋኣሢ፡ ባሪዬሱሴ ዩይ ዓጮ ዎይሃሢ ኪሪሰቶሴ ጉሙርቁዎጉዲ ላኣጊ ባርናባሴና ሳውሌና ኬኤዛ ባኮ ዒፂ ማኬኔ። 9 ሳውሌ ጌይንታ ጳውሎሴ ጋዓንቴ ዓያና ጌኤሽ ኩሙሢ ዎልቁና ዒዛይዳ ሙኬም ዩያ ዓሢ ኮሺ ዛጋዖ፡- 10 «ሃይ ኔ ፃላሃ ናዓሢ፡ ጎኑሞ ቢያኮ ሞርኬ ማዔሢ፡ ጌሺሢና ፑርቱሞና ኔ ጊዳ ኩሜሢ ሃይ! ፒዜ ያኦሲ ጎይያ ዎቢሶ ኔ ሃሻዓዳ? 11 ሃሢ ሃይሽ ኔና ያኦሲ ኩቺ ጳርቃንዳኔ፤ ዓኣፒ ባይቁያ ኔ ማዓንዳኔ፤ ያኦሲ ጌዔ ዎዳ ሄላንዳኣና ዓሶኮ ፖዖ ኔ ዛጋዓኬ» ጋዓዛ፡ ቤዘማና ዓኣፓ ዒዛኮ ሻኣራቲ ዲሚ ባይቁም፡ ኩጮ ዒዛኮ ዓርቁ ዔኪ ዒዛ ዓኣዳንዳ ዓሲ ኮይላ ዒዛኮ ዒ ኮይሢ ዓርቁኔ። 12 ዓጮ ዎይሃሢ ማዔ ባኮ ቢያ ዛጋዖ ኪሪሰቶሴ ጉሙርቁኔ፤ ጎዳ ዛሎ ዎይዜ ባኮርዋ ቢያ ዲቃቲ ሄርሼኔ።

ባርናባሴና ጳውሎሴና ጲሲዲያ ዓጮይዳ

13 ዩካፓ ጳውሎሴና ዒዛኮ ላጎንሢና ዋኣያ ካኣሚሎና ጳፑይዳፓ ጲንፒሊያ ዓጫ ዓኣ ጴርጌ ዓኣዴኔ፤ ዮሃኒሴ ጌይንታ ማርቆሴ ጋዓንቴ ዔያቶይዳፓ ዲማዲ ጊንሃ ዩሩሳላሚ ማዒ ዓኣዴኔ። 14 ዔያታ ጋዓንቴ ጴርጌይዳፓ ዔቁ ጲሲዲያ ዓጮይዳ ዓኣ ዓንያኪያ ዓኣዴኔ፤ ዓይሁዶኮ ሃውሾ ኬሎና ዔያቶኮ ቡኪንቶ ቤዛ ጌሊ ዴዔኔ። 15 ዒማና ዎጎ ማፃኣፖና ያኦሲ ማሊያ ኬኤዛ ዓሶናኮ ማፃኣፓፓ ናባቢንቴሢኮ ጊንፃ ዓይሁዶ ዓሶኮ ቡኪንቶ ቤዛ

ሱኡጋ፡- «ዲሾንሢሦቴ! ዳሮ ደዲሻ ቃኣላ ዲንሢካን ዓኣቶ ዳሮም ከኤዘዋቴ» ጌዒ ዓሲ ዔያቶም ዳከኔ። 16 ዬያሮ ጳውሎሴ ዔቃዖ ዳሮ ባንሢ ኩቸና ጳዊ ጳዊ ሂዚ ጌዔኔ፡- «ዲሰራዔኤሌ ዓሰንታ ሃሃ ዲንሢ ጸኣሲ ዲጊጫ፣ ዓይሁዳ ማዒባኣ ዳራ! ዋይዘዋቴ፤ 17 ሃያ ዲሰራዔኤሌ ዳሮኮ ጸኣዛሢ ኑኡኮ ቤርታዳ ዓድንሢ ደኦሪ፣ ጊብዔ ዓጮይዳ ዔያታ ዓኣ ዋደና ዳልጊ ዳሪ ዔያቶ ማሂ ዲዛኮ ዳኤፖ ዋልቆና ዬኖ ዓጮፓ ዔያቶ ከሴኔ። 18 ያይዲታሚ ለዔ ማዓንዳያ ዓሲ ናንጉዋ ዳውሎይዳ ጊቢ ዳንዳዒሢና † ዔያቶ ዲ ማኣዳኔ፤ 19 ዬካፓ ካኣናኔ ዓጮይዳ ላንካይ ካኣቶ ባይዘ፣ ዬያቶኮ ዓጮ ዔያቶ ዳካልሴኔ፤ 20 ዬካፓ ሃሃ ያይዳ ያኤታና ደንጊታሚ ለዔ ማዓንዳያ ጸኣሲ ማሊያ ከኤዛ ሳሙዔኤሌ ዋደ ሄላንዳኣና ሱኡጋ ዔያቶ ዋይሃንዳጉዲ ማሂኔ።»

21 «ዬካፓ ሄሊሲ ካኣቲ ዔያቶም ካኣታሳንዳጉዲ ጸኣሲ ዔያታ ሸኢቃዛ፣ ጸኣሲ ዔያቶም ቢኢኒያሚ ፃጳፓ ማዔ ቂሴ ናኣዚ ሳኣጸኣሌ ያይዲታሚ ለዔ ካኣታሴኔ። 22 ጸኣሲ ሳኣጸኣሌ ካኣቱማፓ ከይሴሰካፓ ዳውቲ ዔያቶም ካኣታሴኔ፤ ጸኣሲ ዳውቲ ዛሎ ማርካዳጾ ሲናፓታ ዲዛ ናሽካያ፣ ታኣኮ ማሊያ ከንሃ፣ ዲሴዬ ናኣዚ ዳውቲ ታ ዳንቄኔ፣ ጌዔኔ። 23 ዬያ ዓሢ ዜርቻይዳፓ ጸኣሲ ዲንጌ ሃጊ ማዓንዳ ዋዘጉዳያ ዲሰራዔኤሌ ዓሰ ጳቂሻ፣ ዬሱሴ ዔኪ ሙከኔ። 24 ዬሱሴ ማዶ ዓርቃንዳሢኮ ቤርታ ዲሰራዔኤሌ ዓሳ ጎሞ ፔኤኮ ቡኡዒ ዋኣሢና ማሰታንዳጉዲ ዮሃኒሴ ከኤዜኔ። 25 ዮሃኒሴ ፔ ማዶ ኩርሳኒ ዑኪ ዓኣዶ፡- ታና ዲንሢ ጾናኬ ጋዓይ? ታኣኒ ማሲሄቱዋሴ፤ ጋዓንቲ ዲዛኮ ዱርዘ ቱኮ ሱዘ ቡላኒ ታኣም ኮይሱዋያ፣ ታኣኮ ጊንዖ ማሊ ሙካንዳኔ» ጌዔኔ።

26 «ዲንሢ ዓብራሃሚ ዜርፃፓ ሸይንቲ ዲሾንሢንታ ጸኣሲ ዓጊጫዘንሢ ሲያ! ሃይ ጳቂንቶ ቃኣላ ዳኪንቴሢ ኑምከ። 27 ጋዓንቲ ዬሩሳላሚይዳ ናንጋ ዓሰና ዔያቶኮ ሱኡጎና ዬሱሴ ዓሲ ጳቂሻያ ማዔሢ ዔሪባኣሴ፤ ሃሃ ዓይሁዳ ዓሰኮ ሃውሾ ከኤሎና ቢያናባቢንታ፣ ጸኣሲ ማሊያ ከኤዛ ዓሰኮ ማፃኣፖ ቃኣላኣ ዔያቶም ጌሊባኣሴ፤ ያዲ ማዔቲያ ጸኣሲ ማሊያ ከኤዛ ዓሳ ጌዔ ጎይዖ ዲዛ ዑፃ ፑርታ ዋጌ ዔያታ ዋጌኔ። 28 ሃይቢም ዲዛ ሄሊሳ ዳቢንቲ ዔያታ

13:17 13:17 ከሲ. ማፃ 1:7፤ 12:51። † 13:18 13:18 ጊቢ ዳንዳዒሢና፡- ጋዓዘ ፔቲ ፔቲ ማፃኣፓ «ሚጠንቲ ደዲ ካፒሢና» ጋዓኔ። 13:18 13:18 ፓይ. ማፃ 14:34፤ ላሚ. ዋማ 1:31። 13:20 13:20 ሱኡጎ. ማፃ 2:16፤ 14ሙ. 3:20። 13:21 13:21 14ሙ. 8:5፤ 10:21። 13:22 13:22 14ሙ. 13:14፤ 16:12፤ ዓይኑ. 89:20። 13:24 13:24 ማር. 1:4፤ ሉቃ. 3:3። 13:25 13:25 ማቴ. 3:11፤ ማር. 1:7፤ ሉቃ. 3:16፤ ዮሃ. 1:20፤ 27።

ዲዛይዳ ዴንቁባአዖ ዴያቶም ዲዛ ዎዳንዳጉዲ ጲላዖሴ ዴያታ ሸኢቁኔ። 29 ዲዛ ዛሎ ፃኣፒንቴ ባኮ ቢያ ዴያታ ኩንሢሢካ ጊንፃ ፑርቲሴ ዓሶ ሱዖ ማፃፃፓ ከይሲ ዲዛ ዴያታ ዲኡከኔ፤ 30 ጋዓንቴ ያኦሲ ዲዛ ሃይባፓ ዴቁሴ። 31 ጌሊላይዳፓ ዬሩሳላሜ ዲዛና ዎላ ሙኩዘንሢሢሣኣ ማርጌ ከሊ ዲዚ ጴዳ፤ ዬያታ ሃሢ ዴርኮ ቢርቶይዳ ዲዛኮ ማርከንሢከ። 32 ኦኦኒ ሃሢ ዲንሢከም ዴከ ሙኩሢ ያኦሲ ኦ ዓድንሢከም ሃጊ ማዓንዳ ዎዛ ማሃ ዲንጌ ኮኸ ሃይሶከ። 33 ዎይቲ ጌዔቶ ያኦሲ ዬሱሴ ሃይባፓ ዴቁሲያና ዬያ ዎዛ ኦና ዴያቶኮ ናኣቶም ኩንሢከ። ዬይያ፡- ዓይኦም ማፃኣፓ ዓይሢ ላምዖይዳ፤

ኔ ታኣኮ ናዓሢከ፤ ታ ኔኤኮ ሃኖ ዓድ ማዔኔ፤
 ጌይንቴ ፃኣፒንቴሢ ጉዴያከ። 34 ዲዚ ዎዑዎጉዲ ያኦሲ ዲዛ ሃይባፓ ዴቁሴሢ ጌርዛኒ፡- «ዳውቴም ዲንጊንቴ ሃጊ ማዓንዳ ዎዛሢ፤ ያኦሲም ዲማዴያ ሃሃ ጉሙርቁንታያ ማዔሢ ታ ዲንሢከም ዲንጋንዳኔ» ጌዒ ከኤዜኔ።

35 «ሃሃ ማሌ ቤሰካ ዓይኦም ማፃኣፓይዳ፡-

ኔኤም ጉሙርቁንቴ ማዳሢ ዲኡፓ ኔ ዎዒሲንዲዎሴ፤
 ጋዓኔ። 36 ጋዓንቴ ዳውቴ ፔኤኮ ናንጎ ዎድይዳ ማዶ ያኦሲ ማሊዖጉዲ ኩንሢሰካፓ ሃይቁ፤ ፔኤኮ ዓድንሢከም ዎላ ዲኡቲ ዎዔኔ። 37 ያኦሲ ሃይባፓ ዴቁሴሢ ጋዓንቴ ዎዒባኣሴ። 38 ዓካሪ ዲሾንሢኮ፤ ዲንሢከም ከኤዘንቴሢ፤ ጎም ቢያ ዲንሢከም ዓቶም ጋዓኒ ዳንዳዓሢ ዬሱሴከ፤ ሙሴ ዴርዜ ዎጋ ጎሜ ዓይሉዎፓ ቢያ ዲንሢከም ከሳኒ ዳንዳዑዎሴ ጋዓያከ። 39 ዬሱሴ ጉሙርቃ ዓሲ ቢያ ጎሜ ዓይሉዎፓ ከሰካኔ። 40 ዬያር ያኦሲ ማሊዖ ከኤዛ ዓሶ ዛሎና ሂዚ ጌይንቴሢ ዲንሢከም ሄሉዎጉዲ ዲንሢከም ዴሩዎቴ፤

41 ዲንሢከም ሃይ ቦሃ ዓሳ!

ዛጉዎቴ፤ ዲቃቲ ሄርሹዎቴ፤ ባይቁዎቴ!
 ዓይጎር ጌዔቶ ያኦኒያ ዲንሢከም ከኤዜቶ ዲንሢከም ጉሙርቃኦ፤
 ማዶ ዲንሢከም ዎድና ታ ማዳንዳኔ።» »

42 ዬካፓ ጳውሎሴና ባርናባሴና ዓይሁዴ ዓሶኮ ቡከንቶ ቤዛፓ ከሰካኣና ዬኖ ዴያታ ከኤዜዜሎ ሙካ ዴያቶኮ ሃውሾ ከሎና ላሚ ዴያቶም ከኤዘንዳጉዲ ዓሳ ጳውሎሴንሢ ሸኢቁኔ።

13:28 13:28 ማቲ. 27:22-23፤ ማር. 15:13-14፤ ሉቃ. 23:21-23፤ ዮሃ. 19:15።
 13:29 13:29 ማቲ. 27:57-61፤ ማር. 15:42-47፤ ሉቃ. 23:50-56፤ ዮሃ. 19:38-42።
 13:31 13:31 ዳከ. ማዕ 1:3። 13:33 13:33 ዓይኦ. 2:7። 13:34 13:34 ዓሲ. 55:3። 13:35 13:35 ዓይኦ. 16:10።

43 ዓይሁዳ ዓሰኮ ቡከንታ ላኣሊንታዛ ሚርጌ ዓይሁዳ ዓሰና ሜሌ ዓሰታዎ ዓይሁዳ ካኣዠ ጌሌ ዓሳ ጳውሎሴና ባርናባሴና ጊንዖ ዓኣዳኔ፤ ጳውሎሴንሢኮ ዓሰ ያኦሲ ባኮ ዔርዚ ሃሃ ያኦሲኮ ኮሹሞ ዒንጊዖና ደዲ ዓሳ ናንጋንዳጉዲ ላቲ ከኤዜኔ።

44 ለምዓሳ ዓይሁዳ ዓሰኮ ሃውሾ ከሎና ካታማ ናንጋ ዓሰይዳገ ደካ ዓሲ ዓታዛ፣ ሃንጎ ዓሳ ቢያ ያኦሲ ቃኣሎ ዋይዛኒ ሙኪ ቡከኔ።

45 ዓይሁዳ ዓሳ ዴርኮ ሚርጉሞ ዛጋዖ ዒናገ ቁኢሪ፥ ጳውሎሴኮ ሃይሶሞ ማኪ ዒዛ ጫሽከኔ። 46 ጳውሎሴና ባርናባሴና ጋዓንቴ፡- «ቤርታዲ ያኦሲ ቃኣላ ዒንሢሞ ከኤዚንታኒ ኮይሳኔ፤ ዒንሢ ዔይዔ ጌዒ፥ ናንጊና ናንጊ ኦም ኮይሱሞሴ ጌዔቶ ዓካሪ ኦኡኒ ሃሺ ዓይሁዳ ማዒባኣ ዓሰ ባንሢ ዓኣዳንዳኔ። 47 ዓይጎር ጌዔቶ፡-

፡ዓጫ ጉቤ ኔ ዛሎና ዳቃንዳጉዲ ሜሌ ዴርሞ ፖዒ ታ ኔና ማሄኔ ጌዒ ጎዳ ዓይሢሢርከ» ጌዒ ጫርቂ ዔያቶም ከኤዜኔ።

48 ዓይሁዳ ማዒባኣ ዓሳ ዬያ ዋይዛዖ ዎዛዳኔ፤ ያኦሲ ቃኣሎሞ ዔያታ ቦንቹኔ፤ ናንጊና ናንጎም ደኦሪንቴዞንሢኮ ቢያ ዒማና ኪሪሰቶሴ ጉሙርቄኔ።

49 ጎዳኮሞ ቃኣላ ዬኖ ዓጫ ቢያ ሄሌኔ። 50 ዓይሁዳኮ ሱኡጋ ጋዓንቴ ዓይሁዳ ካኣዠ ካኣሽካ ዖርጎጮ ላኣሎና ካታሞኮ ፑኡጉ ፑኡጉ ዓሰ ፔ ባንሢ ማሃ ጳውሎሴና ባርናባሴና ዒዳንቲ ደውሲንታንዳጉዲ ማዲ ዓጫገ ዔያቶ ከሴኔ። 51 ዒማና ጳውሎሴና ባርናባሴና ዒንሢና ባዴዔ ጋዓ ማርካ ዔያቶም ማዓንዳጉዲ ቶኮ ሲላሎ ፒዒ ዒቆኒዮ ዓጫ ዓኣዳኔ። 52 ኪሪሰቶሴ ጉሙርቃ ዓሳ ኮሺ ዎዛዲ ሃሃ ዓያና ጌኤሺያ ኮሙሢ ዎልቄና ዔያቶይዳ ማዲያ ማዔኔ።

14

ጳውሎሴና ባርናባሴና ዒቆኒዮይዳ

1 ዓንዖከያይዳ ዔያታ ማዴ ጎይዖ ሃሃ ዒቆኒዮ ዓጫይዳ ጳውሎሴና ባርናባሴና ዓይሁዳ ዓሰኮ ቡከንቶ ቤዞ ጌሊ፥ ዒኣካ ዴኤፕ ዎልቄና ዔያታ ያኦሲ ባኮ ከኤዜሢሢር ሚርጌ ዓይሁዳ ዓሰና ጊሪከ ዓሰና ኪሪሰቶሴ ጉሙርቄኔ። 2 ኪሪሰቶሴ ጉሙርቄዖ ዒዳ ዓይሁዳ ዓሳ ዓይሁዳ ማዒባኣ ዓሰ ዴሚና ዞሪ ኪሪሰቶሴ ጉሙርቄ ዓሰ ዒዓንዳጉዲ ማሄኔ። 3 ጳውሎሴና ባርናባሴና ጋዓንቴ ጎዳ

13:47 13:47 ዓ.ሲ. 42:6፤ 49:6። 13:51 13:51 ማቲ. 10:14፤ ማር. 6:11፤ ሉቃ. 9:5፤ 10:11።

ዛሎ ጫርቄ ከኤዚ ከኤዚ ዒኢካ ሚርጌ ዋዴ ዴዔኔ፤ ጎዳኣ ዒያቶም ደቃሣ ባኣዚና ጸኦሲ ዋልቁና ማዳንታ ዓኪ ባኣዚ ማዳንዳ ቢታንቶ ዒንጊ ዒዛኮ ኮሹሞና ዒንጊንቴ ቃኣላ ጎኔ ማዔሣ ፔጋሴኔ። 4 ካታሞይዳ ናንጋ ዓሳ ጋዓንቴ ላምዖ ቤሲ ፓቁንቴ ዛላ ዓይሁዶ ዓሶና፤ ዛላ ሃሣ ዳከንቴዞንሢኮ ዋላ ማዔኔ።

5 ዓይሁዴ ማዒባኣ ዓሶና ዓይሁዴ ዓሶና ሃሣ ዒያቶኮ ሱኡገና ዋላ ማዒ ጳውሎሴና ባርናባሴና ዒያታ ሜታሳኒ፤ ጊንሣ ሹቻ ዲዒያ ዋዳኒ ኮዔኔ። 6 ጳውሎሴና ባርናባሴና ዬያ ዔራዖ ሊቃዖኒያይዶ ሊሰፃራና ዳርቤና ጌይንታ ካታሞ ሃሣ ኮይሎይዳ ዓኣ ዓጮ ባንሣ ፑንጊንቴ ዴንዴኔ። 7 ዒኢካ ኮዠ ሃይሶዋ ከኤዘኔ።

ጳውሎሴና ባርናባሴና ሊሰፃራና ዳርቤናይዳ

8 ሊሰፃራይዳ ቶኪ ሲሌ፤ ፔቴ ዋሶ ዓሲሰኬያ ዓኣኔ፤ ዬይ ዓሣ ሹይንቴማፓ ዓርቃዖ ዋሶ ማዔሣረ ቶኪና ሃንቲ ቤቁባኣሴ፤ 9 ዬይ ዓሣ ጳውሎሴ ከኤዛኣና ዴዒ ዋይዛንቴ፤ ጳውሎሴ ዓሣ ኮሺ ዛጋዖ ዓሣኮ ፔና ዳቁሻንዳ ጉሙርቁሣ ዓኣያ ማዔሣ ዴንቁ፤ 10 ፔ ዑኡዘ ዴጊዲ፡- «ሉካ ኔኤሮ ዔቁ!» ጌዔሰካፓ ዓሣ ላዓ ጌዒ ዔቁ ሃንቲሣ ዓርቁኔ። 11 ዓሳ ዬያ ጳውሎሴ ማዳ ባኮ ዛጋዖ ፔኤኮ ዑኡዘ ዴጊዲ ሊቃዖኒያ ዓጮ ሙኡጮና፡- «ካኣሽኮ ጸኦዛ ዓሲ ማሎና ኑ ባንሣ ከዴኔ!» ጋዓዖ፤ 12 ዔያታ ባርናባሴኮ ሱንዖ «ዲያ» ጌዔኔ፤ ጳውሎሴ ዒያቶም ባሽ ከኤዛሣታሣረ ዒዛ ዔያታ «ሄርማኔ» ጌዔኔ። 13 ዬማና ካታሞኮ ዙላ ዓኣ ዲያ ጌይንታ፤ ዓይሁዶ ዓሶኮ ጌኤዠ ማኣሮ ቁኤሳሣ ዚያ ጌማይና ቡኒና ካታሞኮ ጌሎ ካሮ ባንሣ ዔኪ ሙኪ ዴሮና ዋላ ማዒ ጳውሎሴና ባርናባሴናም ዒንጎ ባኣዚ ማሄ ሸኢሻኒ ኮዔኔ።

14 ጳውሎሴና ባርናባሴና ጋዓንቴ ዬያ ዋይዛዖ ገዬ ዓፒሎ ፔኤኮ ዳርዘ፤ ዒላቲ ዒላቲ ዴሮ ባንሣ ጳሽኪ ሙኪ ሃዚ ጌዔኔ፡- 15 «ዒንሣ ሃይ ዓሳ፤ ዓይጎሮ ሃያይዳይ? ኑኡኒያ ዒንሣጉዲ ዓሲከ፤ ኑኡኒ ሃይካ ሙኬሣ ዒንሣ ሃያ ጉሪ ማዔ ካኣዠ ሃሽ፤ ሳዖንታ ዴኤፖ ዋኣዖ ባዘንታ ዬያቶኮ ጌዳ ዓኣ ባኮ ቢያ ማገፍ ናንጊና ናንጋ ጸኦዛሣ ባንሣ ማዓንዳጉዲ ኮዠ ሃይሶ ኑ ዒንሣም ከኤዛኒከ፤ 16 ሃያኮ ቤርታ ሚናኣ ዋዶና ዴራ ፔ ሹኔ ጌዔ ጎይሣ ዓኣዳንዳጉዲ ጸኦሲ ዔያቶ ሃሹኔ፤ 17 ያዲ ማዔቶዋ ጸኦሲ ኮሺ ማዳ ሃሹሞዖ ማዲያና ዒዚ ዓኣያ ማዒያ ማርካሴኔ። ዬያ ዒ ማርካሴሣ፡- ጫሪንጫፓ ዒርዚ ዒንሣም ዋርቁሲያና ሃኣካ ዒንሣም ካፍንዳጉዲ ቃራ ዋዴ ዒንጊያና፤ ሃሣ ዒንሣ ሙኡዚ ዴንቁ

14:15 14:15 ከሲ. ማፃ 20:11፤ ዓይኑ. 146:6።

ሚርጌና ዋዛዳንዳጉዲያ ማሂያናኬ።» 18 ዳከንቴዞንሢኮ ያዲ ጌዒ ኬኤዜያ ማዕቶዎ ደራ ዔያቶም ዒንጋ ዒንጊዎ ሺኢሹዋጉዲ ዔያታ ሃሺሴሢሢ ሚርጌ ሜቶናኬ።

19 ዓይሁድ ዓሳ ጋዓንቴ ዓንጾኪያና ዒቆኒዮ ዓጮናይዳጋ ዒኢካ ሙኪ ዳሮ ፑርታ ማሊሲሢና ዔያቶ ባንሢ ማሄሰካጋ፣ ጳውሎሴ ዔያታ ሹቻ ዲዒ «ዎዳኔ» ጌዒ ጎቺ ካታማጋ ኬሴኔ። 20 ጋዓንቴ ኪሪሰቶሴ ጉሙርቃ ዓሳ ሙኪ ዒዛኮ ዓጫ ዔቃዛ ጳውሎሴ ዔቂ ካታሞ ጊንሣ ማዒ ጌሌኔ፤ ዩካጋ ዚሮ ጉቴሎ ባርናባሴና ዎላ ዳርቤ ዒዚ ዓኣዳኔ።

ጳውሎሴና ባርናባሴና ሶኦሪያይዳ ዓኣ ዓንጾኪያ ማዒያ

21 ጳውሎሴና ባርናባሴና ዳርቤይዳ ኮዦ ሃይሶ ኬኤዚ ሚርጌ ዓሲ ኪሪሰቶሴ ጉሙርቃንዳጉዲ ማሄኔ። ዩካጋ ሊሰጺራና ዒቆኒዮ ጌዳና ጌዒ ዓንጾኪያ ዓጮ ዳንዳኔ። 22 ዩያቶ ዓጮ ቢያሢዳ ኪሪሰቶሴ ጉሙርቃ ዓሳ ጉሙርቂያና ደዳንዳጉዲ ደደሺ ደደሺ ሃሣ ዘሪ ዘሪ፡- «ዎኦሲ ካኣቱሞይዳ ጌላኒ ኑና ሚርጌ ሜቶ ዔካንዳያ ኮይሳኔ» ጌዒ ጌዒ ዔርዜኔ። 23 ሃሣ ሺኢጲዮ ማኣሮኮ ጨሚያ ዔያታ ደኦሪ፡ ሙኡዚ ሃሺ ሺኢቆ ሺኢጲዮ ሺኢቆሰካጋ ዔያታ ጉሙርቂ ጎዳሢሞ ሃዳርሲ ዔያቶ ዒንጌኔ።

24 ዩካጋ ጲሲዲያ ዓጮ ጌዳና ጌዒ ጲንፐሊያ ዓጮ ዳንዳኔ፤ 25 ጲርጌይዳ ቃኣሎ ኬኤዜሰካጋ ዓፃሊያ ዓጮ ኬዳኔ፤ 26 ዩካጋ ዔያታ ዎኣያ ካኣሚሎ ቶጊ ሶኦሪያይዳ ዓኣ ዓንጾኪያ ጊንሣ ማዔኔ፤ ሶኦሪያ ጌይንታ ቤዜላ ዔያታ ማዳ ማዶኮ ቤርታዲ ዓይሢያ ሃዳራ ዔያቶም ዒንጊንቴ ካታሚሎኬ።

27 ዒኢካ ዔያታ ሄላጾ ኪሪሰቶሴ ጉሙርቃ ዓሳ ፔቴይዳ ቡኩሲ፣ ዎኦሲ ዔያቶና ዎላ ማዒ ማዳ ባኮ ቢያሢና ዓይሁዳ ማዒባኣ ዓሳ ኪሪሰቶሴ ጉሙርቃንዳጉዲ ዎዲ ዔያቶም ካራ ቡሊንቴቴያ ዓሰም ኬኤዜኔ። 28 ኪሪሰቶሴ ጉሙርቃ ዓሰና ዎላ ሚርጌ ዎዴ ዔያታ ዴዔኔ።

15

ዩሩሳላሚይዳ ቡኮና ቡኪንቴ

1 ፔቴ ፔቴ ዓሳ ዓንጾኪያ ዓጮ ዳንዳ፡- «ሙሴ ዎጎ ጎይዎ ዓቲንቶ ቤርቶ ዒንሢ ቴቂንቴባኣቶ ዳቃኒ ዳንዳዑዎሴ» ሂዚ ጌዒ ኪሪሰቶሴ ጉሙርቃ ዓሰ ዔርዚሢሢ ሳርቄኔ። 2 ጳውሎሴና ባርናባሴና ጋዓንቴ ዩሩ ዛሎ ዓሰና ዎላ ኮሺ ማርሜኔ፤ ዩካጋ ጳውሎሴና

15:1 15:1 ለዊ. ዓክ 12:3፤ ዳኪ. ማዳ 10:1-43።

ባርናባሴና ዓንጾኪያይዳ ዓኣ፡ ፔቴ ፔቴ ኪሪሰቶሴ ጉሙርቃ ዓሲና
ዎላ ማዒ ዩሩሳላሜ ዓኣዲ ዬኖ ማሊያ ዳኪንቴዘንሢኮ ጨፍናም
ሺኢሻንዳጉዲ ጌይንቴ።

3 ዔያታ ሺኢጲያ ማኣሮ ዓሳ ዔያቶ ዳኪም ዴንዲ ፒንቄና
ሳማሪያ ዓጮ ጌዴና ዓኣዳጎ ዓይሁዴ ማዒባኣ ዓሶኮ ጾኦሲ ባንሢ
ማዒያ ዛሎ ኬኤዛዛ፡ ዬይ ሃይሳ ኪሪሰቶሴ ጉሙርቃ ዓሶ ቢያ
ዎዛሴ። 4 ዬካፓ ዩሩሳላሜ ዔያታ ሄላዛ ሺኢጲያ ማኣሮ ዓሶና
ዳኪንቴዘንሢኮ ሃሃ ጨማኣ ዔያቶ ሸኦቲንሢ ዔኬ፤ ሃሃ ጾኦሲ
ዔያቶና ዎላ ማዒ ማዴ ባኮ ቢያ ዔያቶም ኬኤዜ። 5 ጋንቴ ፔርሴ
ፃጰፓ ማዒ ፔቴ ፔቴ ኪሪሰቶሴ ጉሙርቃ ዓሳ ዔያቶ፡- «ዓይሁዴ
ማዒባኣ ዓሳ ዓቲንቶ ቤርቶ ቲቂንታንዳጉዲና ሙሴ ዔርዜ ዎሳ
ካፓንዳጉዲ ዓይሃንዳያ ኮይሳ።» ጌዔ።

6 ዬያሮ ዳኪንቴዘንሢኮ ጨፍና ዬኖ ዛሎ ዎላ ዘርታኒ ቡኬ፤
7 ዔያታ ሚርጌና ማርሜሢኮ ጊንፃ ጳዲሮሴ ዔያቶ፡- «ታ ዒሸንሃ!
ታ ሚሸንሃ! ዓይሁዴ ማዒባኣ ዓሳ ታ ዛሎና ኮኮ ሃይሶ ዎይዚ
ኪሪሰቶሴ ጉሙርቃንዳጉዲ ሃያኮ ቤርታ ጾኦሲ ታና ዒንሢ ባኣካፓ
ደኦሪሢ ዒንሢ ዔራ። 8 ዓሲኮ ዒና ዔራ ጾኦሲ፡ ኦም ዓያኖ ጌኤኮ
ዒንጌሢ፡ ዒ ዔያቶማኣ ዒንጌጾና ዔያቶ ፔ ዓሲ ማሃሢ ዔርዜ።
9 ዔያታ ዒዛ ጉሙርቆሢሮ ጎሞ ዔያቶኮ ዒ ጌኤሽ፤ ዬያሮ ኦኦና
ዔያቶና ባኣካ ፔቴታጎ ዲሙሞ ባኣሴ። 10 ዓካሪ ኦ ዓደንሢታጎ
ሃሃ ኦኦኒያ ኬዳኒ ዳንዳዒባኣ ቃምባሮ ኪሪሰቶሴ ጉሙርቃ ዓሶ
ባቃኖይዳ ጌሢ ጾኦሲ ዎይታቴያ ኦ ዛጋንዳ፤ ዒንሢ ሃሃ ዓይጎሮ
ጋዒ? 11 ኦኦኒያ ዳቂሢ ጎኔና ዔያቶጉዲ ጎዳ ዬሱሴኮ ኮሹሞ
ዒንጌጾና ማዒሢ ኦ ጉሙርቆ።» ጌዔ።

12 ዬማና ዴራ ባርናባሴና ጳውሎሴ ዛሎና ጾኦሲ ዓይሁዴ
ማዒባኣ ዓሶ ባኣካ ማዴ ዒዛ ዎልቆና ማዲንቴ ባኮንታ ዲቃሃ
ባኮ ቢያ ዔያታ ኬኤዛኣና ዚቲ ጌይ ዔያቶሲ ዎይዛ። 13 ዔያታ
ኬኤዚ ኩርሴሰካፓ ያይቆኦ፡- «ታ ዒሸንሃ! ታ ሚሸንሃ! ሂንዳ
ዎይዙዎቲ፤ 14 ጾኦሲ ዓይሁዴ ማዒባኣ ዓሶ ባኣካፓ ፔኤም ማዒንዳ
ዴሬ ደኦሪያና ዔያቶም ዎማይዲ ማሌቶም ሲሞኦኔ ቤርታዲ
ኬኤዜ። 15 ሃኖ ማሊያና ጾኦሲ ማሊያ ኬኤዛ ዓሶኮ ቃኣሎና ዎሊ
ማሊያኬ፤ ዬይያ፡-

16 ዬካፓ ታ ማዒንዳ፤

ዳውቴኮ ሻሂንቴ ማኣሮ ታ ማከንዳ፤

ሻሂንቴ ላኣሊንቴ ባኮዎ ጊንሢ ታ ደዲሺ ዔቂሳንዳ።

17 ዬያ ታ ማዲንዳሢ ሃንጎ ዓቲ ዓኣ ዓሶንታ

ታ ዓሶ ማዔ፥ ሜሌ ዴራ ቢያ ታና ኮዓንዳጉዲኬ፤
18 ቤርታፓ ዓርቂ ዬያ ቢያ ፔጋሴ፥ ጎዳሢ ሂዚ ጋዓኔ ጌይንቴ
ፃኣፒንቴያኬ።

19 «ዬያሮ ታኣኮ ማሊፃ ያኦሲ ባንሢ ማዓ ዓይሁዴ ማዒባኣ ዓሶ
ኵኡኒ ሜታሲባኣቴ ኮሺኬ ጋዓያኬ። 20 ዬያይዳፓ ለሜሌ ካኣሺም
ሹኪንቴ፥ ዒኣቴ ባኣዚ ሙዒፖቴ፤ ማቾ ሃሣ ዓኒ ማዒባኣ ዓሲና
ላሂፖቴ፤ ሱጉሢ ሾኦቴ ባኣያ፥ ጨኡሊንቴ ሃይቄ ቆልሞ ሙዒፖቴ፤
ሱጉሢያ ዑሽኪፖቴ፥ ጌዒ ኑ ዔያቶም ፃኣፓንዳኤ። 21 ዓይጎሮ ጌዔቶ
ሚናፓ ዓርቃም ሙሴ ዔርዜ ዎጋ ዓይሁደኮ ሃውሾ ኬሎና ዔያቶኮ
ቡኪንቶ ቤዛ ናባቢንታኔ፤ ሃሣ ቃኣላ ካታሞይዳ ቢያ ኬኤዚንታኔ»
ሂዚ ጌዔኔ።

ዓይሁዴቱዎን ኪሪሰቶሴ ጉሙርቄ ዓሶም ፃኣፒንቴ ኪኢታ

22 ዬካፓ ዳኪንቴዘንሢኮንታ ጨሞንታ ሺኢጲያ ማኣሮ ዓሶ
ቢያሢንታ ዎላ ማዒ ቡኪንቴ ዓሶ ባኣካፓ ዳካ ዓሲ ደኦራዎ
ጳውሎሴና ባርናባሴና ዎላ ዓንዎኪያ ዓጮ ዳካኒ ጌሰቴ ዔቁሴኔ፤
ዬያሮ ኪሪሰቶሴ ጉሙርቃ ዓሶ ባኣካ ዓሶ ዔኪ ዓኣዲሢና
ኮሺ ሱንሢ ዓኣ፥ ቤርሲያኔ ጌይንታ ዪሁዳና ሲላሴና ዔያታ
ደኦራኔ። 23 ዬካፓ ፃኣፒንቴ ኪኢቶ ዔያቶ ዑፃ ዳኬኔ፤ ኪኢታ፡-
«ኵኡኒ ዳኪንቴዘንሢኮ ጨሞ ማዔ ዒንሢኮ ዒሾንሢ፥ ዓንዎኪያና
ሶኦሪያናይዳ ሃሣ ኪልቁያይዳ ናንጋ ዓይሁዴ ማዒባኣ ኑ ዒሾንሢ
ዒንሢ ኮሺዳ ኑ ጋዓኔ፤ 24 ኑ ባኣኮይዳፓ ፔቴ ፔቴ ዓሲ ኑ
ዔያቶ ዓይሢባኣንቴ ዒንሢ ኮራ ሙኪ ዒንሢም ኬኤዜ ቃኣሎና
ሜታሲ፤ ሃሣ ዒንሢም ጎይሢ ባይዜሢ ኑ ዎይዜኔ፤ 25 ዬያሮ
ፔቴይዳ ቡኪንቴ ኪኢታ ዓሲ ኑ ደኦራሰካፓ ናሽኪንታ ኑ ዒሾንሢ
ባርናባሴና ጳውሎሴና ዎላ ዔያቶ ኑ ዒንሢ ባንሢ ዳካኒ ጌሰቴ።
26 ባርናባሴና ጳውሎሴና ኑ ጎዳሢ ዬሱሰ ኪሪሰቶሴ ዛሎሮ ፔ
ሹምፓሢ ሚርጌ ሜቶም ዓኣሢ ዒንጌያኬ። 27 ኑ ጌሰቴ ሃይሶ
ዳንጋና ቃሲ ዒንሢም ኬኤዛንዳጉዲ ዪሁዳና ሲላሴና ኑ ዳኬኔ።
28 ሃንሢ ፓይዲንቴ፥ ኮይሳ ባኮንሢፓ ዓታዛ ሜሌ ዴኤሢ ቃምባራ
ኑ ዒንሢ ዑፃ ጌሁዎጉዲ ዓያሮ ጌኤዦና ኵኡናናም ኮሺ ማዒ ጴዳኔ፤
ዬንሢያ፡- 29 ሜሌ ካኣሺም ሹኪንቴ፥ ዒኣቴ ባኣዚ ሙዒፖቴ፤
ሱጉሢ ሾኦቴዎንቴ ጨኡሊንቴ ሃይቄ ቆልሞ ሙዒፖቴ፤ ሱጉሢያ
ዑሽኪፖቴ፤ ማቾ ሃሣ ዓኒ ማዒባኣ ዓሲና ላሂፖቴ፤ ዬንሢ ባኮፓ

15:18 15:18 ዓሞ. 9:11-12። 15:20 15:20 ኬሲ. ማፃ 34:15-17፤ ለዊ. ዓኬ
17:10-16፤ 18:6-23።

ዒንሢ ካፒንቴቶ ኮሺ ባአዚ ዒንሢ ማዳኔ፤ ዓካሪ ኮሺ ናንጉዋቴ» ሂዚ ጋዓያኩ።

30 ዬካፓ ኪኢቶ ዓሶንሢ ዔያቶ ሳራሣፆ ዓንፆኪያ ዓጮ ዴንዲ፥ ኪሪሰቶሴ ጉሙርቃ ዓሶ ቢያ ቡኩሲጋፓ ፃኣፒንቴ ኪኢቶ ዔያቶም ዒንጌኔ። 31 ኪሪሰቶሴ ጉሙርቃ ዓሳ ፃኣፒንቴ ኪኢቶ ናባባፆ ዳኪንቴ፥ ዶዲሻ ኪኢቶና ኮሺ ዋዛዳኔ። 32 ዪሁዳና ሲላሴና ፆኦሲ ማለሢ ኬኤዛያታሢሮ ዒሾንሢ ማዔ ዓሶ ሚርጌ ቃኣላና ዞሪ ዶዲሾኔ። 33 ዪሁዳና ሲላሴና ዒኢካ ዳካ ዋዴ ዴዔሰካፓ ኪሪሰቶሴ ጉሙርቃዞንሢ ዔያታ ሳራሢ ዔያቶ ዳኬ ዓሶ ባንሢ ማዒ ዴንዴኔ። *

35 ጳውሎሴና ባርናባሴና ኪሪሰቶሴ ጉሙርቃ ማሌ ሚርጌ ዓሲና ዋላ ማዒ ጎዳኮ ቃኣሎ ዔርዚ ዔርዚ ሃሣ ኬኤዚ ኬኤዚ ሚርጊባኣያ፥ ዳካ ዓጊኒ ዓንፆኪያይዳ ዴዔኔ።

ጳውሎሴና ባርናባሴናኮ ዲማዲያ

36 ሚርጊባኣያ፥ ዳካ ዓጊኒኮ ጊንፃፓ ጳውሎሴ ባርናባሴ ኮራ፡- «ሃኒ ሙኬ፤ ሃያኮ ቤርታ ጎዳኮ ቃኣሎ ኑ ኬኤዜ ካታም ቢያይዳ ዓኣ ዒሾንሢንታ ሚሾንሢታ ሃንቲ ሃንቲ ዔያታ ዋይቴቴያ ኑ ዛጎም» ጌዔኔ። 37 ዒማና ባርናባሴ ዮሃኒሴ ጌይንታ ማርቆሴ ዔያቶና ዋላ ዓኣዳንዳጉዲ ኮዔኔ። 38 ጳውሎሴ ጋዓንቴ ዬይ ዓሢ ዔያቶና ዋላ ዓኣዳንዳጉዲ ኮዒባኣሴ፤ ዓይጎሮ ጌዔቶ ዒዚ ቤርታ ጸንፒሊያይዳ ዔያቶፓ ዲማዲ ዓቴሢሮና ሃሣ ማዶይዳ ዔያቶና ዋላ ዓኣዲባኣሢሮኬ። 39 ዬኖይዳፓ ዔቄያና ዔያቶ ባኣካ ፑኡፒ ማርማ ዔቃዛ፥ ዔያታ ዋሊፓ ዲማዴም ባርናባሴ ማርቆሴ ዔካፆ ዋኣያ ካኣሚሎና ቆጶሮሴ ዓኣዳኔ። 40 ጳውሎሴ ጋዓንቴ ሲላሴ ዶኦሬኔ፤ ኪሪሰቶሴ ጉሙርቃ ዓሳ ጎዳሢ ጳውሎሴንሢ ፔ ኮሹዋና ካፓንዳጉዲ ሺኢጶሢና ሃዳርሲ ዒንጌሰካፓ ዔያታ ዓኣዳኔ። 41 ዒማና ዔያታ ሺኢጶያ ማኣሮ ዓሶ ዶዲሻ ዶዲሻ ሶኦሪያና ኪልቂያ ጌይንታ ዓጮ ሃንቴኔ።

16

ፂሞቴዎሴኮ ጳውሎሴና ሲላሴና ዋላ ማዒያ

1 ጳውሎሴ ዳርቤና ሊሰፂራና ጌይንታ ዓጮ ዴንዴኔ፤ ሊሰፂራይዳ ፂሞቴዎሴ ጌይንታ ኪሪሰቶሴ ጉሙርቃ ዓሲ ናንጋኔ፤

* 15:33 15:33 ፔቴ ፔቴ ሚናኣ ማፃኣፓ ፓይ. 34ይዳ «ሲላሴ ጋዓንቴ ዒኢካ ዓታኒ ኮዔኔ» ጋዓያ ቃሳኔ፤ ጋዓንቴ ዛሎ ማፃኣፖይዳ ፓይ. 34 ባኣሴ። 15:38 15:38 ዳኪ. ማዳ 13:13።

ዒንዳ ዒዛኮ ዓይሁዴ ፃጳጋታዎ ኪሪሰቶሴ ጉሙርቁያኬ፤ ዓዴ ጋዓንቴ ዒዛኮ ዓይሁዴ ማዒባኣ ገሪኬ ዓጪ ዓሲኬ። 2 ሊሰፂራና ዒቆኒዮንናይዳ ዓኣ ኪሪሰቶሴ ጉሙርቁ ዓሳ ፂሞቴዎሴ ሚርጌ ኮሺ ዓሲ ማዔሢ ማርካዳ። 3 ጳውሎሴ ፂሞቴዎሴ ዔኪ ዓኣዳኒ ኮዔሢሮ ዓተንቶ ቤርቶ ተቁንታንዳጉዲ ማሃኔ፤ ዬያ ዒ ማዴሢ ዬኖ ቤዘይዳ ዓኣ ዓይሁዴ ዓሶ ዛሎሮኬ፤ ዓይጎሮ ጌዔቶ ዔያታ ፂሞቴዎሴኮ ዓዴ ገሪኬ ዓሲ ማዔሢ ዔራያታሢሮኬ። 4 ጳውሎሴና ሲላሴና ሚርጌ ካታሞ ተቁ ዓኣዳኣና ዬራሳላሜይዳ ዓኣ ዳኪንቴዘንሢኮና ጨሞና ማሊ ቱኬ ባኮ ኪሪሰቶሴ ጉሙርቁ ዓሶሞ ኬኤዜኔ፤ ዔያታ ማዶይዳ ፔኤሻንዳጉዲያ ሃሣ ላቴኔ። 5 ዬያሮ ዲማ ዲማ ሺኢጲያ ማኣሮ ዓሳ ኪሪሰቶሴ ጉሙርቁያና ደዴኔ፤ ፓይዳኣ ዔያቶኮ ኬሎይዳ ኬሎይዳ ቃሲንቴ ዴንዴኔ።

ጳውሎሴኮ ሜቁዶኒያ ዓጮ ዓኣዳንዳጉዲ ዓይሢንቴዎ

6 ጳውሎሴና ሲላሴና ዒሲያይዳ ቃኣሎ ኬኤዘዋጉዲ ዓያና ጌኤሺ ዔያቶ ላኣጌሢሮ ፒርጌያና ጋላቴያ ዓጮ ጌዴና ተቁ ዔያታ ዴንዴኔ፤ 7 ዬካፓ ዔያታ ሚሲያ ዓጮኮ ዛጳ ሃላዎ ቢታኒያ ባንሢ ዓኣዳኒ ማሌኔ፤ ጋዓንቴ ዬሱሴኮ ዓያና ዒኢካ ዔያታ ዓኣዳንዳጉዲ ዓይሢባኣሴ። 8 ዬያሮ ዔያታ ሚሲያ ዓጮና ጌዒ ፂሮዓዳ ዴንዴኔ። 9 ዒዛ ቤዘይዳ ዲሞና ፔቴ ሜቁዶኒያ ዓሲ ዔቁ ጴዳዎ ጳውሎሴ ኮራ፡- «ሜቁዶኒያ ባንሢ ፒንቁኑና ማኣዴ!» ጌዒ ጌዒ ዒዛ ሺኢቃያ ያኦሲ ፔጋሲ ጳውሎሴም ዳዌኔ። 10 ጳውሎሴ ዬያ ዛጌሰካፓ ዑኬና ሜቁዶኒያ ዓጮ ዓኣዳኒ ኑ ኮዔኔ፤ ዓይጎሮ ጌዔቶ ሜቁዶኒያ ዓጮ ዓሶሞ ኮኩ ሃይሶ ኬኤዘም ያኦሲ ኑና ዓይሢያ ማዔሢ ኑ ዔሬሢሮኬ።

ሊዲያ ጎዎዘኮ ኪሪሰቶሴ ጉሙርቁያ

11 ፂሮዓዳይዳፓ ዋኣዎ ካኣሚሎቶጊ ዓዔቃዎ ሳሞተራቁ ጌይንታ ዓጮ ኑ ዓኣዳኔ፤ ዚሮ ጉቴሎ ገንሣ ናጹሌ ኑ ዴንዴኔ። 12 ዬካፓ ሃሣ ኑ ዔቁ ፒልጲሲዮሴ ሃሌኔ፤ ፒልጲሲዮሴ ጌይንታዛ ሜቁዶኒያ ዓጮይዳ ዓኣ ካታሞይዳፓ ፔቴዘ ማዔያ ሃሣ ሮሜ ዓጮ ዓሳ ማዜ ካታማኬ፤ ዬኖ ካታሚሎይዳ ኑኡኒ ዳካ ኬሊ ዴዔኔ። 13 ዓይሁዴ ዓሶኮ ሃውሾ ኬሎና ካታማፓ ኬሰኪ ዋርዚ ዓቺ ኑ ኬዴኔ፤ ዬና ቤዛ ኑ ኮራ ሺኢጲሢ ቤሲ ማሌኔ፤ ዒዛ ቤዘይዳ ኑ ዴዒ ዒኢካ ቡኪንቴ ዓኣ ላኣሎም ያኦሲ ቃኣሎ ኬኤዜኔ። 14 ኑ ኬኤዛ ባኮ ዋይዛ ላኣሎይዳፓ ፔቴዘ ቲያፂርኔ ጌይንታ ካታሞይዳ ሾይንቴያ፡ ዘቁ ዓፒላ ኮርማያ፡ ሊዲያ ጎዎ ላኣሊሰኬኖኬ፤ ዒዛ ያኦሲ ካኣሻካ ላኣሊኬ፤ ጎዳሢ ዒዛኮ ዒኖ ቡሌያታሢሮ ጳውሎሴ ኬኤዛ ቃኣሎ

ዒዛ ዒናፓ ዋይዛኔ፤ 15 ዒዛና ዒዛኮ ማኣራ ዓኣ ዓሶና ቢያ ዋኣዎና ማሰቲሰካፓ፡- «ጎዳሢ ታ ጉሙርቃያ ማዒያ ዒንሢ ጎኔኬ ጋዓያ ማዒቶ ታ ማኣራ ሙኪ ዳዑዋቴ» ጌዒ ሚርጌና ሺኢቄኔ።

ጳውሎሴና ሲላሴናኮ ቱኡቲዎ

16 ፔቴ ኬሊ ያኦሲ ሺኢቆ ቤሲ ኑ ዳንዳንቴ ሎንሦ ባኣዚ ዠዋቶና ኬኤዛ፣ ፑርታ ዓያና ዓርቄ ፔቴ ማዳ ማዳ ዉዱሮ ናይሰኬና ጎይሢዳ ኑኡና ካኣሜኔ፤ ዬና ዉዱሮ ናዔላ ፔ ዠዋቶና ዒዛ ዋይሣ ዓሶም ሚርጌ ሚኢሹ ዳንቁሳያኬ። 17 ዒዛ ጳውሎሴና ኑኡናኮ ጊንያ ሃንቲ ሃንቲ፡- «ሃንሢ ዓሶንሢ፣ ዒንሢም ዳቁንቶ ጎይዎ ኬኤዛዘንሢ፣ ዳኤፖ ያኦዛሢ ማዳዘንሢ!» ጌዒ ጌዒ ዒላቴኔ። 18 ዬኖ ዒዛ ሚርጌ ኬሊ ማዳኔ፤ ጋፒንዎ ጳውሎሴ ዳጋዳፖ ጊንሢም ሺሪ ፑርቶ ዓያናሢ፡- «ጎዳ ዬሱሰ ኪሪሰቶሴ ሱንዎና ዒዛይዳፓ ኔ ኬሰካንዳጉዲ ታ ኔና ዓይሣኔ!» ጋዓዛ፣ ፑርቶ ዓያናሢያ ቤዛና ኬሰኬኔ።

19 ዒዛ ዋይሣ ዓሳ ዳንቁ ዔኪ ማኣዳንታ ባኮኮ ጎይዎ ባይቄያ ማዒሢ ዛጋፖ ዔያታ ጳውሎሴና ሲላሴና ዓርቄ፣ ጎቺ ጎቺ ዓሳ ቡኪንታ ቤዛ ኬሲ ካታም ዋይሣ ዓሶ ቤርቶ ሺኢሹኔ። 20 ዬካፓ ሮሜ ዓጮ ዋይሣ ዓሶ ቤርቶ ዔኪ ሙካዎ፡- «ሃንሢ ዓሶንሢ ዓይሁዳ ዓሲኬ፤ ሃሣ ካታምይዳኣ ዔያታ ሚርጌ ዠሎ ዓቁሲሳኔ፤ 21 ኑኡኒ ሮሜ ዓሳ ዔካኒና ማዳኒ ዓይሢንቲባኣ ባኣዚ ዔያታ ኬኤዛኔ» ጌዔኔ። 22 ዬያሮ ዳራ ዋሊ ዑፃ ማዒ ዋልቄና ዔያቶይዳ ዔቄኔ።

ዬካፓ ዋይሣ ዓሳ ጳውሎሴና ሲላሴናኮ ዓፒሎ ዑፃፓ ጉሲሳዎ ኮኣሎና ዓሳ ዔያቶ ጳርቃንዳጉዲ ዓይሣኔ። 23 ሚርጌና ዔያታ ጳርቄንቴሰካፓ ቱኡሲ ማኣሪ ጌልዚ ቱኪ፣ ቱኡዛ ማኣሮ ካፓ ዓሢ ዔያቶ ዛጊ ካፓንዳጉዲ ዓይሣኔ። 24 ካፓ ዓሢ ዓይሢንቴሰካፓ ቱኡዛ ማኣሮኮ ጋሮይዳ ዓኣ ሜሌ ቆልዓይዳ ጌልዚ ቶኮ ዔያቶኮ ዲፃና ኮሺ ዓይሢ ቱኬኔ።

25 ሳዎኮ ዳንዲ ጊዲሚሺ ማዓንዳ ዋይይዳ ጳውሎሴና ሲላሴና ሺኢጲሢ ሺኢቄ ሺኢቄ ሃሣ ዓይኑምዋ ዓይናዲ ዓይናዲ ያኦሲ ጋላታንቴ፤ ሃንጎ ቱኡቴ ዓሳ ዬያ ዔያቶኮ ዋይዛኔ። 26 ዒማና ዔርቲባኣንቴ ቱኡዛ ማኣሮኮ ያጸ ሄሊ ዓጊሣ ዳኤፒ ሳዓ ዓጊዒሢ ዓጊዳዛ፣ ቱኡዛ ማኣሮ ካራ ቢያ ፔቴና ቡሊንቴኔ፤ ሃሣ ቢያ ቱኡቴ ዓሶ ቱኮና ካኖ ቢራታኣ ቡሊንቴኔ። 27 ቱኡዛ ማኣሮ ካፓ ዓሢ ጊንዓሰካፓ ጳጪ ቱኡዛ ማኣሮ ካራ ቡሊንቴ ዓኣሢ ዳንቃዎ ቱኡዛ ዓሳ ቶሊ ዳንዴያ ዒዛም ማላዛ ዓፓሮ ፔኤኮ ቱጊ ፔና ዋዳኒ ማሌኔ። 28 ጋዓንቴ ጳውሎሴ፡- «ኑኡኒ ቢያሢ ሃይካኬ! ዬያሮ ኔ ቶኦኮይዳ ፔቴ ባኣዚታዎ ማዲፖ!» ጌዒ ዒላቴኔ።

29 ዬማና ካፓ ዓሢ ፖሊ ዔኪ ጳሽኪ ጋሮ ጌላዎ፣ ጎጋይቂ ጎጋይቂ ጳውሎሴና ሲላሴናኮ ቶኮ ዴማ ባሊቲና ሎኦሜኔ። 30 ዬካፓ ዔያቶ ዙሎ ኬሳዎ፡- «ታ ጎዳንሢኮ! ታ ዳቃኒ ዓይጎ ዎኦታንዳያ ኮይሳይ?» ጌዔኔ።

31 ዔያታ ዒዛም፡- «ጎዳ ዬሱሴ ጉሙርቁ፤ ኔናጎታ ኔ ማኣሮ ዓሶንታ ዳቃንዳኔ» ጌዔኔ። 32 ዬካፓ ጎዳሢኮ ቃኣሎ ዒዛና ዒዛኮ ማኣራ ዓኣ ዓሶናም ቢያ ዔያታ ኬኤዜኔ። 33 ዬማና ቱኡዙ ማኣሮ ካፓ ዓሢ ዬና ዎንቶ ዲማ ፔ ማኣሪ ዔኪ ዓኣዲ ኪያ ዔያቶኮ ማሰከኔ፤ ዬማፓ ኔጉዎፖ ዒዛና ማኣሮ ዓሶና ቢያ ዎኣፆና ማሰቲኔ።

34 ቱኡዙ ማኣሮ ካፓ ዓሢ ጳውሎሴና ሲላሴና ፔ ማኣሪ ዔኪ ዓኣዲ ሙኡዚ ዔያቶም ዓንገኔ፤ ማኣሮ ዓሶ ቢያሢና ዎላ ኪሪሰቶሴ ጉሙርቁሢሮዎ ዒ ዎዛዴኔ።

35 ሳዓ ካራዛ ዓጮ ዎይሢ ዓሳ፡- «ዔንሢ ዓሶንሢ ቡሊንቶንጎ» ጌዒ ፖኦሊሴሰከንሢ ዳከኔ።

36 ቱኡዙ ማኣሮ ካፓሢያ፡- «ዒንሢ ቡሊንታንዳጉዲ ዓጮ ዎይሢ ዓሳ ዓሲ ዳከሢሮ ዓካሪ ኬሰኪ ኮሺ ዓኣዲዎቲ» ጌዒ ጳውሎሴም ኬኤዜኔ።

37 ጳውሎሴ ጋዓንቴ፡- «ኑኡኒ ሮሜ ዓሲታንቴ ኔ ጌዳ ዎጉዎፖ ዓሳ ቡካ ቤዘይዳ ኑና ጳርቁ፣ ቱኡዙ ማኣራ ኑና ዔያታ ቱከኔ። ሃሢ ጊንሢ ቱኡዙ ማኣራፓ ዴሚና ኔ ኬሰካንዳጉዲ ዎዲ ዔያታ ጌዔይ? ዬይ ማዑዎሴ! ዔያታ ፔ ቶኦኪና ሙኪ ኑና ኬሶንጎ!» ጌዔኔ።

38 ፖኦሊሶንሢ ዬያ ዎይሢ ዓሶም ኬኤዛዛ ዎይሢ ዓሳ ጳውሎሴና ሲላሴና ሮሜ ዓጪ ዓሲ ማዔሢ ዔራፖ ዒጊጩኔ።

39 ዬያሮ ዔያታ ሙኪ፡- «ኑ ዳቤኔ፤ ማኣራዎቲ» ጌዒ፣ ቱኡዙ ማኣራፓ ዔያቶ ኬሳዎ ካታማፓኣ ዔያታ ዴንዳንዳጉዲ ሺኣቁኔ።

40 ጳውሎሴና ሲላሴና ቱኡዙ ማኣራፓ ኬሰኪ ሊዲያ ጎፖዞ ማኣሪ ጌሊ ዒኣካ ኪሪሰቶሴ ጉሙርቃ ዓሶ ዴንቁ፣ ዞሪ ዶዲሼሰካፓ ካታም ሃሺ ኬሰኪ ዴንዴኔ።

17

ጳውሎሴንሢ ቴሰሎንቄይዳ

1 ጳውሎሴና ሲላሴና ዓንፒጳሊሴና ዓጳሎኒያ ጎፖ ዓጮ ጊዴና ቴሰሎንቄ ዓኣዴኔ፤ ዒኣካ ዓይሁዶ ዓሶኮ ቡከንቲ ቤሲ ዓኣኔ።
2 ጳውሎሴ ቤርታፓ ዒዚ ዔራ ጎይፆና ዓይሁዶ ዓሶኮ ቡከንቶ ቤዛ፣ ሃይሢ ማይንቲ ዓይሁዶ ዓሶኮ ሃውሾ ኬሎና ኬሎና ጴዲ ጌኤዦ ማፃኣፓፓ ዔኪ ዓሶና ዎላ ጌሰቲኔ። 3 ዒማና ዒዚ ሜሲሃ ሜቶ ዔካንዳያ፤ ሃሢ ሃይቢፓኣ ዔቃንዳያ ኮይሳያ ማዔም ማዔሢ ፔጋሲ

ከኤዚ ከኤዚ፡- «ሃይ ዒንሢሞ ታ ከኤዛ ዩሱሴ ዒ ሜሲሃኑ» ጌዒ ጌዒ ከኤዛኔ። 4 ዩያሮ ፔቴ ፔቴ ዓሳ ቃኦሎ ዒና ዔኪ ጳውሎሴና ሲላሴና ዋላ ማዔኔ፤ ዩያጉዲ ያኦሲ ካኦሽካ ሚርጌ ጌሪኬ ዓሲንታ ካታሞይዳ ዔርቴ ዲቢ ላኦላንታ ቃኦሎ ዒና ዔኪ ዔያቶና ዋላ ማዔኔ።

5 ዓይሁዶ ዓሳ ጋዓንቴ ቁኢሩሞና ማዳባኦ ፑርታ ዓሲ ጎይፃፓ ጎይፃፓ ቡኩሲ ጌኔ ማዳንዳጉዲ ማሃኔ። ካታሞይዳኦ ዣላ ዔቃንዳጉዲ ማሃ ሃሃ ጳውሎሴና ሲላሴና ዒያሶኔ ማኦሪፓ ከሲ ዔኪ ዴር ቤርቶ ሸኢሻኒ ማኦር ካር ሃዒ ከኤሪጋር ጌሌኔ። 6 ጋዓንቴ ጳውሎሴንሢ ኮዒ ዔያታ ባይዜሢሮ ዒያሶኔና ፔቴ ፔቴ ኪሪሰቶሴ ጉሙርቃ ዓሲ ካታሞ ዋይሃ ዓሶ ቤርቶ ሸኢሻኒ ጎቺ ጎቺ ዔኪ ዓኦዳዎ፡- «ሃንሢ ዓሶንሢ ዓጮ ቢያ ፑርቲሲ ሃሃ ሃይካ ሙከኔ! 7 ዒያሶኔያ ዔያቶ ሸኦቺንሢ ዔከኔ፤ ዔያታ «ዩሱሴ ጌይንታ ሜሌ ካኦቲ ዓኦኔ» ጌይ ሮሜ ዓጮ ካኦቲኮ ዓይሢያ ዒዒ ማካኔ» ጌይሢና ዒላቲኔ። 8 ዴሮንታ ካታሞ ዋይሃ ዓሶንታ ዩያ ዋይዛዎ ዲቃቲ ዒኔ ዲጳኔ። 9 ዩካፓ ዋይሃ ዓሳ ዒያሶኔና ዒዛና ዋላ ዔኪ ሙኮና ዓሶንሢ ሚኢሹ ዓይሢሳዎ ሃሹኔ።

ጳውሎሴንሢ ቤኤሪያ ዓጮይዳ

10 ኪሪሰቶሴ ጉሙርቃ ዓሳ ሳዓ ዲዲሚኦና ቤኤሪያ ዓጮ ጳውሎሴና ሲላሴና ዑከና ዓኦዳንዳጉዲ ዳካዛ፤ ዒኢካ ዔያታ ሄላዎ ዓይሁዶ ዓሶኮ ቡከንቶ ቤዘ ጌሌኔ። 11 ቤኤሪያይዳ ዓኦ ዓይሁዶ ዓሳ ቲሰሎንቁይዳ ዓኦ ዓሶይዳፓ ፒዜ ማላሢና ዓኦያ ማዔሢሮ ቃኦሎ ዋይዚ ዴኤፒ ዋዛና ዔኪ ቃኦሎኮዋ ጎኑሞ ዔራኒ ቢያ ከሌ ጌኤኮ ማፃኦፓ ዛጋኔ። 12 ዩያሮ ዔያቶይዳፓ ሚርጌሢ ያኦሲ ጉሙርቁኔ፤ ጌሪኬ ዓሶይዳፓኦ ሚርጌ ያርጎቺ ላኦላ፤ ሃሃ ሜሌ ሚርጌ ዓቲንቁያ ያኦሲ ጉሙርቁኔ። 13 ጋዓንቴ ቲሰሎንቁይዳ ዓኦ ዓይሁዶ ዓሳ ጳውሎሴ ቤኤሪያይዳ ያኦሲ ቃኦሎ ከኤዜሢሢ ዋይዛዎ ዒኢካ ሙኪ ዴር ፑርታ ማላሢና ዔቁሲ ዣሎ ማከኔ። 14 ዒማና ኪሪሰቶሴ ጉሙርቃ ዓሳ ዑከና ጳውሎሴ ባዘ ዓጮ ዓኦዳንዳጉዲ ዳከኔ፤ ሲላሴና ጂሞቴዎሴና ጋዓንቴ ዒኢካ ዓቲኔ። 15 ጳውሎሴ ጎይያና ዓኦሢ ዓሳ ዒዛ ዓቲና ሄሌሴኔ፤ ዩና ዓሳ፡- «ሲላሴና ጂሞቴዎሴና ታ ኮራ ዑኮ ሙኮንጎ» ጋዓ ኪኢታ ጳውሎሴ ኮራፓ ዔኪ ቤኤሪያ ማዔኔ።

ጳውሎሴ ዓቲናይዳ

16 ጳውሎሴ ዓቲናይዳ ዴዒ ሲላሴና ጂሞቴዎሴና ካፓንቴ ካታሜሎይዳ ሜሌ ካኦሽ ባኦዚ ኩሜያ ማዔሢ ዛጋዎ ፔ ማሊያና

ማሊ ሜታዳኔ። 17 ዬያሮ ዓይሁዶ ዓሶኮ ቡኪንቶ ቤዘይዳ፣ ዓይሁዶ ዓሶና ጾኦሲ ካኣሽካ ገሪኬ ዓሶና ሃሃ ቦኦኮ ቤዘይዳ ጾዳ ዓሶና ዋላ ፔ ማሊያ ኬኤዚ ኬኤዚ ገሰቴኔ። 18 ዔፕቆሮሴ ሃሃ ዒሰቶኬ ዓሶ ገይንታ ዔሮ ዓሶይዳፓ ዒዛ ኮራ ዓሲ ሙኪ ሙኪ ማርማኔ። ዔያታ ዒዛና ማርማፖ ፔቴ ፔቴ ዓሳ፡- «ሃይ ገኤሲኮ ፃጺ ዔሩዋፖ ገሰታ ዓሢ ዋዚ ጋዓኒ ኮዓይ?» ጋዓዛ፣ ሃንጎዋታ ጊንሣ፡- «ዓኪ ማዔ ካኣሽኮ ጾኦዛ ዛላ ኬኤዛያ ማላኔ» ጋዓኔ። ዬኖ ዔያቶ ገይሴሣሂ ጳውሎሴ ዬሱሴና ዒዛኮ ሃይባፓ ዔቂፖ ዛሎዋ ኬኤዜሢሮኬ። 19 ዬያሮ ጳውሎሴ ዔያታ ዓሪዮሰፓጎሴ ገይንታ ቡኪንቶ ቤዘ ዔኤሊ ዔኪ ሙካፖ፡- «ኔኤኒ ዔርዛ ዓኮ ባካ ዓይጎታቴያ ኑ ዔራኒ ዳንዳዓ? 20 ፔቴ ፔቴ ዓኪ ማዔ ባኣዚ ኔ ኑሞ ኬኤዜኔ፤ ዬያሮ ዬንሢ ባኮንሢ ዓይጎታቴያ ኑ ዔራኒ ኮዓኔ» ገዔኔ። 21 ዬያ ዔያታ ገዔሣሂ ዓቴናይዳ ናንጋ ዓሶንታ ዒኢካ ናንጋ ማሌ ዓጮ ዓሳኣ ቢያ ዓኪ ባኣዚ ኬኤዚሢሂና ዋይዚሢሂና ዋይ ፔኤኮ ዓኣሣኒ ኮዓሢሮኬ።

22 ዬማና ጳውሎሴ ዓሪዮሰፓጎሴይዳ ቡኪንቴ ዓሶ ቤርታ ዔቃፖ፡- «ዓቴና ዓጪ ዓሲዮቴ! ማርገና ዒንሢ ካኣሽ ካኣሽካያ ማዔሣ ስ ዛጋኔ፤ 23 ዋይቴይ ገዔቶ ዒንሢኮ ካታሞ ታ ሃንቲ ሃንቲ ዒንሢኮ ካኣኸ ቤዘ ታ ዛጋኣና <ዔርቲባኣ ጾኦሲሞ> ገይንቲ ፃኣፒንቴ፣ ሹቸና ኮሸና ዔኤቢ ዒንጎ ቤሲ ታ ዳንቄኔ፤ ዓካሪ፣ ታ ዒንሢሞ ኬኤዛሢ ዬያ ዔርቲባኣንቴ ዒንሢ ካኣሽካ ጾኦዛሢ ዛሎኬ። 24 ዒዚ ዓጮንታ ዓጮይዳ ዓኣ ባኮ ቢያ ማኸሢኬ፤ ሳፖና ጫሪንጮናኮዋ ጎዳኬ፤ ዒዚ ዓሲ ኮቸና ማኸንቴ ካኣሽ ማኣሪዳ ናንጉዋሴ። 25 ሺሞፔንታ ዑኡሲንታ ማሌ ባኮዋ ቢያ ዓሲሞ ዒንጋሢ ዒዛ ማዔሢሮ ፔቴታፖ ዒዛሞ ፓጩ ባኣዚ ባኣሴ፤ ዓሲ ማኣደዋ ዒዛሞ ኮይሱዋሴ። 26 ዒዚ ዓሲ ዜርሢ ቢያ ፔቴ ዓሲዳፓ ማኸኔ፤ ዬያኮ ቤርታ ዓሲ ናንጋንዳ ዋይና ናንጋንዳ ቤዘዋ ማሊ ገኢጊሽኔ። 27 ዬያ ዒ ማዳሢ ዓሲ ዒዛ ኮዓንዳጉዲና ዛጊ ኮዒ ዳንቃንዳጉዲኬ፤ ያዲ ማዔቶዋ ጾኦሲ ኑና ቢያሢዳፓ ሃኬኬ ገይሢቲዋሴ። 28 ዓይጎሮ ገዔቶ፡- <ሺሞፔና ኑ ዳዓሢ፣ ኑኡኒ ዓጊፂ ሃንታሢ ናንጊያ ኑ ናንጋሢ ዒዛናኬ>

ዬይያ ዒንሢኮ ዓይናዳ ዓሳ፡- <ኑኡኒ ቢያሢ ዒዛ ናይኬ> ጋዓሢ ጉዳያኬ። 29 «ዓካሪ፣ ኑ ዒዛ ናይ ማዔቶ ጾኦሲ ዓሲ ዔራቶና ዓሲ ማሊሢና ዋርቄይዳፓ ሃሃ ቢራ ዓንጊና ሹቸናይዳፓ ኮሺንቴ ባኣዚ ማላኔ» ገዒ ማላንዳፖ ኑና ኮይሱዋሴ። 30 ዓሳ ቤርታ ዒዛ ዔሪባኣ ዋይና ማዳ ባኮ ጾኦሲ ዛጊ ዓኣሢኔ፤ ሃሢ ጋዓንቴ ዓጮይዳ ዓኣ ዓሳ ቢያ

17:25 17:25 1ካኣቶ. ማ 8:27፤ ዓሲ. 42:5።

ጎማይዳገ ማዳንዳገዱ ዓይሣኔ። 31 ዒዚ ደኔሬ ዓሣ ዛሎና ዓጮ ቢያይዳ ጎኑሞና ምጋንዳ ኬሊ ገሣኔ፤ ዬያ ዒ ጎናሲ ዔርዜሣ ዬያ ዒዚ ደኔሬሣ ሃይባገ ዔቁሲያናኬ» ገዔኔ።

32 ዒማና «ሃይቢገ ዔቁሣ» ጋዓዞ ዔያታ ሞይዞገ ፔቴ ፔቴ ዓሳ ዒዛ ቦሣኔ፤ ዛሎ ዓሳ ጋዓንቴ፡- «ሃና ባኮ ዛሎ ማሌ ዓቢ ኔ ኬኤዛንቴ ኑ ሞይዛንዳኔ» ገዔኔ። 33 ዬካገ ጳውሎሴ ቡኪንቶ ባኣካገ ኬሰኪ ዓኣዳኔ። 34 ፔቴ ፔቴ ዓሳ ጋዓንቴ ዒዛና ሞላ ማዒ ኪሪሰቶሴ ጉሙርቁኔ፤ ዬኖ ኪሪሰቶሴ ጉሙርቁ ዓሶ ባኣኮይዳ ዓሪኖሰገጎሴ ቡኪንቶ ቤዛ ሞጎ ምጋያ ማዔ፣ ዲኖኒሲኖሴ ገይንታ ዓሲና ዴማሪሶ ገይንታ ፔቴ ላኣሊሰኬናና ሃሣ ማሌ ዓሲያ ዓኣኔ።

18

ጳውሎሴ ቆርንቶሴ ዓጮይዳ

1 ዬካገ ጳውሎሴ ዓቴናይዳገ ዔቁ ቆርንቶሴ ዓኣዳ፣ 2 ዒኣካ ጳንያሴ ገይንታ ዓጪዳ ሾይንቴ ዓቁላ ገይንታ ፔቴ ዓሲ ዴንቁኔ። ዬማና ዓቁላ ፔኤኮ ማቾ ጳሪሰቁላ ገይንታዛና ሞላ ዒዳሊያ ዓጮይዳገ ሃጊ ሙሙካኔ፤ ዓይጎሮ ገዔኖቶ ሮሜ ዓጮ ካኣቲ ቁላውደሴ ዓይሁደ ዓሳ ቢያ ሮሜ ዓጫገ ኬሰካንዳገዱ ዓይሣሣሮኬ፤ ዬያሮ ጳውሎሴ ዔያቶ ኮራ ዓኣዳ ዔያቶና ሞላ ዔርቴኔ። 3 ዒዛኮ ማዳ ዓዳ ዔያቶ ጎይያ ዓፒላና ማኸ ማኣር ሲከሣታሣሮ ዔያቶና ሞላ ዴዒ ዬኖ ማዳ ማዳኔ። 4 ሃሣ ዓይሁዴ ዓሶኮ ሃውሾ ኬሎና ኬሎና ዔያቶኮ ቡኪንቶ ቤዛ ዓኣዳ ዓኣዳ ሃይሴ ኬኤዚ ዓይሁዴ ዓሶንታ ገሪኬ ዓሶንታ ዒ ኬኤዛ ባኮ ጉሙርቁንዳገዱ ደዲሺ ኬኤዛኔ።

5 ሲላሴና ዪሞቴሞሴና ማቁደኒያይዳገ ዬዓዛ ጳውሎሴ ቢያ ሞዶ፡- «ዬሱሴ ማሲሃኬ» ገዒ ዓይሁደ ዓሶሞ ማርካዲ ማርካዲ ሃሣ ዔያቶ ዔርዛኔ። 6 ጋዓንቴ ዓይሁደ ዓሳ ዒዛ ማኪ ጫሽካዛ ፔኤኮ ቶኮ ፒዪ፡- «ማይ ዓካሪ ዒንሣ ፑርታና ሞጊንቴቴ ዒንሣ ዳቢንቴናኬ! ታና ገኣጪሳ ባኣዚ ባኣሴ፤ ሃካገ ዓካሪ ታ ዓይሁዴ ማዒባኣ ዓሶ ባንሣ ዓኣዳንዳኔ» ገዔኔ። 7 ዬያይዱ ዔያቶይዳገ ዲማዲ ቲቶሰ ዒኖሰያሴ ገይንታ ዓሲሰኬያ ማኣሪ ዴንዴኔ፤ ዬይ ዓሣ ገኣሲ ካኣሽካያ ሃሣ ማኣሪ ዒዛኮ ዓይሁደ ዓሶኮ ቡኪንቶ ቤዛኮ ኮራኬ። 8 ዬማና ዓይሁደ ዓሶኮ ቡኪንቶ ቤዛ ሱኡገ፣ ቁሪሰጳሴ ገይንታሰኬይ ፔ ማኣር ዓሶ ቢያሣና ሞላ ጎዳ ጉሙርቁኔ፤ ሃሣ ማርገ ቆርንቶሴ ዓጮ ዓሲያኣ ጳውሎሴ ኬኤዛሣ ሞይዚ ጎዳ ጉሙርቁ ሞኣያና ማሰቴኔ።

9 ጎዳሢያ ጳውሎስም ደሞና፡- «ዲጊጪጊ፣ ከከኤዜ፤ ዘቲ ጌጊ፣ 10 ዓይጎር ጌዔቶ ታኣኒ ኔኤና ዋላኬ፤ ሃኖ ካታሜሎይዳ ታኣኮ ሚርጌ ዓሲ ዓኣኔ፤ ኔ ጊዳ ፑርታ ባኣዚ ማዳንዳ ዓሲ ፔቲታዎ ባኣሱ» ጋዓያ ፔጋሲ ዳዌኔ። 11 ዩያሮ ጳውሎስ ጾኦሲ ቃኣሎ ዳርም ከኤዚ ከኤዚ ፔቲ ለዔና ሲላና ዲኢካ ዳዔኔ።

12 ጋሊዮሴ ዓካይያ ጎዎ ዓጮይዳ ዎይሣያ ማዔ ዎዶና ዓይሁደ ዓሳ ፔቲሞና ጳውሎስይዳ ፑርታ ማሊሢና ዔቁ፣ ዎጎ ዎጋ ዓሶ ኮራ ዲዛ ዔኪ ዓኣዳዮ፡- 13 «ሃይ ዓሢ ዎጋ ዓይሁዎ ጎይሢና ዓሳ ጾኦሲ ካኣሽካንዳጉዲ ዓሶ ዳቢሻኔ» ጌዔኔ።

14 ዲማና ጳውሎስ ማሂ ከኤዛኒ ገኢጊንቲ ዓኣንቴ፣ ጋሊዮሴ ዓይሁደ ዓሶም፡- «ዲንሢ ዓይሁደ ዓሳ! ዲንሢዳ ዎንዴ ፑኡፒ ጌኔ ባኣዚ ማዳንቴቲ ዲንሢኮ ጌኤዞ ታ ዎይዛንዳያታንቴ፣ 15 ሃሢ ጌይንቴ ባኣዚና ዔኤቢኮ ሱንሢና ሃሢ ዲንሢኮ ዎጌ ዛላ ዲንሢ ሞኦታቴ ዩይ ዲንሢ ማቶኬ፤ ታኣኒ ሃያ ባኮይዳ ዎጋኒ ኮዑቆሴ» ጌዔኔ። 16 ያዲ ጌዔሰካፓ ዎጎ ዎጎ ቤዛፓ «ከሰኩዎቲ» ጌይ ዔያቶ ከሴኔ። 17 ዩማና ቢያሢ ዓይሁደ ዓሶ ቡኪንቶ ቤዞኮ ሱኡጋሢ፣ ሶሰቴንሲኔ ዓርቂ ዎጎ ዎጋ ዓሶ ቤርታ ጳርቄኔ፤ ዩይ ባካ ቢያ ማዳንታኣና ጋሊዮሴ ዔኤቢ ዓቴኔ ጎዑቆሴ።

ጳውሎስኮ ዓንጾኪያ ማዒያ

18 ጳውሎስ ኪሪሰቶሴ ጉሙርቃ ዓሶና ዎላ ሚርጌ ከሌ ቆርንቶሴይዳ ዳዔሰካፓ ዔያቶ «ኮሺ ዳዑዎቲ» ጌዒ ዎኣያ ካኣሚሎና ሶኦሪያ ዓኣዳኔ፤ ዲማና ጳሪሰቂላና ዓቂላና ዲዛና ዎላ ዓኣዳኔ፤ ዲዛኮ ናኣቢ ዓኣሢሮ ዳንዳንዳሢኮ ቤርታ ከንኪሪያ ጌይንታ ቤሲዳ ቶኣኮ ፔኤኮ ጉኡሌኔ። * 19 ዩካፓ ዳንዲ ዔያታ ዔፕሶኔ ዓጮ ሃላዎ ጳሪሰቂላና ዓቂላና ዲኢካ ሃሺ ፔኤሮ ዓይሁደ ዓሶኮ ቡኪንቶ ቤዞ ጌሊ ዓይሁዳ ዓሶም ሃይሶ ከኤዛኔ። 20 ሚርጌ ዎዳ ዔያቶና ዎላ ዳዓንዳጉዲ ዓሳ ዲዛ ሸኢቁንቴ ዲዚ ዔኤዲባኣሱ። 21 ጋዓንቴ፡- «ጾኦሲ ጌዔቴ ማሌ ዓቢ ዲንሢ ኮራ ታ ማዒ ሙካንዳኔ» ጋዓዎ፣ ዔፕሶኔ ዓጮይዳፓ ዎኣያ ካኣሚሎና ዓኣዳኔ።

22 ዲዚ ቂሳሪያ ሃላዎ፣ ዩካፓ ዩሩሳላሜ ዓኣዲ ሸኢዲያ ማኣሮ ዓሶ «ኮሺዳ» ጌዔሰካፓ ማዒ ዓንጾኪያ ዓኣዳኔ። 23 ዲኢካ ዳካ

* 18:18 18:18 ቶኣኮ ፔኤኮ ጉኡሌኔ፡- ጋዓዛ ዓይሁዳ ዓሶ ዳምቦና ናኣቢንቴ ናኣሶ ካፒ ከንሢያ ማዒያ ዓርዛኒ ማዳንታያኬ። 18:18 18:18 ፓይ. ማፃ 6:18።

ዴዔሰካፓ ጋላቴያና ፐርጊያ ዓጮናይዳ ፔቴ ቤዛፓ ሜሌ ቤሲ ሃንቴ ሃንቴ ኪሪሰቶሴ ጉሙርቃ ዓሶ ዶዲሼኔ።

ዓጲሎሴ ዔፕሶኔና ቆሮንቶሴ ዓጮናይዳ

24 ዒሰከንዲሪያ ዓጪ ዓሲ ፔቴ ዓጲሎሴ ጎዖ ዓይሁዴ ዓሲሰኬይ ዔፕሶኔ ዓጮ ሙኬኔ፤ ዒዚ ገኤዠ ማፃኣፖ ኮሺ ዔራያ ሃሃ ገሰቶ ጎይሢ ዔሪ ገሰታ ዓሲኬ። 25 ዩይ ዓሢ ጎዳ ዛሎ ኮሺ ዔራያና ዓያናና ዒናፓ ማዳኒ ማላያ ማዒ ዩሱሴ ዛሎ ፐዜ ኬኤዚ ኬኤዚ ዔርዛኔ። ያዲ ማዔቶዋ ዒዚ ባሺ ዔራሢ ዮሃኒሴኮ ዋኣዖ ማሰኪዖ ዛሎ ሌሊኬ። 26 ዩማና ዒዚ ጫርቂ ዓይሁዶ ዓሶኮ ቡከንቶ ቤዛ ኬኤዚሢ ዓርቄኔ፤ ጋዓንቴ ጲሪሰቂላና ዓቂላና ዒዛሲ ዋይዛዖ ዒዛ ዔያታ ፔ ማኣሪ ዔኪ ዓኣዲ፣ ዖኦሲ ጎይዖ ዛሎ ቤርታኣሰካፓ ባሺ ቡሊ ዒዛም ኬኤዜኔ። 27 ዓጲሎሴ ዓካይያ ዓኣዳኒ ጋዓዛ ኪሪሰቶሴ ጉሙርቃ ዓሳ ዒዛ ማሊዖ «ቃራኬ» ገዔኔ፤ ዓካይያይዳ ዓኣ ኪሪሰቶሴ ጉሙርቃ ዓሳ ቃራሲ ሾኦቹንሢ ዒዛ ዔካንዳፕዲ ኪኢታ ዔያቶም ዳኬኔ። ዒኣካ ዒዚ ሄላዖ ዖኦሲኮ ኮሹሞ ዛሎና ኪሪሰቶሴ ጉሙርቃያ ማዔ ዓሶም ዳኤፐ ማኣዶ ማዔኔ። 28 ዋይቲ ገዔቶ ዩሱሴ ሜሲሄ ማዔሢ ገኤዠ ማፃኣፖይዳፓ ዔኪ ማርካሲ ማርካሲ፣ ዴር ቢያሢ ቤርታ ሚርጌና ማርሚ ዓይሁዶ ዓሶ ላሢዖናኬ።

19

ጳውሎሴ ዔፕሶኔይዳ

1 ዓጲሎሴ ቆሮንቶሴይዳ ዓኣ ዎዶና ጳውሎሴ ኬዶ ዛሎ ዓጮና ገዒ ዔፕሶኔ ዓኣዲ ሄሊ፣ ዒኣካ ዳካ ኪሪሰቶሴ ጉሙርቃ ዓሲ ዴንቃዖ፡- 2 «ኪሪሰቶሴ ዒንሢ ጉሙርቂ ጎናሲ ዔካኣና ዓያና ገኤሺ ዒንሢ ዔኪያ?» ገዒ ዖኦጮኔ። ዔያታ ማሃዖ፡- «ኦኦኒ ዔኪባኣሴ፤ ሃሃ ዓያና ገኤሺ ዓኣሢያ ኦ ዋይዚ ቤቂባኣሴ» ገዔኔ።

3 ጳውሎሴ፡- «ሂዳዖ ዎዚጉዴ ዋኣሢ ማሰቲሢዳይ ዒንሢ ማሰቲሢ?» ዔያቶ ኮራ ጋዓዛ፣ ዔያታ፡- «ዮሃኒሴ ኬኤዜ ዋኣዖ ማሰቲዖናኬ» ገዔኔ።

4 ጳውሎሴ ገንሢ፡- «ዮሃኒሴኮ ማሰኪዖ ጎሞ ቡኡዲዖ ዔርዛያ ማዔኔ፤ ዩማና ዴርሞ ዒዚ ኬኤዛዖ ታኣኮ ገንፃፓ ሙካሢ ጉሙርቁዋቴ» ገዒ ገዒኬ፤ ያዲ ገይንቴሢያ ዩሱሴኬ» ገዔኔ።

19:4 19:4 ማቴ. 3:11፤ ማር. 1:4፤7-8፤ ሉቃ. 3:4፤ 16፤ ዮሃ. 1:26-27።

5 ይና ዔናታ ዋይዘያ ጎዳ ዩሱሴ ሱንያና ዋኣያ ማሰቴኔ።
6 ጳውሎሴያ ዔናቶ ዑፃ ኩጮ ጌሣዛ ዓያና ጌኤሺ ዔናቶ ዑፃ ኬዴም፣ ዲማ ዲማ ዳንጋና ዔናታ ጌሰቴኔ፤ ያኦሲ ማሊሢያ ዔናታ ኬኤዚሢሢ ዓርቁኔ። 7 ዩንሢ ዓሱንሢኮ ፓይዳ ታጳ ላምያ ማዓያኬ።

8 ዒማና ጳውሎሴ ዓይሁዶ ዓሶኮ ቡኪንቶ ቤዘ ዓኣዲ ሃይሃ ዓገኒጉዴያ ያኦሲ ካኣቱሞ ዛሎ ማርሚሢሢ ሃሃ ዴርሞ ቡሊ ኬኤዚ ኬኤዚ ጩርቁ ዔርዜኔ። 9 ፔቴ ፔቴ ዓሳ ጋዓንቴ ዒናፓ ዒዲሢሢ ጎዳሢኮ ጎይያ ዴር ቤርታ ጩሽኪ ጩሽኪ «ኑ ዒዛ ጉሙርቃዓ» ጋዓዛ ዔናቶ ዒ ሃሺ ዴንዳያ፣ ኪሪሰቶሴ ጉሙርቃዘንሢ ሌሊ ዔኪ ዓኣዲ ዲራሮሴ ጌይንታ፣ ዓሶ ዔርዘ ዳልጎ ማኣርይዳ ቢያ ኬሊ ዔርዛኔ። 10 ጳውሎሴ ላምያ ሌዔ ጉዴያ ዒዘ ጎይያ ዒኣኣ ማዳኔ፤ ዒማና ዒሲያ ዓጮይዳ ናንጋ ዓይሁዶ ዓሶንታ ዓይሁዴ ማዒባኣ ዓሶንታ ቢያ ጎዳኮ ቃኣሎ ዋይዘኒ ዳንዳዔኔ።

ጳውሎሴ ዛሎና ማዲንቴ ባኮ

11 ኮሺ ዲቃሃ፣ ፔ ዋልቁና ማዲንታ ዓኪ ባኣዚ ጳውሎሴ ዛሎና ያኦሲ ማዳኔ። 12 ዩያይዳፓ ዔቁያና ጳውሎሴኮ ዑያ ሄሌ ዓፒሎንታ ማኣዓሢንታ ዓሳ ዔኪ ዔኪ ሃርጊንቴ ዓሶ ዑያ ካንሣዛ ዶርዓሢዳፓ ዓሳ ዳቃኔ፤ ሃሃ ፑርቶ ዓያናኣ ዓሶይዳፓ ኬሰካኔ። 13 ፑርቶ ዓያና ዓሶይዳፓ ኬሲ ኬሲ ሃንታ ፔቴ ፔቴ ዓይሁዶ ዓሳ፡- «ጳውሎሴ ኬኤዛ፣ ዩሱሴ ሱንያና ዒንሢ ኬሰካንዳጉዲ ኑ ዒንሢ ዓይሃኔ» ጌዒ ጌዒ ፑርቶ ዓያና ዓሶፓ ኬሳኒ ማሌኔ። 14 ዩና ማዳሢ ዓይሁዶ ቁኤሶኮ ሱኩጋሢ፣ ዓሰቁዋ ጎያሢኮ ላንካይ ናይሰከንሢኮ።

15 ጋዓንቴ ፑርቶ ዓያናሢ፡- «ዩሱሴ ታ ዔራኔ! ጳውሎሴ ዛሎዋ ታ ዔራኔ! ሃይ ዒንሢ ያናንሢዳዎ?» ዔናቶ ኮራ ጌዔኔ።

16 ዒማና ፑርቶ ዓያና ዓርቁ ዓሢ ኮኣሚ ጩኡሊ ዓርቁ ዓርቁ ዔናቶ ባሽኔ፤ ዩካፓ ዔናታ ሱጉቴ፣ ኪፃዲ ሃሃ ዓፒላኣ ዔናቶኮ ዳርዔም ጋራፓ ጳሽኪ ኬሰኪ ዴንዳኔ። 17 ዩይ ባካ ዔፕሶኔይዳ ናንጋ፣ ዓይሁዴ ማዒባኣ ዓሶና ዓይሁዶ ዓሶናም ዋይዘንቴሢር ቢያሢ ዒገጩኔ፤ ጎዳ ዩሱሴኮዋ ሱንፃ ሚርጌና ቦንቸንቴያ ማዔኔ። 18 ኪሪሰቶሴ ጉሙርቃ ዓሶይዳፓ ሚርጌሢ ፑርቶ ማዶ ፔኤኮ ፔጌና ቡኡዲ ቡኡዲ ሙካኔ። 19 ሚርጌ ማርሾ ማርሻ ዓሳ ፔኤኮ ማርሻሢ ማፃኣፖ ቡኡሲ ዴር ቤርታ ታሚና ሚቹኔ፤ ዩያ ማፃኣፖኮ ሚኣሻ ደንጊታሚ ሺያ ሹቹ ቢራ ማዓያኬ። 20 ዩያይዲ ጎዳሢኮ ቃኣላ ሚርጌና ዳልገ ዳልገ ሃሃ ባሺ ባሺ ዴንዳኔ።

ዔፕሶኔይዳ ዔቁ ዣላሢ

21 ዬይ ቢያ ማዕሢኮ ገንፃ ጳውሎስ ማቆደኒያና ዓካይያ ዓጮ ጌዳና ጌዒ ዬሩሳላሜ ዓኣዳኒ ፔ ማላሢና ማላዎ፡- «ዒኢካ ታ ሄሌስካፓ ሮሜ ዓጮ ዓኣዳንዳያ ኮይሳኔ» ጌዔኔ። 22 ዬያሮ ዒዛና ዎላ ማዳ ዓሰይዳፓ ላምዎንሢ፤ ደሞቴዎሴና ዔራሰዎሴና ማቆደኒያ ዓጮ ዳኪ ዒዚ ፔኤሮ ዒሲያይዳ ዳካ ከሌ ዳዔኔ።

23 ዬማና ጎዳሢ ጎይዎ ዛሎና ዔፕሶኔይዳ ዴኤፒ ዣላ ዔቄኔ። 24 ፔቴ ዲሚዒሮስ ጌይንታ ማኢሼ ዲዓሰኬይ ዓርፃሚሴ ጌይንታ ሸኢጲዎ ማኣሮ ማላ ባኣዚ ቢራ ዓንገና ዲይ ማዢ ማዢ ቢሮ ዲዓ ዓሰና ዔያቶጉዳያ ማዳ ማዳ ማሌ ዓሰ ቡኩሳዎ፡- «ዓሲዮቴ! ኮኡኒ ቆሎ ዴንቃሢ ሃሮ ማዳና ማዕሢ ዒንሢ ዔራኔ፤ 26 ሃይ ጳውሎስ ጎዎሢ ሩሲ ኩቸና ማዢንቴ ማላሢ ካኣሸኮ ባኣዚቱዎሴ» ጌዒ ጌዒ ዔፕሶኔ ዓጮይዳ ሌሊቱዎንቴ ዳካ ዓጮ ሌሊ ዓታዛ ዒሲያ ዓጮ ቢያይዳ ዎኣዳ ዓሲ ዒዚ ጎኔኬ ጌይሲ፤ ሃሢ ኪሪሰቶሴ ጉሙርቃንዳጉዳ ማሃቶዎ ዒንሢ ዒንሢ ቶኣኪና ዛጌሢና ዎይዜሢና ጉዲኬ። 27 ዬያ ዛሎና ሃይ ኮኡኮ ማዳ ሶሃንታንዳኔ ጌይሢኬ፤ ሃሢ ዬያ ሌሊቱዎንቴ ዒሲያና ዓጮ ቢያሢናይዳ ዓኣ ዓሳ ቢያ ካኣሸካ፤ ዴኤፖ ዓርፃሚሴ ሸኢጲዎ ማኣራላ ጉሪ ማዒ ዓታኒኬ፤ ዒዞኮ ዴኤፑማኣ ማይ ፓፓኒኬ» ጌዔኔ።

28 ዓሳ ዬያ ዎይዞ ዳጋዲ፡- «ዔፕሶኔይዳ ዓኣ ዓርፃሚሴ ሸኢጲዎ ማኣራ ዴኤፒኬ!» ጌዒ ጌዒ ዒላቲኔ። 29 ካታሚላ ዬያ ዣላሢዳፓ ዔቄያና ካራ ባይዜኔ፤ ዴራ ማቆደኒያ ዓጮ ሸይንቲ ማዕ ላምዎ ጳውሎሴኮ ላጎንሢ፤ ጋይዮሴና ዓሪሰዒሮኮሴና ዓርቂ ጎቺ ጎቺ ዴራ ቡኪንታ ቤዞ ዔኪ ጳሸኬኔ። 30 ጳውሎስ ዬማና ዴሮ ባንሢ ዓኣዳኒ ኮዔንቴ ኪሪሰቶሴ ጉሙርቃ ዓሳ ዒዛ ላኣጌኔ። 31 ዒሲያ ዓጮይዳ ዓኣ ዎይሢ ዓሰይዳፓ ፔቴ ፔቴ ዒዛናሸካዞንሢ ጳውሎስ ኮራ ዓሲ ዳኪ፡- «ኔኤኒ ዓሳ ቡኪንታ ቤዞ ዓኣዳ፤ ዒኢካ ኔ ዴዲዎጉዲ» ጌዒ ዒዛ ሸኢቄኔ። 32 ዒማና ዴሮ ባኣኮይዳ ዴኤፒ ዣላ ዓኣሢሮ ባሼሢ ዓይጎሮ ቡኪንቶቴያ ፔቴታዎ ዔሩዎሴ፤ ዬያይዳፓ ዔቄያና ፔቴ ዓሲ ፔቴ ባኣዚ ጌዒ ዒላታዛ፤ ማሌሢ ማሌ ባኣዚ ጌዒ ጌዒ ዒላታኔ። 33 ፔቴ ፔቴ ዓይሁዳ ዓሳ ዒሲኪንዲራ ጌይንታ ዓሢ ዔቄ ጌሰታንዳጉዲ ሂዎሢጉዲ ዎኣቲ ዴሮ ቤርቶ ሸኢሼኔ፤ ዛሎ ዓሳ ሃሢ ዒዚ ኮሺ ማርማንዳጉዲ ዒዛ ዞሪኔ፤ ዬያሮ ዒሲኪንዲራ ዴራ ዚቲ ጋዓንዳጉዲ ኩቸና ቤኤዛዎ ጌኤዞ ማሃንዳ ጌኤሲ ጌሰታኒ ጌኢጊንቲኔ። 34 ጋዓንቲ ዒሲኪንዲራ ዓይሁዳ ዓሲ ማዕሢ ዴራ ዔራዎ፡- «ዔፕሶኔይዳ ዓኣ ዓርፃሚሴ ዴኤፒኬ!» ጌዒ

ቢያህ ፔቴ ዑኡሲና ሚርጌ ኔጊ ዒላቴኔ።

35 ጋፒንያይዳ ካታሞኮ ፃኣፓህ ዴር ዚቲ ጌይሳዮ፡- «ዮፕሶኔ ዓጪ ዓሲዮቴ! ዮፕሶኔ ካታሞይዳ ናንጋ ዓሳ ዴኤፖ ዓርፃሚሴ ጌይንታ ሺኢጲያ ማኣራሎና ጫሪንጫፓ ኬዴ ዒዛኮ ማላህና ካፓያ ማዔህ ቢያህ ዔራያኬ። 36 ዬያ ዔራቀሴ ጋዓንዳይ ያኦኒያ ባኣህረ ዚቲዮ ዒንህ ጋዓንዳጉዲና ሩኡሪ ፑርታ ባኣዚ ማዲህዳፓ ዒንህ ካፒንታንዳያ ኮይሳኔ። 37 ጌኤዦ ሺኢጲያ ማኣር ቡሪባኣ ዓሲና ኦኡኮ ካኣሽኮ ያኦዞ ጫሽኪባኣ ዓሲ ሃይካ ዒንህ ጉሪ ዔኪ ሙኬኔ። 38 ዳሚዒርሴንታ ዒዛና ዎላ ዓኣ ቢር ዲዓ ዓሳ ከኤዛ ባኣዚ ዓኣቶ ጌኤዛ ዛጊ ዎጊንታኒ ሚሌ ከሊ ዓኣኔ፤ ሃሃ ዬና ዛሎና ቢታንታ ዓኣ ዓሳኣ ዓኣኔ፤ ዒኢካ ዔያታ ሞኦቶንጎ። 39 ሚሌ ዒንህ ኮዓ ባኣዚ ዓኣታቶ ዳሞቤና ጌሰቲ ዎጋንዳጉዲ ጌይንቴ ዓሶና ዛጊንታንዳኔ። 40 ሃያ ማዲንቴ ባኮ ዛሎና <ዔያታ ዣላህ ዔቁሲሴኔ> ጌይ ኦና ያኦጪሱዎጉዲ ኦና ዓጊቻኔ፤ ሃይ ዣላህና ፑርቶ ባካ ዓይጎ ዛላና ዔቁይ?> ጌይ ኦና ያኦጮናቶ፣ ማሂ ኦ ከኤዛንዳ ባኣዚ ባኣሴ» ጌዔኔ። 41 ያዲ ጌዔሰካፓ ቡከንቶ ላኣሌኔ።

20

ጳውሎሴኮ ማቄዶኒያና ጊሪኬ ዓጮና ዓኣዲዮ

1 ዣላህ ዚቲ ጌዔሰካፓ ጳውሎሴ ኪሪሰቶሴ ጉሙርቃ ዓሶ ፔቴይዳ ዔኤሊሲ ዘር ቃኣላና ዶዲሺ፡- «ኮሺ ዴዑዎቴ» ጌዒ ማቄዶኒያ ዓኣዴኔ። 2 ዒዚ ጊዴና ዓኣዲ ቤዞይዳ ዓኣ ኪሪሰቶሴ ጉሙርቃ ዓሶ ሚርጌና ዞሪ ዶዲሺ ዶዲሺ ጊሪኬ ዓጮ ዓኣዴኔ። 3 ዒኢካ ዒዚ ሃይሃ ዓጊኒ ዴዒ፣ ዬካፓ ዎኣያ ካኣሚሎና ሶኦሪያ ዓጮ ዓኣዲኒ ማሌኔ፤ ጋዓንቴ ዓይሁዶ ዓሳ ዒዛይዳ ፑርታ ማላህ ማላህ ዒ ዔሪ ዎዶና ማቄዶኒያ ዓጮ ጊዴና ዓኣዲኒ ጌዔኔ። 4 ጳዊርሴ ናኣዚ ሱሲ ጎዎህ ቤኤሪያይዳፓ፣ ዓሪሰዊርኮሴና ሲኮንዶሴና ቴሰሎንቄይዳፓ፣ ጋይዮሴ ዴርቤይዳፓ፣ ቲከቆሴና ዊርፒሞሴና ዒሲያ ዓጫፓ፤ ሃሃ ዊሞቴዎሴያ ዒዛና ዎላ ዓኣዴኔ። 5 ዔያታ ቤርታዲ፣ ቢሪ ዓኣዲ ዊርዓዳይዳ ኦና ካፔኔ። 6 ኦኡኒ ጋዓንቴ ላኣዶ ሙዒ ቦንቾ ከሎኮ ጊንፃ ፒልጲሲዮሴይዳፓ ዎኣያ ካኣሚሎና ዶንጎ ከሊ ሃንቲ፣ ዔያታ ዓኣ ቤዞ ዊርዓዳ ሄሊ ዒኢካ ላንካይ ከሊ ኦ ዴዔኔ።

ጳውሎሴ ጋፒንህ ዊርዓዳ ዓጮ ዛጌህ

7 ቂዳሜ ዋንቴ ዉዳ ባንሢ ካራኒ ዑካእና * ካሢ ሙዓኒ ሃሣ ጎዳ ካዋሢያ ሙዓኒ ፔቴይዳ ኑ ቡኪንቴኔ፤ ጳውሎሴ ዚር ጉቴሎ ዓኣዳኒ ጌዔያ ማዔሢሮ ቡኪንቴ ዓሶም ሃይሴ ከኤዛዎ፣ ሃይሶ ሳዎኮ ዴንዲ ጊዲሚሺ ሄላንዳእና ያዶሲ ጌሰቴኔ። 8 ኑኡኒ ቡኪንቴ፣ ኩቡጉዲ ዋሊ ዑፃ ዑፃ ማዢንቴ ማኣሮይዳ ሚርጌ ፖዒ ዓኣኔ። 9 ዔውዒኮሴ ጌይንታ ፔቴ ዳጌሰኬያ ከኤያኮ ፑልቶ ካራ ዴዒ ዓኣንቴ ጳውሎሴ ጌኤዞ ያዶሴሢሮ ዳጌ ናዓሢ ጊንዓ ዓርቃዛ ጊንዒቤቃ ጊንዓሢ ባሽም ዋሊኮ ዑፃ ዑፃ ማዢና ማኣሮኮ ሃይሣሳሢዳፓ ኬዲ ሎኣሜኔ፤ ዩካፓ ዓሳ ዔቂሳእና ናማ ሃይቄያኬ። 10 ጋዓንቴ ጳውሎሴ ሎፓ ኬዲ ሂርኪ ጌይ፣ ናማ ኮንቂ ዓርቃዎ፡- «ናማ ሸምፔና ዓኣኔ፤ ዲቃቴፖቴ» ጌዔኔ። 11 ዩካፓ ጳውሎሴ ጊንሣ ዑዎ ኩቦ ማኣሮ ከሰከ፡ ጎዳ ካዋሢና ካሦና ኪሪሰቶሴ ጉሙርቃ ዓሶና ዋላ ሙዔኔ። ሳዓ ካራንዳያ ሄላንዳእና ዓሶና ዋላ ጌሰታዎ ዴንዴኔ። 12 ዓሳ ሃይቄዎ ዳቂ፣ ዳጌ ናዓሢ ማኣሪ ዔኪ ዓኣዳኔ፤ ሃሣ ኮሺያ ዶዴኔ።

ጳውሎሴኮ ዒሮዓዳይዳፓ ሚሊዒ ዓኣዳዎ

13 ኑኡኒ ጳውሎሴ ዔኪ ዓኣዳኒ ማሌሢሮ ቤርታዲ ዋኣዎ ካኣሚሎና ዓሶሳ ኑ ዴንዴኔ፤ ዩያ ኑ ማዳሢ ጳውሎሴ ዓሶሳ ዴንዲ ሄላንዳእና ቶኪና ዓኣዳኒ ኮዔሢሮና ሃሣ ኑ ዩያይዳንዳጉዲ ኑና ዒ ዓይሣሢሮኬ። 14 ዩካፓ ዒዛና ኑ ዓሶሳይዳ ካኣማዎ፣ ዋኣዎ ካኣሚሎ ዒዛ ቶጊሲ ዔኪ ሚሊዒ ዓጮ ዋላ ኑ ዓኣዳኔ። 15 ዩካፓ ዚር ጉቴሎ ዔቂ ኪዮሴ ጌይንታ ዓጮኮ ቤርቶ ዛላ ዓኣ ቤዞ ኑ ሄሌኔ፤ ላማሳ ከሎ ሳሞኔ ፒንቃዎ ጉቴና ሚሊዒ ኑ ሄሌኔ። 16 ጳውሎሴ ዒሲያይዳ ዎዶ ጉሪ ኩርሱዋጉዲ ጌዒ ዔፕሶኔ ዓጮኮ ኮርሳ ዓኣዳኒ ኮዔኔ፤ ዓይጎር ጌዔቶ ዓይሁዶ ዓሶኮ ጳንጻቆሰጻ ጌይንታ ቦንቾ ከሎ ዎይቴቴያ ዩሩሳላሜ ሄላኒ ዒ ማሌሢሮኬ።

ጳውሎሴ ዔፕሶኔ ሺኢጲዎ ማኣሮ ጨሞም ከኤዜ ዔልቃሞ

17 ጳውሎሴ ሚሊዒዳፓ ዔፕሶኔ ከኢታ ዳኪ፡ ሺኢጲዎ ማኣሮኮ ጨሞ ዔኤሊሴኔ፤ 18 ዩካፓ ዔያታ ዒዛ ኮራ ሙካዛ ዒዚ ዔያቶም ከኤዛዎ፡- «ዒሲያ ዓጮ ታ ጌሌ ከላፓ ዓርቂ ቢያ ከሊ ዒንሢና ዋላ ታኣኒ ዎይቴ ናንጌያታቴያ ዒንሢ ዔራኔ፤ 19 ዓይሁዶ ዓሳ ታ ጊዳ ፑርቶ ማዳ ዛሎና ሜታ ታና ሄሌታቴያ ጉቤ ዒናፓ ማዔ ሸሌዑሞና ሃሣ ሚርጌ ዓቢሢና ታ ጎዳሢም ታ ማዳኔ። 20 ዓሳ ቡካ ቤዞይዳ ማዎም ዒንሢኮ ማኣራ ማኣራ ታ ዒንሢ ዔርዛ ዎዶና ዒንሢም ኮይሳ ባኣዚ ቢያ ታ ከኤዜኔ፤ ፔቴታዎ ዓይሴ ባኣዚ ባኣሴ።

* 20:7 20:7 ቂዳሜ ዋንቴ ዉዳ ባንሢ ካራኒ ዑካእና፡- ጌይንቴዞ ቃልሾ ከሎኮ ቤርታሳ ከሎ ጌይዎኬ።

21 ዓይሁድ ዓሶ ማዕቶዋ ዓይሁዳ ማዕባኣ ዓሳ ጎሞ ቡኡዒ ያኦሲ ባንሢ ሙካንዳጉዲና ሃሣ ጎዳ ዩሱስ ኪሪሰቶሴ ጉሙርቃንዳጉዲ ዔያቶም ታ ላቴኔ። 22 ሃሢያ ታ ዒኢካ ሄለዛ ታ ገዳ ዓይጌ ማዳንታንዳቴያ ታ ዔሩዋዎ፣ ዓያና ጌኤሺም ዓይሢንጉቴ ዩሩሳላሜ ታ ዓኣዳኔ። 23 ጋዓንቴ ታ ዔራሢ ታኣኒ ዴንዳ ካታሞይዳ ቢያ ቴኡሲና ሜቶና ታና ሄለንዳሢ ዓያና ጌኤሺ ታኣም ላቴ ከኤዜማ ሌሊኮ። 24 ታኣኒ ጋዓንቴ ታኣኮ ማዳ ኩንሢንጉቴ ሃሣ ጎዳ ዩሱሴ ታኣም ዒንጌ ማዳ ታ ማዳንጉቴ ሃይቁቴያ ማታ ባኣሴ፤ ታኣኮ ማዳ ያኦሲ ፔ ኮሹሞና ታኣም ዒንጌ ኮዦ ሃይሶ ከኤዚሢኒ።

25 «ሃና ሄለንዳኣና ዒንሢ ቢያሢ ባኣካ ታ ሃንቴ ሃንቴ ያኦሲኮ ካኣቴሞ ዛሎ ከኤዜኔ፤ ሃይካፓ ሴካ ጋዓንቴ ዒንሢዳፓ ፔቴ ዓሲታዎ ታኣኮ ዓኣፓ ካሮ ማሊ ዛገንዳዋኣሢ ታ ዔራሬ። 26 ዓካሪ ዒንሢዳፓ ፔቴ ዓሲታዎ ባይቁቶ ታና ያኦጪሳ ባኣዚ ባኣያ ማዕሢ ሃና ታ ዒንሢም ከኤዛኔ። 27 ዓይጎሮ ጌዔቶ ያኦሲኮ ማሊያ ቢያ ዒንሢም ታ ከኤዜያፓዓቴም ፔቴታዎ ታ ዓይሴ ባኣዚ ባኣሴ። 28 ዓያና ጌኤዦ ቆልሞኮ ሄንቃ ዓሲ ማሢ ዒንሢ ደኦሬኔ፤ ዓካሪ ዒንሢ ቶኣኮና ዒንሢ ሄንቃ ቆልሞ ዛሎናሮ ዒንሢ ኮሺ ዔሩዋቴ፤ ጎዳ ፔ ሱጉያና ሻንቁ ፔኤም ማሄ፣ ሺኢጲያ ማኣሮ ዓሶ ሄንቁዋቴ። 29 ታኣኒ ዓኣዳሰካፓ ቆልሞም ሚጪንጉዋዎ፣ ያኣዮጉዳ ዓሲ ዒንሢ ባኣኮ ጌላንዳሢ ታ ዔራሬ። 30 ዩያጉዲ ሃሣ ዒንሢ ባኣካፓ ፔቴ ፔቴ ዓሲ ዔቁ ኪሪሰቶሴ ጉሙርቃ ሚርጌ ዓሶ ፔ ባንሢ ማሃኒ ዋሶ ማዕ ዔርዚሢ ዔርዚንዳኔ። 31 ዩያሮ ዒንሢ ፔቴ ፔቴሢ ታኣኒ ሃይሃ ሌዔ ዋንቴና ሮኦሪና ዓቢሢና ዩኤኪ ዩኤኪ ዞሬያ ማዕሢ ጳቂሢ ጳቂሢ ደዲዋቴ።

32 «ሃሢ ታኣኒ ያኦሲ ዒንሢ ካፓንዳጉዲ ዒዛም ዓኣሢ ዒንጋኔ፤ ዒንሢ ያኦሲኮ ዴኤፖ ኮሹሞ ዛሎ ከኤዛ፣ ከኢቶ ጳቂሡዋቴ፤ ዩይ ከኢታ ዒንሢ ማኣዳንዳኔ፤ ሃሣ ያኦሲ ዓሶ ማዕያና ዒንሢሢ ማዕ ባኮ ዒንሢም ዒንጋንዳኔ። 33 ታኣኒ ያኦኮ ቢራኣ ማዎም ዋርቁ፤ ሃሣ ማኣዎም ዛገ ሱኡካዲ ባኣሴ። 34 ታ ኩቸና ማዲ ማዲ ታናንታ ታ ላጎንታ ታኣኒ ማኣዳሢ ዒንሢ ዒንሢ ቶኣኪና ዔራሬ። 35 ሌዔካያይዳፓ ባሽ ዒንጋያ ዓንጂንጉቴያኮ» ጋዓ፣ ጎዳ ዩሱሴኮ ቃኣሎ ጳቂሢ ጳቂሢ ኑ ኩቻ ኑ ማዲ ማዲ ላቢንጉ ዓሶ ማኣዳንዳያ ኮይሳሢ ሚርጌ ጎይሢና ታ ዒንሢ ዳቁኔ» ጌዔ።

36 ዩካፓ ጳውሎሴ ቢያሢና ዋላ ጉሞዓቴ ያኦሲ ሺኢቁኔ፤ 37 ዒማና ቢያሢ ዩኤካዎ፣ ጳውሎሴ ኮንቁ ኮንቁ ሄርቁኔ። 38 ፔቶ ዔያቶ ኮሺ ያዩሴዛ፡- «ሃካፓ ሴካ ታኣኮ ዒንሢ ዓኣፓ ካሮ

ዛገንዲዋሴ» ዒዚ ጌዔዘኬ። ዩካፓ ዴንዲ ዋኣዎ ካኣሚሎ ሄለንዳኣና ዒዛ ዔያታ ጎይሣ ዓኣሄኔ።

21

ጳውሎሴኮ ዩሩሳላሜ ዓኣዲዎ

1 ዔያቶይዳፓ ኑ ዲማዳሢኮ ገንፃ ዋኣዎ ካኣሚሎ ቶገ ዔዔቃዎ ቆሴ ጌይንታ። ዋኣሢ ሳዛይዳ ዓኣ ዓጪ ኑ ዓኣዳኔ፤ ዩካፓ ዚሮ ጉቴሎ ዋኣዎ ሳዛ ዓኣ ሩዴ ጌይንታ ዓጪ ኑ ሄሊ። ዒኢካፓ ጳፂራ ካታሞ ኑ ዴንዴ። 2 ዒዛ ቤዘይዳፓ ፒንቁ ዓጮ ዓኣዳ ዋኣሢ ካኣሚሎ ዴንቃዎ ዒዛ ቶገ ገንሣ ኑ ዓኣዲዎ ዓርቄ። 3 ዋኣዎ ሳዘይዳ ዓኣ ቆጲሮሴ ዓጮ ሻውሎ ዛሎይዳ ሃሺ፣ ሶኦሪያ ዓጮ ኑ ዓኣዲቤቃ ባዘ ዓጫ ዓኣ ፂሮሴ ኑ ዴንዴ፤ ዓይጎሮ ጌዔቶ ዋኣዎ ካኣሚሎ ጫኣንጎቴ ባኮ ዒኢካ ኬይሳንዳያ ኮይሳሢሮኬ። 4 ዒዛ ቤዘይዳ ኪሪሰቶሴ ጉሙርቃ ዓሶ ኮዒ ኑ ዴንቃዎ፣ ዔያቶና ዋላ ላንካይ ኬሊ ዴዔ። ዔያታኣ ዓያና ጌኤሺ ዔያቶሞ ኬኤዛዛ ጳውሎሴም፡- «ዩሩሳላሜ ዴንዲፓ» ጌይ ኬኤዘኔ። 5 ዒኢካ ኑ ዴዓ ዎዳ ጋፔሞ ዔያቶይዳፓ ኑ ዲማዲ ሃንቲዎ ዓርቃዛ፣ ቢያሢ ፔኤኮ ላኣሎና ናኣቶና ዋላ ማዒ ካታሞኮ ዙሎ ሄለንዳኣና ኑና ጎይሢና ዓኣሢ ባዘ ዓጮ ኑና ሄሊሴም፣ ዒኢካ ጉምዓቲ ያኦሲ ኑ ሺኢቁሰካፓ ዎሊ ኑ ሳራሢ ዲማዳኔ። 6 ዩካፓ ኑኡኒ ዋኣዎ ካኣሚሎ ቶገ ዴንዳዛ ዔያታ ፔ ማኣሮ ባንሢ ማዔ።

7 ፂሮሴይዳፓ ዒቂ ባዘ ገዴና ሃንቲዎ ኑ ኩርሰሰካፓ ጳፂሎማይሴ ጌይንታ ዓጮ ሄሊ፣ ዒኢካ ኪሪሰቶሴ ጉሙርቃ ዓሶና ዋላ ካኣሚ ዎሊ «ኮሺዳ?» ጌዔሰካፓ ዔያቶና ዎላ ፔቴ ኬሊ ኑ ፔኤቄ። 8 ዚሮ ጉቴሎ ዒኢካፓ ኬሰኪ ቁሳሪያ ዓጮ ዓኣዲ፣ ዒኢካ ያኦሲ ማኣራ ማዳንዳጉዲ ደኦሪጎቴ ላንካዎ ዲያቆኖንሢዳፓ * ፔቴሢ ማዔ፣ ኮዦ ሃይሶ ኬኤዛ፣ ፒልጶሴ ማኣሪ ጌላዎ ዒዛና ዎላ ኑ ዴዔ። 9 ዒዛኮ ያኦሲ ማሊሢ ኬኤዛ፣ ያይዶ ዉዲሮ ናይ ዓኣኔ። 10 ማርጌ ኬሊ ዒኢካ ኑ ዴዔሰካፓ ዓጋሶሴ ጌይንታ ያኦሲ ማሊሢ ኬኤዛሰኬይ ዪሁዳ ዓጫፓ ሙኬ። 11 ዩይ ዓሢ ኑ ባንሢ ሙካዎ ጳውሎሴኮ ቃልሾ ዔኪ ፔኤኮ ኩጮና ቶኮና ቱኪ፡- «ዓያና ጌኤሺ

* 21:8 21:8 ዲያቆኔ፡- ጌይንታ ዓሳ ሺኢጲዎ ማኣሮይዳ ዎይሣ ዓሶ ዴማ ማዒ ዴማ ማዳ ማዳ ዓሳኬ፤ ዩና ዓሳ ማናኣ ዎዶና ባሺ ሺኢጲዎ ማኣሮይዳ ዘኤሮ ዒንዶና ማታዳ ዓሶናም ኮይሳ ባኣዚ ዒንገ ዒንገ ቶኦኮ ዛጋያኬ። 21:8 21:8 ዳኪ. ማዳ 6:5፤ 8:5።

ሃሮ ቃልሼሎኮ ዓዶ ዩሩሳላሜይዳ ዓአ፣ ዓይሁዶ ዓሳ ሃይማይዲ ቱኪ ዓይሁዶ ማዒባአ ዓሳሞ ዒንጋንዳኔ ጋዓኔ» ጌዔኔ።

12 ዬያ ኩኒኒ ዋይዛየ ኑናንታ ዒኢካ ዓአ ዓይሁዶ ዓሳንታ ጳውሎሴ ዩሩሳላሜ ዳንዲዋጉዲ ሺኢቄኔ። 13 ጳውሎሴ ጋዓንቴ፡- «ሃያይዲ ዩኤኪ ዩኤኪ ዓይጎሮ ዒንሢ ታኣኮ ዒና ዲኡዛይ? ታኣኒ ጎዳ ዩሱሴ ሱንፆ ዛሎሮ ዩሩሳላሜይዳ ቱኡቲሢሮ ሌሊቱዋንቴ ሃይቃኒያ ገኢገንቴያኬ» ጌዒ ማሄኔ።

14 ኑ ዙሪ ዙሮ ዒ ዔኮ ዒፃዛ፡- «ማይ ፆኦሲ ማሊሢ ማፆንጎ» ጌዒ ኑ ሃሼኔ።

15 ዒኢካ ኩኒኒ ዳካ ኬሊ ዳዔሰካገገ ኩኡኮ ዓአ ሜሆ ኑ ገኢገሺ ዩሩሳላሜ ዓአዴኔ። 16 ቁሳሪያይዳ ዓአ፣ ፔቴ ፔቴ ኪሪሰቶሴ ጉሙርቃ ዓሳ ኩኡና ሙኪ፣ ሚናሶኔ ጌይንታሢ ማኣራ ኑ ዳዓንዳጉዲ ዒዛ ማኣሮ ኑና ዳቄኔ። ዩይ ዓሢ ቤርታዲ ኪሪሰቶሴ ጉሙርቄያ፣ ቆጲሮሴ ዓጮይዳ ሾይንቴ ዓሲኬ።

ጳውሎሴ ዩሩሳላሜይዳ ያይቆኦቤ ዛጌሢ

17 ዩሩሳላሜ ኑ ሄላዛ ኪሪሰቶሴ ጉሙርቃ ዓሳ ዋዛና ኑና ሾኦቹንሢ ዔኬኔ። 18 ዙሮ ጉቴሎ ጳውሎሴ ኩኡና ዋላ ያይቆኦቤ ኮራ ዓአዴኔ፤ ዒኢካ ሺኢጲፆ ማኣሮኮ ጨማ ዓአኔ። 19 ጳውሎሴ ቢያሢ «ኮሺዳ?» ጌዔሰካገገ ዒዛ ዛሎና ዓይሁዶ ማዒባአ ዓሳ ባኣካ ፆኦሲ ማዴ ባኮ ቢያ ገይዲ ገይዲ ኬኤዜኔ። 20 ዬያ ዋይዜ ዋዶና ቢያሢ ፆኦሲ ጋላታፆ ጳውሎሴም፡- «ዒሻሢዮ! ሚርጌ ሺያና ገይዲንታ፣ ኪሪሰቶሴ ጉሙርቃ ዓሲ ዓይሁዶ ዓሳ ባኣካ ዓአያ ማዔሢና ሃሢ ቢያሢ ሙሴ ዔርዜ ዋጎ ዓርቁ ካገያ ማዔሢ ኔኤኒ ዔራኔ፤ 21 ኔኤኒ ዓይሁዶ ማዒባአ ዓሳ ባኣኮይዳ ናንጋ፣ ዓይሁዶ ዓሳ ቢያ ሩኣቶኮ ዒንሢኮ ዓቲንቶ ቤርቶ ቲቁፖቴ፤ ሃሢ ዋጎዋ ኩንሢፖቴ» ጌዒሢና ሙሴ ዔርዜ ዋጎ ዓሳ ሃሻንዳጉዲ ማሃኔ ጌይንቴሢ ኑ ዋይዜኔ። 22 ማይ ዋዶቴ ኮሻካንዳይ? ሙኪፆ ኔኤኮ ዔያታ ጎኔና ዋይዛንዳኔ፤ 23 ዬያሮ ኩኒኒ ጋዓ ባኮ ማዴ፤ ኑ ባኣኮይዳ ናኣቢ ዓአ ያይዶ ዓሲ ዓአኔ። 24 ዔያቶ ዔኪጋገ ዔያቶና ዋላ ማዒ ኔና ጌኤሼ፤ ቶኦኮ ጋገሮ ዔያታ ጉኡሊንታንዳጉዲ ጌኤዢ ማኣሮም ዒንገንታ ሚኢሻ ዔያቶም ጨጌ፤ ዬያ ኔ ማዴቶ ኔ ዑፃ ጌሰቲንታ ጌኤዛ ጉሪ ማዔሢና ኔኤኒያ ኔ ቶኦኪና ሙሴ ዔርዜ ዋጎ ኩንሢያ ማዔሢ ቢያሢ ዔራንዳኔ። 25 ኪሪሰቶሴ ጉሙርቃ፣ ዓይሁዶ ማዒባአ ዓሳ ዛሎ ጋዓንቴ ለሌ ካኣሺም ሹኪንቴ፣ ዒኢቲ ባኣዚ ሙዒፖቴ፤ ሱጉሢያ ዑሽኪፖቴ፤ ሱጉሢ ሾኦቲ ባኣንቴ ጨኡሊንቲ

21:21 21:21 ዳኪ. ማዳ 11:28። 21:23 21:23 ገይ. ማፃ 6:13-21።

ሃይቄ ቆልሞ ሙዲፖቴ፤ ማቾ ሃሃ ዓሊ ማዲባኣያና ላሂሂና ዬያጉዴ ባኣዚ ማዲፖቴ» ጋዓያ፣ ኑኡኒ ዋላ ጌሰቲ ዔቂሴ ኪኢታ ዔያቶም ኑ ዳከኔ» ጌዔኔ።

26 ዬካፓ ጳውሎሴ ዓሶንሢ ዔኪ ዚሮ ጉቴሎ ዔያቶና ዋላ ዑያ ጌኤሾ ዋጎ ኩንሢኔ፤ ጌኤሽከንቶ ኬላ ዋኣዒ ማዓቲያ ሃሃ ፔቴ ፔቴ ዓሶ ዛሎ ያኦሲም ዒንጎ ባካ ዒንገንታሢ ዓይዲታቴያ ዔርዛኒ ጌኤዠ ማኣሪ ዒ ጌሌኔ።

ጳውሎሴ ጌኤዠ ማኣሪ ዓርቂንቴሢ

27 ለንካዎ ኬላ ጋፓኒ ዑካዛ ዒሲያ ዓጮይዳፓ ሙኬ ዓይሁዶ ዓሳ ጳውሎሴ ጌኤዠ ማኣሪ ዓኣንቴ ዛጋያ፣ ዴራ ቢያ ዒዛይዳ ፑርታ ማለሢና ዔቃንዳጉዲ ማሂ ዒዛ ዓርቂኔ፤ 28 ዬካፓ ዔያታ፡- «ዒሰራዔኤሌ ዓሲዮቴ! ኑና ዓልቁዎቴ፤ ኑኡኮ ዴርንታ ሙሴ ዔርዘ ዎጎንታ ሃሃ ሃያ ጌኤዠ ማኣሪዎ ጫሽኪ ጫሽኪ ዓጮ ቢያይዳ ዓኣ ዴር ቢያ ዔርዛሢ ሃያ ዓሢከ፤ ዬይ ዒዛም ገዶ ዒፃም ዓይሁዴ ማዲባኣ ዓሶ ጌኤዠ ማኣሪ ጌልዚ ሃያ ያኦሲም ዴማዴ ቤዘዎ ዒኢሳሢ ዒዛከ» ጌዒ ጌዒ ዒላቴኔ። 29 ዬኖ ዔያቶ ጌይሴሢ ዬያኮ ቤርታ ዔፕሶኔ ዓጮይዳ ሾይንቴ ፃሮፒሞሴ ጎሃሢ ጳውሎሴና ዋላ ካታዎይዳ ዓኣንቴ ዔያታ ዛጌሢሮ ዒዚ ዬያ ዔኪ ጌኤዠ ማኣሪ ጌሌያ ማሌሢሮከ።

30 ዬያሮ ካታማ ቢያ ዎኦቶንዶ ጎይሢ ባይዜኔ፤ ዬማና ዴራ ቢያ ፔቱሞና ጳሽኪ ጳሽኪ ሙካያ ጳውሎሴ ዓርቂ ጎቼ ጌኤዠ ማኣሪፓ ኬሲ፣ ጌኤዠ ማኣሪኮዎ ካሮ ዑኬና ዎዴኔ። 31 ዓሳ ጳውሎሴ ዎዳኒ ማለዛ፡- «ዬሩሳላማ ካታማ ዎኦቶንዶ ጎይሢ ባይዜኔ» ጋዓ ኪኢታ ሮማ ዓጮኮ ፖኦሊሶ ዓይሃሢም ዎይዚንቴኔ። 32 ዬያሮ ዒዚ ዒዛኮ ካፓ ዓሶና ፃኤቶ ፖኦሊሶ ዓይሃ ዓሶዎ ፔኤና ዋላ ዔኪ ዑኬና ጳሽኪ ጳሽኪ ዓሶ ባንሢ ዴንዴኔ፤ ዓሳ ዬያ ሮማ ዓጮ ፖኦሊሶ ዓይሃሢንታ ኮራ ካፓ ዓሶዎ ዴንቃያ ጳውሎሴ ጳርቂያ ሃሽኔ። 33 ሮማ ዓጮ ፖኦሊሶ ዓይሃሢ ጳውሎሴ ዓርቂ ላምያ ካኒ ቢራታና ቱኪንታንዳጉዲ ዓይሢኔ። ዬካፓ ዒዚ ያናታቴያ ሃሃ ዓይጎ ማዳቴያ ዔራኒ ያኦጮኔ። 34 ዒማና ዴራ ዴማ ዴማ ባኣዚ ጋዓያ ሃሃ ዒላታያ ማዔሢሮ ፖኦሊሶ ዓይሃሢ ፒዜ ጌኤዛ ዎናታቴያ ዔራኒ ዴንዳዒባኣኦ፤ ዬያሮ ዔያታ ፖኦሊሶ ዓኣ ቤዘ ጳውሎሴ ዔውታንዳጉዲ ዓይሢኔ። 35 ጳውሎሴ ኬኤሎ ዑያ ከሰካዛ ዴራ ቢያ ሚርጌና ዳጋ ዔቂሲ ፑርታ ባኣዚ ማዳኒ ኮዔሢሮ ፖኦሊሳ ኬዲ

21:25 21:25 ዳኪ. ማዳ 15:29። 21:29 21:29 ዳኪ. ማዳ 20:4።

ዔኪ ዒዛ ዓኣዳኔ። 36 ዴራ ዒማና፡- «ዒዛ ዎዎዲዎቴ» ጌረ ጌረ ዒላቲና ዒዛኮ ጊንፆ ዓኣዳኔ።

ጳውሎሴ ጌኤዞ ማሃኒ ጌሰቴ ጌኤሲ

37 ፖኦሊሳ ፔኤኮ ዓኣ ቤዞ ዒዛ ዔኪ ጌልዛኒ ዑካኣና ጳውሎሴ ሮሜ ዓጮ ፖኦሊሶ ዓይሣሢ ኮራ፡- «ፔቴ ባኣዚ ታ ኔኤም ኬኤዛንዳጉዲ ኔ ዓይሣንዳ?» ጌረ ፆኤጫዛ፡ ዒዚያ ማሃፆ፡- «ኔኤኒ ጊሪኬ ዓጪ ሙኡቺ ዔራ? 38 ሃሢ ዑኬ ካኣቲም ዎይዞ ዓዲ ዴሮዎ ፑርቲሲ ሃሃ ዓሲ ዎዴ ፆይዶ ሺያ ዓሲያ ዔኪ ዓሲ ናንጉዎ ዳውሎ ፑኒንቴ፡ ጊብፄ ዓጮ ዓሢ ኔናቱዎዳ?» ጌዔኔ።

39 ጳውሎሴ፡- «ታኣኒ ኪልቂያይዳ ኮሺ ዔርቲያ ማዔ፡ ፄርሴሴ ካታሜሎይዳ ሾይንቴ ዓይሁዴ ዓሲኬ፤ ሃዳራ ታኣኒ ዴሮም ኬኤዞም ጌዔቲራ» ጌዔኔ።

40 ዬካፓ ዒዚ ኬኤዛንዳጉዲ ዓይሣዛ ጳውሎሴ ኬኤሎይዳ ዓቂ ዴራ ዚቲዮ ጋዓንዳጉዲ ኮቺና ዳዌም ዴራ ዚቲዮ ጌዔሰካፓ ዒብሬ ዓሶ ሙኡቺና ሂዚ ጌረ ኬኤዚሢ ሳርቂ።

22

1 «ታ ዒሾንሦ፡ ታ ዓድንሦ፤ ሃይሾ ሃሢ ታ ዒንሢም ኬኤዛ ባኮ ዎይዙዎቴ» ጋዓዛ፡ 2 ዒዚ ዒብሬ ዓሶ ሙኡጮና ጌሰታሢ ዓሳ ዎይዞፆ ዎንዳሰካፓ ባሼ ዚቲዮ ጌዔኔ፤ ዬካፓ ጳውሎሴ ፔኤኮ ጌኤዞ ጌሰታፆ ሂዚ ጌዔኔ፡-

3 «ታኣኒ ኪልቂያይዳ ዓኣ ፄርሴሴ ካታዎይዳ ሾይንቴያ ዓይሁዴ ዓሲኬ፤ ታኣኒ ዲጩሢያ ሃኖ ዬሩሳላሜ ካታዎይዳኬ። ዓድንሢ ዎጎ ኮሺ ታኣኒ ዔሪ ዓዳ ሃሢ ዒንሢ ማዳ ጎይፆ ዒናፓ ናሽኪ ፆኦሲም ታ ማዳያኬ፤ ታና ዔርዜሢያ ጌማሊያሌ ጎሥሢኬ። 4 ሃኖ፡ ጎዳ ጎይፆ ሃንታ ዓሶ ቢያ ታ ዳውሳያኬ፡ ዛሎ ታ ዎዲያ ዎዳኔ፤ ዓቲንቆንታ ላኣሎንታ ዓርቂ ዓርቂ ቱኡዞ ማኣራ ታ ቱኡሳኔ። 5 ዬይ ጎኔ ማዒፆ ቁኤሶኮ ቢያ ሱኡጋሢና ዎጎ ዎጋ ዓሳ ቢያ ታኣም ማርካዳንዳኔ። ዬያ ሌሊቱዎንቴ ዴማሰቆይዳ ዓኣ ዬናጉዴ ዓሶ ቱኪ ዬሩሳላሜ ዔኪ ሙኪ ሜታሳኒ ዳንዳዒሳ ፆኣፒንቴ ኪኢታ ዴማሰቆይዳ ዓኣ ቢቶ ዓሶም ዒንጋኒ ታ ዔኬሢያ ቁኤሶ ቢያኮ ሱኡጋሢንታ ዬያቶ ዎጎ ዎጋ ዓሶንታፓኬ።

**ጳውሎሴ ኪሪሰቶሴ ባንሢ ማዔ ጎይፆ ኬኤዜሢ
(ዳኪ. ማዶ 9:1-19፤ 26:12-18)**

6 «ዬያይዲ ዔኪ ታኣኒ ዳማሰቆ ዳንዲ ካታሞኮ ዑካኣና ዓባ ሳዛ ጫርጌ ዋደይዳ ታ ዔሩዋንቴ ዴኔፒ ዓኣፒዳ ዳካ ፖዒ ታ ኮይላ ፖዔኔ። 7 ዓማና ታኣኒ ቶጊ ዓኣዳ ባካፓ ሳዓ ሎኦሚ ሳውሌ! ሳውሌ! ኔ ታና ዓይጋ ዳውሳይ? ጋዓ ዑኡሲ ዋይዜኔ። 8 ታኣኒ ሳዳሢዮ! ኔ ዖናዳይ? ጌዔኔ፤ ዒዚያ ማሃዖ ታኣኒ ኔ ታና ዳውሳ ናዚሬቶ ዩሱሴኬ» ጌዔኔ። 9 ታኣና ዋላ ዓኣ ዓሳ ፖዖ ዛጌያፓዓቴም ዒዚ ታኣና ዋላ ጌሰታኣና ዋዚ ጌዔቴያ ዑኡዞ ዔያታ ዋይዚባኣሴ። 10 ታኣኒያ ሳዳሢዮ! ታ ዓይሳ ዋደንደይ? ጋዓዛ፣ ሳዳሢ ታኣም ኬኤዛዖ ሃሢ ዔቁጋፓ ዳማሰቆ ዓኣዳ፤ ኔ ማዳንዳ ባካ ቢያ ዒኢካ ኔኤም ኬኤዚንታንዳኔ» ጌዔኔ። 11 ዓኣፓ ታኣኮ ፖዓ ዲኬሢሮ ዛጋኒ ዳንዳዒባኣያ ማዓዛ ታኣና ዋላ ዓኣ ዓሳ ኩጮ ታኣኮ ዓርቂ ጎቺ ታና ዳማሰቆ ሄሊሴኔ።

12 «ዒኢካ ሃናኒያ ጌይንታ ፔቴ ዓሲሰኬይ ዓኣኔ፤ ዩይ ዓሢ ዳማሰቆይዳ ዓኣ ዓይሁዶ ዓሳ ቢያ ዒዛ ጋሳታያ፣ ሙሴ ዔርዘቴ ዋሳዋ ቦንቻ ዓሲኬ። 13 ዒዚ ታ ኮራ ሙኪ ዓጫ ዔቃዖ፡- ዒሻሢዮ ሳውሌ! ዓኣፓ ኔኤኮ ጊንሢ ዛጎንጎ፣ ጋዓዛ፣ ዩማና ኔጉዋዖ ዓኣፓ ታኣኮ ዛጌም ዒዛኣ ታ ዳንቁኔ። 14 ዒዚ ታኣም ኡ ዓደንሢ ጾኦዛሢ ኔ ዒዛኮ ማሊያ ዔራንዳጉዲ፣ ያላሢያ ኔ ዛጋንዳጉዲና ዑኡዞዋ ኔ ዒዛኮ ዋይዛንዳጉዲ ቤርታዲ ኔና ዒ ደኦሬኔ። 15 ዩያ ዒዚ ማዳሢ ኔ ዛጌ ባኮና ዋይዜ ባኮናኮ ዓሲ ቢያ ቤርቲዳ ዒዛኮ ኔ ማርካ ማዓንዳጉዲኬ። 16 ሂዳዖ ሃሢ ኔ ዓይሳሮ ናጋይ? ዔቁጋፓ ዋኣዖ ማሰቴ፤ ሳዳ ሺኢቂ ሳሞይዳፓኣ ማሰቲ ጌኤሽኬ» ጌዔኔ።

17 «ዩካፓ ዩሩሳላሚ ማዒ ታ ሙኪ ጌኤዦ ማኣሮይዳ ሺኢቃኣና ጾኦሲ ፔጋሲ ዳቂ ባኣዚ ታ ዛጌኔ። 18 ዩማና ሳዳሢ ታኣም ዳዲ ሩኤኒ ታ ዛሎና ኬኤዛ ማርካቶ ኔኤኮ ዔያታ ዔኪንዲዋኣሢሮ ኔጉዋዖ ሩኤሪና ዩሩሳላሚይዳፓ ኬሰኬ!» ጌዔኔ። 19 ታኣኒያ ሳዳሢዮ! ዓይሁዳ ዓሳኮ ቡኪንቶ ቤዞ ዓኣዲ ዓኣዲ ኔና ጉሙርቃ ዓሳ ቢያ ታ ቱኬሢና ጳርቁሢ ዔያታ ፔ ቶኦኪና ዔራኔ። 20 ኔኤኮ ማርካ ማዔ ዒሰጂፓሴ ዋደዋኣና፣ ታኣኒያ ታ ቶኦኪና ዋደ ዓሳ ዓጫ ዔቁ ዔያቶና ዋላ ዋደዖ ቃራኬ ጌዔኔ፤ ዓፒሎዋ ታ ዔያቶኮ ካፔኔ፤ 21 ሳዳሢ ጊንሢ ሃኬ ዓኣ፣ ዓይሁዳ ማዒባኣ ዜርዖ ባንሢ ታ ኔና ዳካንዳሢሮ ዔቁ ዳንዴ» » ታኣም ጌዔኔ።

ጳውሎሴ ሮሜ ዓጪ ዓሲ ማዒያ ፔጋሲ ኬኤዘሢ

22 ዩያ ሄላንዳኣና ዳራ ቢያ ጳውሎሴኮ ጌኤዞ ዋይዛኔ፤ ዩማፓ ዓሳ ዑኡዞ ዳጊዲ፡- «ሃያጉዳ ዓሲ ሳዖይዳፓ ባይቆም! ሃያጉዳ

22:20 22:20 ዳኪ. ማዳ 7:58።

ዓሲ ሸምፖና ናንጋኒያ ኮይሱዋሴ!» ጌቢ ጌቢ ዒላቴኔ። 23 ዒማና ዒያታ ዒላቴ ዒላቴ ማኣባሢ ፔኤኮ ከሲ ዠገገ ዠገገ ዓጪያ ሳዓፓ ዔኪ ዔኪ ጫሪንጮ ባንሢ ላኣሌኔ። * 24 ፖኦሊሶ ዓይሣሢ ዬያ ዛጋያ ጳውሎሴ ፖኦሊሳ ዓኣ ቤዞ ጌልዛንዳጉዲ ፖኦሊሶ ዓይሢ፣ ዴራ ዒዛይዳ ዓይጎሮ ሃያይዲ ዒላታቴያ ዔራኒ ጳርቂ ጳርቂ ዒዛ ያኦጫንዳጉዲ ዓይሣኔ። 25 ዒማና ዒልዒዳፓ ፑኡሲንቴ ቃልሾና ፒሪ ቱኪ ጳርቃኒ ዔያታ ጊኢጋኣና ጳውሎሴ ዒዛ ኮራ ዔቂ ዓኣ ጄኤቶ ፖኦሊሶ ዓይሣሢ ኮራ፡- «ሮሜ ዓጪ ዓሲ ማዔያ ፖጊንቴባኣንቴ ጳርቃንዳጉዲ ዒንሢሞ ዓይሢንቴያ?» ጌዔኔ።

26 ጄኤቶ ፖኦሊሶ ዓይሣሢ ዬያ ፑይዛያ ሮሜ ዓጪ ፖኦሊሶ ዓይሣሢ ባንሢ ዓኣዲ፡- «ኔኤኒ ፑዳኒ ጋዓይ? ሃይ ዓሢ ሮሜ ዓጪ ዓሲኬ!» ጌዔኔ።

27 ዬያሮ ፖኦሊሶ ዓይሣሢ ጳውሎሴ ባንሢ ደጪጋፓ፡- «ሂንዳ ታኣም ከኤዜ፤ ኔኤኒ ሮሜ ዓጪ ዓሲዳ?» ጋዓዛ፣ ዒዚያ፡- «ሂዮ» ጌዔኔ።

28 ፖኦሊሶ ዓይሣሢ፡- «ታኣኒ ዒዛ ዓጪ ዓሲ ማዓኒ ማርጌ ማኢሾ ጪጌኔ» ጋዓዛ፣ ጳውሎሴ ጊንሣ፡- «ታኣኒ ጋዓንቴ ሮሜ ዓጪ ዓሲ ማዓ ዒኢካ ሾሾይንቴያኬ» ጌዔኔ።

29 ዬያሮ ዒዛ ያኦጫኒ ጊኢጊንቴ ዓኣ ዓሳ ኔጉዋዎ ዒዛ ኮራፓ ሸኢኬኔ፤ ፖኦሊሶ ዓይሣሢያ ሮሜ ዓጪ ዓሲ ማዔሢ ካኒ ቢራታና ቱሲሴሢሮ ዒጊጪኦ።

ጳውሎሴ ፑጎ ፑጋ ዓሶ ቤርቶ ሸኢኬሢ

30 ዚሮ ጉቴሎ ፖኦሊሶ ዓይሣሢ ዓይሁደ ዓሳ ጳውሎሴ ፑጎና ዓይሢሳሢኮ ፐዜ ማዔ ካራ ዓይጎታቴያ ዔራኒ ኮዒ፣ ቄኤሶኮ ሱኡጎና ፑጎ ፑጋ ዓሶና ቢያ ቡከንታንዳጉዲ ዓይሣኔ፤ ዬካፓ ጳውሎሴ ቱከንቴ ካኖ ቢራቶ ቡሊ፣ ዔያቶ ቤርቶ ዒዛ ዒ ሸኢኬኔ።

23

1 ዬካፓ ጳውሎሴ ፑጎ ፑጋ ዓሶ ጊዥ ጌቢ ዛጋያ፡- «ዒሾንሢሦቴ! ሃኖ ሄላንዳኣና ቢያ ፑዴ ያኦሲ ቤርቶይዳ ታ ናንጌሢ ኮሺ ማላሢናኬ» ጌዔኔ። 2 ቄኤሶ ቢያኮ ሱኡጋሢ፣ ሃናኒያ ጋዓንቴ ጳውሎሴኮ ዳንጎ ባዓንዳጉዲ ኮራ ዔቂ ዓኣ ዓሶ ዓይሣኔ። 3 ዬማና ጳውሎሴ ሃናኒያም፡- «ኔኤኒ ቦኦሪንታሢና ዑፃ ማኤቺንቴ ኮጫሦ!

* 22:23 22:23 ዓይሁደ ዓሳ ዬያ ማዔሢ ዔያታ ዳጋዳዎ ማዳ ባኣዚታሢሮ ጳውሎሴ ማዳ ባካ ዔያቶ ዳጋሲምኬ።

ኔና ያኦሲ ጳርቃንዳኔ፤ ዋጌ ጎይሢና ዋጋኒ ሃካ ኔ ዳዒ ዓኣዖ ዋጌባኣ ጎይሢና ታና ጳርቃንዳጉዲ ኔ ዓይሣ?» ጌዔኔ።

4 ዒኢካ ዓኣ ዓሳ ጳውሎሴ ኮራ፡- «ቄኤሶ ቢያኮ ሱኡጋሢ ማዔ፥ ያኦሲም ማዳሢ ኔ ጫጫሽካ?» ጌዔኔ።

5 ጳውሎሴያ፡- «ዒሾንሢኮ፡- ቄኤሶኮ ቢያ ዒ ሱኡጌ ማዔሢ ታ ዔሪባኣሢሮኬ፤ ጌኤዠ ማዓኣገይዳ ሩ ኔ ዳሮኮ ሱኡጋሢ ዑዖይዳ ፑርታ ጌኤሲ ጌሰቲ፡፡ ጌይንቲ ዓኣፒንቴኔ» ጌዔኔ።

6 ጳውሎሴ ዒኢካ ዓኣ ዓሳይዳ፡፡ ሃካሢ ፔርሴ ዓሲ፤ ዛላ ሶዶቄ ዓሲ ማዔሢ ዔራዖ፡- «ዒሾንሢኮ፡- ታኣኒ ፔርሴ ዓሶ ዓጳፓ ሾይንቴያ ፔርሴ ዓሲኬ፤ ሃይሾ ሃሢ ታኣኒ ዋሳ ዓሶ ቤርቶ ሺኢኬሢሢ ሃይቄ ዓሲ ዔቃንዳያታሢ ጉሙርቃሢሮኬ» ጌዒ ዑኡዘ ፔኤሲ ዴጊዲ ዋሳ ዋጋ ዓሶ ባኣካ ኬኤዘኔ።

7 ጳውሎሴያ ዬያ ኬኤዘዛ ፔርሴ ዓሶና ሶዶቄ ዓሶና ባኣካ ዣላ ማዠንቴም ዋሳ ዋጋ ዓሳ ላምዖ ፓቂንቴኔ። 8 ዓይጎር ጌዔቶ ሶዶቄ ዓሳ፡- «ሃይቢ፡፡ ዔቂሢ ባኣሴ፤ ያኦሲኮ ኪኢታንቻኣ ባኣሴ፤ ዓያናኣ ባኣሴ» ጋዓዛ፥ ፔርሴ ዓሳ ጋዓንቴ «ዬይ ባካ ቢያ ዓኣኔ» ጌዒ ጉሙርቃኔ። 9 ዬያር ዴኤፒ ዣላ ዔቂኔ፤ ፔርሴ ዓጳፓ ማዔ ፔቴ ፔቴ ሙሴ ዔርዘ ዋሳ ዔርዘ ዓሳ ዔቃዖ፡- «ኦኡኒ ሃያ ዓሢዳ ፔቴታዖ ፑርታ ባኣዘ ዴንቂባኣሴ፤ ዓያና ሃሣ ያኦሲኮ ኪኢታንቻ ዒዛም ኬኤዘያ ናንዳኔ ኔ ዔይጎ ዔራንዳይ?» ጌዒ ማርሜኔ።

10 ዣላሢ ደዲ ደዲ ዴንዴሢር ዓሳ ጳውሎሴ ሾኦሊ ላኣሉዋጉዲ ፖኦሊሶ ዓይሣሢ ዒጊጫዖ፡- «ኬዲ ዓሶ ባኣካ፡፡ ጳውሎሴ ጎቹ ኬሲ ዔኪ ዬዒ፥ ፖኦሊሳ ዓኣ ቤዘ ዔኪ ዓኣዲዋቴ!» ጌዒ ፖኦሊሶ ዓይሢኔ።

11 ዬኖ ዋንቴሎ ጎዳሢ ጳውሎሴኮ ኮይሎይዳ ዔቃዖ፡- «ዒጊጨ፡፡ ዬሩሳላሜይዳ ታኣም ኔ ማርካዴሢጉዲ ሃሣ ሮሜይዳኣ ኔ ታኣም ማርካዳንዳያ ኮይሳኔ» ጌዔኔ።

ጳውሎሴ ዋዳኒ ዓሶኮ ዋላ ዘርቲዖ

12 ሳዓ ካራዘ ዓይሁደ ዓሳ ቡኪንታዖ፡- «ጳውሎሴ ኦ ዋዲዋዖ ሙኡዚያ ሙዒ ዑሽኮ ባኣዚያ ዑሽካዓ» ጌዒ ጫኣቄኔ። 13 ዬኖ ጌዒ ፑርቶ ማሊዖና ዋላ ዘርቲ ዓሶኮ ፓይዳ ዖይዲታሚ፡፡ ዑሣኬ። 14 ዔያታ ቄኤሶኮ ሱኡጎና ጨዋና ኮራ ዓኣዳዖ፡- « ጳውሎሴ ኦኡኒ ዋዲዋዖ ሙኡዚ ሙዒንዲዋሴ» ጌዒ ጫኣቄኔ፤ 15 ዬያር ዒንሢ

23:3 23:3 ማቴ. 23:27-28። 23:5 23:5 ኬሲ. ማግ 22:28። 23:6 23:6 ዳኪ. ማዳ 26:5፤ ፒላጲ. 3:5። 23:8 23:8 ማቴ. 22:23፤ ማር. 12:18፤ ሉቃ. 20:27።

ዎጎ ዎጋ ዓሰና ዎላ ጌሰታዎ፡ ኮሺ ዒንሢ ያኔጫንዳ ባኣዚ ዓኣያ ማሊሲጋጋ፡ ጳውሎሴ ዒንሢም ዒዚ ዔኪ ዩዓንዳጉዲ ፖኦሊሶ ዓይሣሢ ያኔጫዎቴ። ኑኡኒያ ዒዚ ሃካ ዒንሢ ቤርቶ ሄላንዳሢኮ ቤርታ ዒዛ ዎዳኒ ገኢጌኔ» ጌዔኔ።

16 ጋዓንቴ ጳውሎሴኮ ዔኤዚማቲ ማዓ፡ ናይሰኬያ ዬኖ ፑርቶ ዘርቶና ማሊያሎ ዎይዜሢ ፖኦሊሶ ዓኣ ቤዞ ዴንዲ ጌላዎ ሃይሶ ጳውሎሴም ከኤዜኔ። 17 ጳውሎሴያ ያኔቶ ያኔቶ ፖኦሊሶ ዓይሣዞንሢዳጋ ፔቲሢ ዔኤላዎ፡- «ሃይ ናዓሢ ሮሜ ዓጮ ፖኦሊሶ ዓይሣሢም ከኤዛ ባኣዚ ዓኣያታሢ ሮ ዒዛ ቤርቶ ሺኢሹ» ጌዔኔ። 18 ያኔቶ ፖኦሊሶ ዓይሣሢ ናዓሢ ዔኪ ሮሜ ዓጮ ፖኦሊሶ ዓይሣሢ ኮራ ጌላዎ፡- «ቱኡዞ ዓሢ፡ ጳውሎሴ ሃይ ናዓሢ ኔኤም ከኤዛ ባኣዚ ዓኣሢ ሮ ኔ ቤርቶ ዒዛ ሺኢሻንዳጉዲ ታና ሺኢቄ» ጌዔኔ።

19 ሮሜ ዓጮ ፖኦሊሶ ዓይሣሢ ናዓሢኮ ኩጮ ዓርቂ ዶጪሳዎ፡- «ኔ ታኣም ከኤዛ ባካ ዓይጎዳይ?» ጌዒ ዒዛ ዶማሲ ያኔጫኔ።

20 ናዓሢያ ዒዛም ከኤዛዎ፡- «ዓይሁዶ ዓሳ ጳውሎሴ ዛሎ ባኮ ዶዲሺ ያኔጫያ ማሊ ዚሮ ዎጎ ዎጋ ዓሰ ቤርቶ ኔ ዔያቶም ሺኢሻንዳጉዲ ኔና ያኔጫኒ ዎላ ዘርቲኔ፤ 21 ጋዓንቴ ኔ ዔያቶም ዔኤዒ፡ ዓይጎሮ ጌዔቶ ዔያታ ሲዛ ኑ ዎዲዎዎ ሙኡዚያ ሙዓዓ፡ ዑሽኮ ባኣዚያ ዑሽካዓ» ጌዒ ዎላ ዘርቲ ጫኣቄ ያይዲታሚጋ ባሽ ዓሲ ዒዛ ዎዳኒ ካቲ ዓኣኔ፤ ሃሢ ዔያታ ካጋሢ ኔ ዑኡዞ ሌሊኬ» ጌዔኔ።

22 ሮሜ ዓጮ ፖኦሊሶ ዓይሣሢያ፡- «ሃያ ኔ ታኣም ከኤዜ ባኮ ሜሌ ያኔማኣ ከኤዚ፡» ጋዓዎ ናማሢ ዳከኔ።

ጳውሎሴኮ ቂሳሪያ ዳኪንቴዎ

23 ዩካጋ ሮሜ ዓጮ ፖኦሊሶ ዓይሣሢ ያኔቶ ያኔቶ ፖኦሊሶ ዓይሣዞንሢዳጋ ላምዎንሢ ዔኤላዎ፡- «ዲሞኮ ያኔሻ ዎዴ ማዓዛ ቂሳሪያ ዓጮ ዴንዳንዳ ላምዎ ያኔታ ዶማ ዶማ ያልዚ ዓሲ፡ ላንካይታሚ ፓሮና ያላ ዓሲ ሃሣ ላምዎ ያኔታ ዎርሢና ያላ ዓሲ ገኢጊሹ፤ 24 ገንሣ ጳውሎሴማኣ ፓሮ ገኢጊሻዎ ዓጮ ዎይሣ ፒልኪሴ ባንሢ ኮሺና ሄሊሱዎቴ» ጌዔኔ፤ 25 ቃሲ ሃሣ ሂዚ ጋዓ ከኢታ ዳከኔ፡-

26 «ቦንቸንታናና ዓጮ ዎይሣና ማዔ ፒልኪሴም፤ ሃይ ከኢታ ዳኪንቴሢ፡- ቁላውዲዎሰ ሉሲያይዳጋከ፤ ኔ ኮሺዳ?

27 «ሃያ ዓሢ ዓይሁዶ ዓሳ ዓርቂ ዎዳኒ ጋዓንቴ ዒዚ ሮሜ ዓጪ ዓሲ ማዔሢ ታ ዔሬሢ ፓኣኮ ፖኦሊሶና ዎላ ታ ሙኪ ዒዛ ዳቂሹኔ። 28 ዓይጎ ዛላና ዓሳ ዒዛ ዎጎና ዓይሢሳኒ ኮዔቴያ

ዔራሲ ዔያቶኮ ዋጎ ዋጋ ዓሶ ቤርቶ ዒዛ ታ ሺኢሼኔ። 29 ጋዓንቴ ዔያታ ዓይሢሳኒ ኮዓሢ ፔ ዋጎ ዛሎ ባኣዚና ማዔሢ ታ ዔሬኔ፤ ሃሣ ሃያ ዓሢ ሃይቢና ቱኡሲናም ሄሊሳ ባኣዚ ባኣሴ። 30 ሃያ ዓሢ ዋዲሢ ሲዛይዳ ፑርታ ማሊሢ ማሊንቴሢ ታ ዋይዛያ ኔጉዋያ ኔ ባንሢ ታ ዳኬኔ፤ ዋጎና ዓይሢሳኒያ ኮዓ ዓሳኣ ፔኤኮ ሃይሶ ኔ ቤርታ ሺኢሻንዳጉዲ ታ ዔያቶም ኬኤዜኔ።»

31 ዬያር ያሎ ዓሳ ዓይሢንቴ ጎይያና ጳውሎሴ ዲማ ዔከ። ዓንቲጳጲሪሴ ጌይንታ ዓጮ ሄሊሴኔ፤ 32 ዚር ጉቴሎ ፓራሢና ዋላ ዓኣ ዓሳ ጳውሎሴና ዋላ ዴንዳንዳጉዲ ማሃያ፡ ዔያታ ጊንሣ ፔ ቤዞ ማዔኔ። 33 ፓራሢና ዓኣ ዓሳ ቁሳሪያ ሄላያ ዳኪንቴ ኪኢቶ ዓጮ ዋይሣሢም ዒንጊ፡ ጳውሎሴ ዒዛ ቤርቶ ዔከ ሺኢሼኔ። 34 ዓጮ ዋይሣሢ ኪኢቶ ዛጌሰካፓ ጳውሎሴ ኮራ፡- «ኔ ዓጮኮ ዋኖ ቤዛፓዳይ?» ጌዒ ያኦጪ፡ ኪልቂያ ዓጪ ዓሲ ማዔሢ ዔራያ፡- 35 «ኔና ዋጎና ዓይሢሳኒ ኮዓ ዓሳ ሙካዛ ታ ሃይሶ ዋይዛንዳኔ» ጌዒ፡ ካኣቲ ሄርዲሴ ማዢሴ ማኣርይዳ ዴይሢ ዒዛ ካፓንዳጉዲ ዓሶ ዓይሢኔ።

24

ጳውሎሴ ፒልኪሴ ቤርቶ ሺኢኬሢ

1 ደንጎ ኬሊኮ ጊንፃፓ ቄኤሶኮ ሱኡጋሢ ሃናኒያ ፔቴ ፔቴ ጪሚንታ ፆርፆሉሴ ጌይንታ ዋጌ ኮሺ ዔራያ፡ ዓሲ ዛላ ጌሰታሰኪያንታ ፔኤና ዔከ ቁሳሪያ ዓጮ ዴንዳኔ፤ ዔያታ ዴንዲ ዓጮ ዋይሣ ፒልኪሴ ቤርቶ ሺኢኪ ጳውሎሴ ዳቤኔ ጋዓ ባኮ ዛሎ ኬኤዜኔ። 2 ዬካፓ ጳውሎሴ ዔኤሊንቲ ሙካዛ፡ ፆርፆሉሴ ሂዚ ጌዒ ኬኤዚያ ዓርቄኔ፡-

«ቦንቹንታ ፒልኪሴ! ኔ ዛሎና ኑኡኒ ሚርጌ ኮሹም ዴንቄኔ፤ ኔኤኮ ኮዡ ዋይሢያና ኑ ዴርም ላኣሚንቲሢያ ጴዳኔ፤ 3 ዬኖ ኔኤኮ ኮዡ ማዶ ቢያ ቤዞና ቢያ ዋደናይዳ ኑ ዔኬሢ ዴኤፒ ቦንቹናኬ። 4 ሃሢ ጋዓንቴ ኔኤኮ ዋዶ ታ ጉሪ ኩርሱዋያና ሃሢ ታ ኔና ጉሪ ላቢሱዋያ ቃሚሢና ታ ኔኤም ኬኤዛ ባኮ ሺሌዐሞና ኔ ዋይዛንዳጉዲ ታ ኔና ሺኢቃኔ፤ 5 ሃይ ዓሢ ኑኡኮ ፑርታ ደርያ ማዔኔ፤ ዓጮ ቢያዳ ዓኣ ዓይሁዶ ዓሶ ቢያሢዳ ዡሎ ዔቁሳኔ፤ ናዝራ ዓሶ ጌይንታ፡ ዲሙዋ ማዢ ዓሶኮዋ ዒዚ ዔከ ዓኣዳሢኬ። 6 ሃሢ ዒዚ ያኦሲኮ ጌኤዡ ማኣር ዒኢሳኒ ጋዓንቴ ኑኡኒ ዓርቄ፡ ኑ ዋጎ ጎይያና ዋጋኒ ማሌኔ፤ 7 ጋዓንቴ ፖኦሊሶ ዓይሣ ሉሲያሴ ሙኪ ዴኤፒ ዋልቄና ኑ ኩጫፓ ዒዛ ቶሊሲ ዔከ፡ ዒዛ ዋጎና ዓይሢሳኒ ጋዓ

ዓሰዋ ኔ ቤርቶ ሺኢኮንጎ ገጫ ዓይሄኔ፤ 8 ሃይ ኑኡኒ ዒዛይዳ ሺኢሻ ጌኤዛ ቢያ ጎኔ ማዒያ ኔ ኔ ቶኦኪና ያኦጪ ዔራኒ ዳንዳዓኔ» ጋዓዛ፤ 9 ዓይሁድ ዓሳ፡- «ዬይ ባካ ቢያ ጎኔኩ» ገጫ ገጫ ሶኦሬ።

ጳውሎሴ ፒልኪሴ ቤርቶይዳ ጌሰቴ ጌኤዞ

10 ዓጮ ዎይሃ፡ ፒልኪሴ ኩቻ ዳዊ ጳውሎሴ ጌሰታንዳጉዲ ዓይሄኔ፤ ጳውሎሴያ ሂዚ ገጫ ማሄኔ፡- «ሚርጌ ለዔ ሃያ ዓጮኮ ኔ ዎይሃያ ማዒሂ ታ ዔራሂር ታ ገዳ ሺኢኩ ጌኤዞኮ ማሂያ ኔኤም ኬኤዛሂ ዎዛናኩ፤ 11 ዬሩሳላሜይዳ ታ ያኦሲ ዘጊ ካኣሽካኒ ዓኣጳንቴ ታጰ ላምዎ ኬሊዳፓ ባሺንዲዎኣሂ ኔ ኔ ቶኦኪና ዔራኒ ዳንዳዓኔ፤ 12 ጌኤዞ ማኣርይዳ ማምዎ ዓይሁድ ዓሰኮ ቡኪንቶ ቤዘይዳ ሃሃ ካታዎይዳ ማዕቶዎ ዓይጎ ዓሲናታዎ ታ ማርማንቴ፡ ዴርዎ ዛሎም ታ ዔቁሳንቴ ዔያታ ታና ዴንቁባኣሴ፤ 13 ሃሂ ታ ገዳ ሺኢኩ ጌኤዞኮ ቢያ ጎናሲሂ ማዓንዳ ማርካ ፔቴታዎ ዔያታ ኔኤም ሺኢሻኒ ዳንዳዑዎሴ። 14 ጋዓንቴ ዬያ ታ ኔኤም ፔጋሲ ኬኤዛኒ ኮዓኔ፤ ዔያታ ሩዚ ሉኡቁ ካኣሽካኔ» ጋዓ ጎይዎ ታኣኒ ኑ ዓደንሂ ያኦዛሂ ካኣሽካኔ፤ ጋዓንቴ ታኣኒ ሙሴ ዔርዜ ዎጎና ያኦሲ ማሊያ ከኤዛ ዓሰ ማፃኣፖናይዳ ፃኣፒንቴ ባኮ ቢያ ጉሙርቃኔ። 15 ዔያታ ሃጊ ማዓንዳ ዎዞ ጌሃሂጉዲ ኮዞ ዓሰንታ ፑርቶ ዓሰንታ ሃይቢዳፓ ዔቃንዳሂ ታኣኒያ ያኦሲና ጉሙርቃኔ። 16 ዬያር ያኦሲና ዓሲና ቤርቲዳ ጌኤሺ ዒና ታኣኮ ዓኣያ ማዓንዳጉዲ ቢያ ኬሊ ታ ኮዓኔ።

17 «ዬሩሳላሜይዳፓ ታ ኬሰኬንቴ ሚርጌ ለዔ ዓኣጳሂኮ ጊንፃ ማንቆ ማዒ ታ ዓሰም ማዓንዳያ፡ ማኣድ ሚኢሺና ሃሃ ያኦሲም ዒንጊንታ ዒንጎ ባኣዚ ታኣኒ ዔኪ ሙኬኔ። 18 ጌኤዞ ማኣርይዳ ታና ዔያታ ዴንቁሂ ታ ዬያ ማዳንቴኬ፤ ዬማና ዑዎ ጌኤሺያ ካኣኮ ዎጎ ታኣኒ ኩንሃኔ፤ ሃሃ ዒኢካ ታኣና ዎላ ሚርጌ ዴሬያ ባኣሴ፤ ዛላኣ ዔቁባኣሴ። 19 ጋዓንቴ ዒሲያ ዓጮይዳፓ ሙኬ ፔቴ ፔቴ ዓይሁዴ ዓሲ ዒኢካ ዓኣኔ፤ ሂንዳ ዔያታ ታና ዎጎና ዓይሂሳኒ ጋዓ ካራ ዓኣቶ ኔ ቤርታ ሺኢኩ ኬኤዞንጎ። 20 ጊንሃ ሃሃ ዎጎ ዎጋ ዓሰ ቤርቶይዳ ታ ሺኢካዎ ማዴ ዳቢንቲ ዓኣቶ ሃሂ ሃይካ ዓኣዞንሂ ኬኤዞንጎ። 21 ጎኔና ታ ዔያቶ ባኣኮይዳ ዔቁ ሃይቁ ዓሲኮ ዔቁሂ ዓኣኔ» ጌይያና ሃሮ ታኣኒ ዎጌም ዒንሂ ቤርቶ ሺኢኩኔ ገጫ ዴጎ ገዔ ዑኡሲና ታ ኬኤዞኔ፤ ዬማፓ ዓታዛ ሜሌ ታኣኒ ማዴ ባኣዚ ባኣሴ» ጌዔኔ።

22 ፒልኪሴ ጋዓንቴ ጎዳሂ ጎይዎ ዛሎ ሚርጌና ዔራያታሂር፡- «ፖኦሊሶ ዓይሃ፡ ሉሲዮሴ ሙካዛ ዒንሂ ጌኤዞ ጌሰቴ ታ ኩንሃንዳኔ» ገጫ ዔያቶ ዳካዎ፡ 23 ጳውሎሴ ካፓ፡ ጌኤቶ ፖኦሊሶ

24:18 24:18 ዳኪ. ማዕ 21:17-28። 24:21 24:21 ዳኪ. ማዕ 23:6።

ዓይሣሢሞ:- «ፔቶዋ ዒዛ ቃዚ ሜታሱዋዎ ዛጊ ካፔ፤ ዒዛኮ ዒጊና ዒዛም ኮይሳ ባኮ ዔኪ ሙካኣና ላኣጊፖ» ጌዔኔ።

ጳውሎሴ ፒልኪሴና ዲሩሲላና ቤርቶ ሺኢኬሣ

24 ዳካ ኬሊኮ ጊንፃፓ ፒልኪሴ ዲሩሲላ ጌይንታ ዓይሁዳ ዓሲ ማዔያ ዒዛኮ ማቸሰኬኖና ዋላ ሙኪ፡ ጳውሎሴ ዔኤሊሴሰካፓ ዩሱሰ ኪሪሰቶሴ ጉሙርቁሢ ዛላ ዒዚ ኬኤዛሢ ዋይዜኔ።

25 ዲሉሞና፡ ዓሲ ፔና ዋይሣንዳ ዛላና ሃሣ ያኦሲ ሃጊ ቢያሢዳ ዋጋንዳሢ ዛሎ ጳውሎሴ ኬኤዛዛ ፒልኪሴ ዒጊጫዎ:- «ሃሢ ዴንዴ፤ ጊኢጌቴ ሜሌ ኬሊና ታ ኔና ዔኤሊሳንዳኔ» ጌዔኔ።

26 ፒልኪሴ ጳውሎሴይዳፓ ሚኢሺ ዔካጊ ዋዛ ጌሢ፡ ሚርጌ ኬሊ ጳውሎሴ ዔኤሊሲ ዔኤሊሲ ጌሰታኔ።

27 ላምዎ ሌዔኮ ጊንፃፓ ጳርቁዮሰ ፒሰፆሴ ጎዎሢ ፒልኪሴ ቤዛ ጌሌኔ፤ ፒልኪሴያ ዓይሁዳ ዓሶ ዋዛሳጊ ጳውሎሴ ቱኪንቴ ቤዛ ሃሺኔ።

25

ጳውሎሴኮ ጌኤዛ ሮሜ ካኣቲ ቤርቶ ሺኢኮም ያኦጪዎ

1 ፒሰፆሴ ፔኤኮ ዒ ዓጮ ዋይሣ ቤዛ ጌሊ ሃይሃ ኬሊ ዴዓዎ፡ ቁሳሪያይዳፓ ዩሩሳላሜ ዓኣዴኔ፤ 2-3 ዒኢካ ቁኤሶኮ ሱኦጎና ፔቴ ፔቴ ዓይሁዳ ዓሶኮ ዴኤፖና ጳውሎሴ ማዴ ባኮ ዛሎ ኬኤዛዎ:- «ጳውሎሴ ሃካ ዩሩሳላሜ ዔኪ ኦም ዩዔቴራ» ጌዒ ዒዛ ኮራ ሚርጌና ሺኢቁኔ፤ ዩያ ዔያታ ጋዒጊ ዳንዳዔሢ ጎይፃ ካቲ ጳውሎሴ ዋዳጊ ኮዔሢሮኬ። 4 ፒሰፆሴ ጋዒንቴ:- «ጳውሎሴ ቁሳሪያይዳ ቱኤዛ ማኣራ ቱኡቴ ካፒንቴ ዓኣኔ፤ ታኣጊያ ሃሣ ዑኬና ማዒ ዒኢካ ዓኣዳንዳኔ፤ 5 ዒንሢኮ ዋይሣ ዓሳ ታኣና ዋላ ቁሳሪያ ዓኣዲ፡ ጳውሎሴ ማዴ ዳቢንቴ ዓኣቲ ዒኢካ ዔያታ ዋጊሶንጎ» ጌዔኔ።

6 ፒሰፆሴ ሳሊዳፓ ዴንዲ ታጾ ኬሊ ሄላንዳኣና ዔያቶና ዋላ ዴዔሰካፓ ቁሳሪያ ዓጮ ዓኣዴኔ፤ ዒኢካ ዒዚ ሄላዎ ዚር ጉቴሎ ዋጎ ዋጎ ቤዛይዳ ዴዒ ዓሳ ዒዛም ጳውሎሴ ዔኪ ሺኢሻንዳጉዲ ዓይሣኔ። 7 ዩካፓ ጳውሎሴ ሙካዛ ዩሩሳላሜይዳፓ ሙኬ ዓይሁዳ ዓሳ ዒዛኮ ዓጮ ማንጊ ዔቃዎ ዒዛ ላሣንዳ ማርካ ዴንቃኮዋያ ሚርጌ ዴኤሢ ሃይሴ ዒዛይዳ ሺኢሺኔ፤ 8 ጳውሎሴያ:- «ታኣጊ ዓይሁዳ ዓሶኮ ዋጎይዳ ማዔቶዋ ጌኤዠ ማኣርይዳ ሃሣ ሮሜ ዓጮኮ ካኣቲ ዑይይዳ ማዴ ዳቢንቴ ባኣሴ» ጌዒ ማሂ ኬኤዜኔ።

9 ፒሰጾሴ ጋዓንቴ ዓይሁዶ ዓሶ ዋዛሳኒ ኮዓዖ ጳውሎሴ ኮራ:- «ዬሩሳላሜ ዓኣዲ ሃያ ባኮ ዛሎ ዒኢካ ታ ቤርታ ኔ ሞኦታኒ ዴንዲንዲዋይ?» ጌዔኔ።

10 ጳውሎሴ ጋዓንቴ ሂዚ ጌዒ ማሄኔ:- «ሃይሾ ታኣኒ ሞኦታኒ ታኒ ታና ኮይሳ፣ ሮሜ ዓጮ ካኣቲኮ ዋጎ ቤዛ ዔቄኔ፤ ኔኤኒ ኮሺ ዔራሢጉዲ ዓይሁዶ ዓሶይዳ ታኣኒ ፔቲታዖ ማዳ ዳቢንቴ ባኣሴ፤ 11 ታኣኒ ዳቤያ ማዓቶ ሃሃ ሃይቢም ታና ዋጊሳ ዳቢንቴ ታ ማዳቶ ሃይቢፓ ዳቆም ታ ጎዑቀሴ፤ ጋዓንቴ ዔያቶኮ ጌኤዛ ጉሪ ባኣዚ ማዓቶ ጾኣኒያ ታና ዔያቶም ዓኣሢ ዒንጋኒ ዳንዳዑቀሴ፤ ታኣኒ ሃሃ ጌኤዛ ሮሜ ዓጮ ካኣቲ ቤርቶ ዓኣዳንዳጉዲ ኮዓኔ» ጌዔኔ።

12 ዒማና ፒሰጾሴ ዒዛና ዋላ ዘርቲ ማዳ ዓሶና ጌሰታዖ:- «ሮሜ ዓጮ ካኣቲ ቤርቶ ታና ዳኮ» ጌዒ ኔ ጾኦሙሢሮ ካኣቲ ቤርቶ ኔ ዓኣዳንዳኔ» ጌዔኔ።

ጳውሎሴ ዓጊሪጳና ቤርኒቄና ቤርቶ ሺኢኬሢ

13 ዳካ ኬሊኮ ጊንፃ ካኣቲ ዓጊሪጳና ቤርኒቄና ፒሰጾሴ ዛጋኒ ቁሳሪያ ዓጮ ሙኮኔ። 14 ዒኢካ ዔያታ ሚርጌ ኬሊ ዴዔሢሮ ፒሰጾሴ ጳውሎሴ ዛሎ ባኮ ሂዚ ጌዒ ካኣቲ ዓጊሪጳም ፔጋሲ ኬኤዜኔ:- «ፒልኪሴ ቤርታ፣ ዋዳ ቱኪ ሃሺ ፔቲ ዓሲ ዓኣኔ፤ 15 ታኣኒ ዬሩሳላሜ ዓኣዲ ዒኢካ ዓኣንቴ ቄኤሶኮ ሱኡጎና ዓይሁዶ ዓሶኮ ጨሞና ዬያ ዓሢ ዛሎ ታኣም ኬኤዜሰካፓ ታ ዋጋንዳጉዲ ዔያታ ጾኦሙኔ። 16 ታኣኒ ጋዓንቴ ለጌም ሺኢኬ ዓሲ ሺኢሺ ዓሶ ቤርታ ዔቄ ዋጊሳ ሃይሶ ዛሎ ማሂ ኬኤዙዋንቴ ዋጊሳኒ ሺኢሺ ዓሶም ዓኣሢ ዒንጊሢ ሮሜ ዓጪ ዳምቤቱቀሴ» ጌዒ ዔያቶም ማሄኔ። 17 ዬያሮ ዋጎም ሺኢሺ ዓሳ ቡኪንቴ ሃይካ ሙካዛ ኔጉዋዖ ዚሬሎ ዋጎ ዋጎ ቤዘይዳ ዴዒ፣ ጳውሎሴ ዓሳ ዔኪ ዬዓንዳጉዲ ታ ዓይሣኔ። 18 ዬካፓ ዋጎም ሺኢሺ ዓሳ ዒ ዳቤ ባኮ ኬኤዛኒ ዔቃዛ:- «ፑርታ ባኣዚ ዒዚ ማዳያናንዳኔ» ጌዒ ታ ማላጎይዖ ጉዴያ ዋጌም ሺኢሻንዳ ባኣዚ ፔቲታዖ ዔያታ ሺኢሺባኣሴ። 19 ጋዓንቴ ዒዛና ዋላ ዔያታ ማርማሢ ፔኤኮ ካኣኸ ዛሎና ሃሃ ሃይቄያታንቴ፣ ጳውሎሴ «ሸምፔና ዓኣኔ» ጋዓ ዬሱሴና ዛሎኮ። 20 ታኣኒያ ዬያጉዴ ባኣዚ ጾኦጪፃ ታኣም ዴኤፃሢሮ ጳውሎሴ ኮራ:- «ዬሩሳላሜ ዓኣዲ ዒኢካ ሃያ ባኮ ኔ ሞኦታኒ ታኒ ዴንዲንዲዋይ?» ጌዔኔ። 21 ዒዚ ጋዓንቴ ጌኤዛ ሮሜ ካኣቲ ባንሢ ዓኣዳንዳጉዲ ኮዒ «ካኣቲ ባንሢ ታና ዳኩዋቲ» ጌዔሢሮ ታ ዒዛ ዳካንዳያ ሄላንዳኣና ቱኤዞ ማኣራ ዴዓንዳጉዲ ዓይሣኔ» ጌዔኔ።

22 ካእታሢ ዓጊሪጳ ፒሰፆሴ ኮራ፡- «ታእኒያ ዬይ ዓሢ ጌሰታ ሃይሶ ዋይዛኒ ኮዓኔ» ጌዔኔ። ፒሰፆሴያ ዒዛም፡- «ሂዴቶ ዚሮ ኔ ዋይዛንዳኔ» ጌዔኔ።

23 ዬያሮ ዚሮ ጉቴሎ ዓጊሪጳና ቤርኒቄና ካእቱም ዓፒሎ ማእዒ፥ ዴኤፒ ዒጊቻ ቦንቹንትና ፖኦሊሶኮ ሱኡጎና ሃሣ ካታምይዳ ዓኣ ዴኤፖ ዓሶና ዋላ ዋጎ ዋጎ ዳልጎ ማእሮ ጌላዛ ፒሰፆሴ ጳውሎሴ ዒኢካ ዔኤሊ ዔኪ ሺኢሸፆ፡- 24 «ካእታሢ ዓጊሪጳ! ሃሣ ዒንሢያ ቢያ ኦኡና ዋላ ዓኣ ዓሳ፤ ሃይ ዓሢ ሃካፓ ሴካ ሺምፔና ናንጋንዳያ ኮይሱዋሴ» ጌዒ ዒላቲ ዬሩሳላሜይዳ ሃሣ ሃይካ ናንጋ ዓይሁዶ ዓሳ ታ ዋጋንዳጉዲ ታና ዔያታ ፆኦጮ ዓሢ ሃይ ዒንሢ ዛጋሢኬ።

25 ታእኒ ጋዓንቴ ሃይቢም ዋጊሳንዳ ዳቢንቴ ዒዛይዳ ፔቴታፆ ዴንቁባኣሴ፤ ጋዓንቴ ዒዚ ሮሜ ዓጮ ካእቲ ባንሢ ታና ዳኬ ጌዔሢሮ ዒኢካ ታ ዳካኒኬ። 26 ያዲ ማዔቶዋ ዒዛ ዛሎ ሮሜ ዓጮ ካእቲም ታ ፆኣፒ ዳካንዳ ዔርቴ ባኣዚ ባኣሴ፤ ዬያሮ ሃሢ ዒዚ ፆኦጮንቴሰካፓ ታ ፆኣፓንዳ ባኣዚ ዴንቃንዳያናንዳኔ ጌዒ ዒንሢ ቤርቶ፥ ባሼና ሃሣ ካእቲ ዓጊሪጳ! ኔ ቤርቶ ታ ሺኢሸኔ። 27 ዓይጎሮ ጌዔቶ ቱኡሲ ዓሲ ለካ ዴጌ ቤሲ ዳከንታኣና ዒዛ ዓይሢ ባኮ ዛሎ ፔጋሱዋፆ ሃሺሢ ዔኤያቶ ታኣም ማሊ ጳዴኔ» ጌዔኔ።

26

ጳውሎሴ ካእቲ ዓጊሪጳ ቤርታ ጌሰቴ ጌኤዞ

1 ዓጊሪጳ ጳውሎሴም፡- «ኔኤኒ ኔ ዛሎ ኬኤዛኒ ዳንዳዓኔ» ጋዓዛ፥ ጳውሎሴ ቶኣኮ ሂርኪዴሰካፓ ዔቁ ሂዚ ጌዒ ጌኤዞ ማሂያ ሃይሶ ኬኤዘኔ፤

2 «ካእታሢ ዓጊሪጳ! ዓይሁዶ ዓሳ ታና ዋጎና ዓይሢሳ ባኮ ዛሎ ቢያሮ ሃሮ ታ ኔ ቤርቶይዳ ጌኤዞ ማሂያ ሃይሶ ኬኤዛሢ ኮሺ ዴኤፒ ዋዛናኬ። 3 ዓይጎሮ ጌዔቶ ኔኤኒ ዓይሁዴ ዓሶ ዳምቦና ዔያቶኮ ማርማሢና ፔጋሲ ዔራያታሢሮ፥ ሺሌዔ ዒናና ዳንዳዒ ታ ጌኤዞ ኔ ዋይዛንዳጉዲ ታ ኔና ሺኢቃኔ።

4 «ናኣቶይዳፓ ዓርቃፆ ዋይቲ ታ ናንጌቶዋ ዓይሁዶ ዓሳ ዔራኔ፤ ቤርታፓ ዓርቃፆ ታ ዓጮና ዬሩሳላሜናይዳ ታ ናንጌ ናንጎ ታኣሲ ዔያታ ዔራኔ። 5 ሃሣ ዔያታ ፔ ቶኣኪና ማርካዲኒ ኮዔቶ ኦ ካኣኸይዳ ዋጎ ኮሺ ደዲሺ ዓርቃፆ ማዔ፥ ፔርሴ ዓሶ ዛላ ማዒ ታ ናንጌሢ ዓይፆፓ ዓርቃፆ ዔያታ ዔራኔ። 6 ሃሢ ታ ሃካ ዋጎም ሺኢኬሢ ያኦሲ ኦ ዓደንሢም ጮኣቁ ዒንጌ፥ ሃጊ ማዓንዳ ዋዞ ጉሙርቃሢሮ። 7 ዬሮ

26:5 26:5 ዳኪ ማዶ 23:6፤ ፒልጲ. 3:5።

ሃገ ማዳንዳ ዋዞ ሄላኒ ታጵ ላምፆ ፃጵ ርኦሪና ዋንቴና ያኦሲ ካኣሽኪ ካኣሽኪ ካፔኔ፤ ካኣቲዮ! ታና ሃሢ ዓይሁዶ ዓሳ ዋጎና ዓይሢሳሢ ዬና ታ ጉሙርቃሢሮኬ። 8 ሃይቁ ዓሶ ያኦሲ ዔቁሳንዳያ ማዒፃ ዋይቲ ዒንሢ፤ ዓይሁዶ ዓሶም ጉሙርቁንቱዋያ ማዔይ?

9 «ታኣኒ ታ ቶኦኪና ናዚሬቶ ዬሱሴኮ ሱንያ ዒዒ ማካንዳያ ኮይሳኔ ገዒ ሚርገ ባኣዚ ታ ማዳኔ። 10 ዬሩሳላሚይዳ ታ ማዳሢ ዬያኬ፤ ቁኤሶኮ ሱኡጎይዳፓ ታ ዔኬ ቢታንቶና ኪሪሰቶሴ ጉሙርቃ ዓሶይዳፓ ሚርገሢ ታ ቱኡሴኔ፤ ዔያቶ ዋደዋኣና ዋዳ ዓሶኮ ማዳ ቃራኬ ታ ገዔኔ። 11 ሚርገ ዋዶ ዓይሁዶ ዓሶኮ ቡከንቶ ቤዘይዳ ዔያታ ማታዳንዳጉዲና ጉሙርቁያዋ ዔያታ ሃሻንዳጉዲ ማሃኒ ታ ማሌኔ፤ ዔያቶ ዑያይዳ ሚርገና ዳጋዲ ሃሃ ማሌ ማሌ ካታዋይዳኣ ዓኣዲ ታ ዔያቶ ዳውሳኔ።

ጳውሎሴ ኪሪሰቶሴ ባንሢ ዋይቲ ማዔቴያ ኬኤዘሢ (ዳኪ. ማዳ 9:1-19፤ 22:6-16)

12 «ዬና ዘሎና ቁኤሶኮ ሱኡጎይዳፓ ጉቤ ማዔ ቢታንቶና ዓይሥሢና ዔኪ ዳማሰቆ ታ ዳንዳንቲ፤ 13 ካኣቲዮ! ጎይይይዳ ዓባ ሳዛ ጫርጋኣና ዓቢ ፖዒዳፓ ባሼ ፖዒ ታ ዘገኔ፤ ዬይ ፖዓ ታናንታ ታኣና ዋላ ዓኣዳ ዓሶናኮ ኮይላ ጫሪንጫፓ ፖዔኔ። 14 ዬማና ኦኡኒ ቢያሢ ሳያይዳ ሎኦሚ ዓኣንቲ ዓይሁዶ ዓጪ ሙኡቺና ሳውሌ! ሳውሌ! ኔ ታና ዓይጎር ዳውሳይ? ገማይ ጫጮ ሚያ * ማሢ ዓኪ ማኣሳናያጉዲ ኔኤኒ ዬያ ዓጩ ሚያ ማሢ ዓኪያና ኔኤር ኔ ማኣሳናኔ» ጋዓ ዑኡሲ ታ ዋይዘኔ። 15 ታኣኒ ማሃፆ ሳዳሢዮ፣ ኔኤኒ ዶናዳይ? ጋዓዛ፣ ጎዳሢያ ታኣም ሂዚ ገዔኔ፡- ታኣኒ ኔ ታና ዳውሳ ዬሱሴኬ። 16 ጋዓንቲ ሃሢ ዔቁ፤ ታ ኔኤም ሃሢ ፔጋዲ ጰዴሢ ታና ኔ ዘገ ጎይያና፤ ሃሃ ሃጋ ሴካ ቤርታ ታ ኔኤም ዳዋንዳ ባኮንታር ቢያ ታኣም ኔ ማዳያና ማርካዳያ ማዳንዳጉዲ ታ ኔና ዶኦራኒ ኮዔሢሮኬ። 17 ኔ ዓሶ ሲሰራዔኤሌ ዳርንታ ታ ኔና ዳካ ዓይሁዶ ማዒባኣ ዓሶንታ ኩጫፓ ታ ኔና ዳቁሻንዳኔ። 18 ኔ ዔያቶኮ ዓኣፖ ቡላንዳጉዲና ዲጥይዳፓ ፖያ ኔ ዔያቶ ኬሳንዳጉዲ ሃሃ ፃላሢ ዳማፓ ያኦሲ ባንሢ ኔ ዔያቶ ማሃንዳጉዲ ታ ኔና ማሃንዳኔ፤ ኔ ዬያይዳሢሮ ዔያታ ታና ጉሙርቁ ፔ ጎሞኮ ማኣሪንቲሢ ዳንቃንዳኔ፤ ያኦሲ ዶኦራዞንሢ ባኣኮይዳ ዒንገንቲ ቤዘዋ ዔያታ ዳንቃንዳኔ» ገዔኔ።

26:9 26:9 ዳኪ. ማዳ 8:3፤ 22:4-5። * 26:14 26:14 ጫጮ ሚያ- ገይንቴዛ ዓይሁዶ ዓሳ ገማይ ጎሽካ ዋዶና ገማታ ሃንታንዳጉዲ ጫርጋ፣ ዶዲሲ ቤርቶ ዓጪሶና ሚሢኬ።

ጳውሎስ ፔኤኮ ማዳ ዛሎ ኬኤዘህ

19 ጳውሎስ ቃሲ ኬኤዘዎ፡- «ዩያር ካኣቲ ዓጊሪጳ! ጫሪንጫፓ ታኣም ሲንገንቲ፡ ጳዴ ባኮም ታ ዓይህንቲ። 20 ጋዓንቲ ቤርታዲ ዴማሰቆይዳ ዓኣ ዓሶ፡ ሄሊሲ ዩሩሳላሚና ዩሁዳ ዓጮናይዳ ዓኣ ዓሶ ቢያህና ሃህ ዩያጉዲ ዓይሁዴ ማዒባኣ ዓሳኣ ገዳ ጎሞ ቡኡፃ ያኦሲ ባንህ ሙካንዳጉዲ ታ ዔርዜኔ፤ ጎሞ ቡኡፃ ዩርዛ ባኣዚያ ዔያታ ማዳንዳጉዲ ዔያቶም ታ ኬኤዘኔ። 21 ዩያይዳፓ ዔቁያና ዓይሁዳ ዓሳ ጌኤዠ ማኣርይዳ ታ ዓኣንቲ ታና ዓርቁ ዎዳኒ ኮዔኔ። 22 ታኣኒ ያኦሲኮ ማኣዲፃ ታ ገዳፓ ዲማዲባኣህረ ዓሲ ዲማሱዎፃ ቢያህም ኬኤዚ ኬኤዚ ሃይማ ሄሌኔ፤ ያኦሲ ማሊያ ኬኤዛ ዓሶንታ ሙሴንታ ቤርታዲ ሃጊ ያዲ ማዓንዳኔ» ጌዔ ባኮ ታ ኬኤዘማፓ ማሌ ፔቲ ባኣዚታፃ ታ ኬኤዚባኣሴ። 23 ዔያታ ኬኤዘህ፡- «ዔሲሄ ማቶ ዓካንዳኔ፤ ሃይቢፓ ዔቁህና ቤርታሳያ ማዒ፡ ሲሰራዔኤሌ ዴርና ዓይሁዴ ማዒባኣ ዓሶናም ዳቁንታኮ ፖዒ ዳዋንዳኔ ጌዒኬ ጌዔኔ።»

24 ጳውሎስ ዩና ኬኤዛ ጎይህ ዓኣንቲ ፒሰያሴ፡- «ጳውሎስ! ዓካሪ ኔ ዣኣሽኬኔ፤ ማርጌ ዔሪፃ ኔና ዣኣሹሞይዳ ጌልዜኔ!» ጌዒ ዳገዲ ኬኤዘኔ።

25 ጳውሎስ ጋዓንቲ ሃዚ ጌዒ ማሄኔ፡- «ባንቲንታ ፒሰያሴ! ጎኔና ፒዜ ማዔ ባኣዚ ታ ኬኤዛፓዓቲም ታ ዣኣሽኪባኣሴ። 26 ታ ዒዛ ቤርቶይዳ ፔጋሲ ኬኤዘ፡ ካኣቲ ዓጊሪጳ ዩያ ዔራንዳኔ። ዩይ፡- ዓኣሽንቲባኣ ባኣዚ ማዔህረ ካኣታህ ዔራንዳህ ታ ጉሙርቃኔ። 27 ካኣቲዮ ዓጊሪጳ! ኔኤኒ ያኦሲ ማሊያ ኬኤዛ ዓሶ ጉሙርቃያቲዎይ? ኔ ጉሙርቃህያ ታ ዔራኔ» ጌዔኔ።

28 ዓጊሪጳ ጳውሎስ ኮይላ፡- «ኔኤኒ ሃይሾ ታና ሃይማካ ኪሪሰቶሴ ጉሙርቃ ዓሲ ማሄኔ ጌይህኬ!» ጌዔኔ። 29 ጳውሎስ ገንህ፡- «ቡኬ ዎዴያ ማፃም ያዶሲ ዎዴ፤ ኔና ሌሊቲዋንቲ ሃኖ ሃያ ታኣኮ ጌኤዘ ዎይዛ ዓሳ ቢያ ሃይማ ታኣኮ ቱኤዘማፓ ዓታዛ ታጉዲ ማፃም ያኦሲ ታ ሺኢቃኔ» ጌዔኔ።

30 ዩካፓ ካኣቲንታ ዓጮ ዎይህህንታ ቤርኒቁንታ ዒዛና ዎላ ዴዒ ዓኣ ዓሶንታ ቢያ ዔቁኔ። 31 ዒማና ኬሰኪ ዔያታ ዴንዲያይዳ ዓኣዎ፡- «ሃይ ዓህ ሃይቃንዳጉዲና ቱኤታንዳጉዲ ዒዚ ማዴ ባኣዚ ፔቲታፃ ባኣሴ» ዎሊ ኮይላ ጌዔኔ። 32 ሃህ ዓጊሪጳ ፒሰያሴም፡- «ሃይ ዓህ ዎንዴ ረሜ ካኣቲ ባንህ ታና ዳኬ» ጌዒባኣቶ ቡሊንታንዳያታንቲኬ» ጌዔኔ።

26:20 26:20 ዳኪ ማዳ 9:20፤28-29። 26:23 26:23 ዒሲ. 42:6፤ 49:6፤ 1፳፫. 15:20።

27

ጳውሎስኮ ሮሜ ዓጮ ዓኣዲያ

1 ዩካፓ ዋኦ ያኣሚሎና ዒፃሊያ ዓጮ ኑ ዓኣዲንዳጉዲ ጌይንታዛ ዔያታ ጳውሎስንታ ማሌ ቱኡሲ ዓሲንታ «ሮሜ ዓጮ ካኣቲኮ ፖኦሊሶ» ጌይንቲ ፓቂንቲ ዓሶ ዓይሣ ዓሶፓ ፔቲሣ ማዔ፥ ዩሊዮሴ ጌይንታ ጃኤቶ ዓሶ ዓይሣሣም ዔኪ ዓኣዲንዳጉዲ ዒንጌኔ። 2 ዩማና ዒሲያ ዓጮኮ ባዘ ዓጮይዳ ዓኣ ሳዖ ባንሣ ዓዲራሚጃዮኔ ጎዖ ቤዛፓ ዓኣዲ ዋኦ ያኣሚሎና ኑ ዳንዳኔ፤ ቲሰሎንቂይዳ ናንጋ፥ ማቄደኒያ ዓጮ ዓሣ ዓሪሰጂሮኮሴያ ኑኡና ዋላ ዓኣኔ። 3 ዚራሎ ኑኡኒ ሲዶና ሄሌኔ፤ ዩሊዮሴ ጳውሎስም ኮሺ ማዔሣረ ጳውሎስ ፔኤኮ ላጎ ባንሣ ዳንዴም ዔያታ ዒዛም ኮይሳ ማኣዶ ማኣዳንዳጉዲ ዓይሣኔ። 4 ዩካፓ ኑ ዔቃኣና ዠባራ ኑኡኮ ቤርታ ዠባርሻያ ማዔሣረ ቆጲሮሴ ጌይንታ ዋኦ ሳዛ ዓኣ ዓጮሎና ካናዲ ኑ ዓኣዳኔ። 5 ከለቂያና ጳንፒሊያ ዓጮ ኮይሎይዳ ዓኣ ባዘና ፒንቂሰካፓ ሉቂያ ዓጮይዳ ዓኣ ሙራ ጌይንታ ካታማ ኑ ሄሌኔ። 6 ዒዛ ቤዛይዳ ጃኤቶ ፖኦሊሶ ዓይሣሣ ዒፃሊያ ዓጪ ባንሣ ዒሰኪንዲሪያ ጎዖ ቤዛፓ ዓኣዲ ዋኦሣ ካኣሚሎ ዳንቃዖ ዒዛ ኑና ቶጊሴኔ።

7 ማርጌ ኬሊ ታሣ ታሣ ኑ ዓኣዲ፥ ማርጌ ማቶና ቂኔዲዮሴ ካታም ኮይሎ ሄሌኔ፤ ዠባራ ጋዓንቲ ቤርቲም ኑ ዳንዲዋጉዲ ኑና ላኣጌሣረ ሲልዋና ጌይንታ ዋኦ ሳዘ ሶርቶሚ ጌሌ ሳዓኮ ኮይለና ጌዒ ዋኦ ሳዛ ዓኣ፥ ቂርጃሴና ካናዲ ኑ ዓኣዳኔ። 8 ዩና ቤዛና ማርጌ ማታዲ፥ ባዘኮ ዓጮማ ዓርቂ ኑ ዓኣዳሰካፓ ላሲያ ካታም ኮይላ ዓኣ «ዠባርና ጉዳሣና ዋኦ ያኣሚሎ ፑርቲሱዋ ኮሺ ቤሲ» ጌይንታ ቤዛ ኑ ሄሌኔ።

9 ኑኡኮ ሃንቲዖይዳ ሌሊ ማርጌ ዎዴ ጋፔሣረና ሙኡዚ ሙዑዋዖ ሺኢቆ ዎዳ ዓኣዳሣረ ሃሣ ዩና ዎዶና ባዚ ገዳ ዓኣዲሣ ኮሺ ፑርታሣረ ዩማና ጳውሎስ ዓሶም፡- 10 «ዓሲዮቲ! ሃካፓ ሴካ ዓኣ ኑኡኮ ጎይዖይዳ ፑርታ ባኣዚ ዓኣሣ ታኦም ጴዳኔ፤ ዩይያኣ፡- ዋኦ ካኣሚሎይዳ ጫኣንጎቲ ባኮና ዋኦ ካኣሚሎናይዳ ሌሊቱዋንቲ ዓሲ ሸምፖይዳኣ ጴኤፒ ፑርታ ባኣዚና ባይሲንታና ሄላንዳኔ» ጌይ ላቲ ኬኤዜኔ። 11 ጃኤቶ ፖኦሊሶ ዓይሣሣ ጋዓንቲ ጳውሎስ ዘርይዳፓ ዋኦ ካኣሚሎ ዒሻሣና ዋኦ ካኣሚሎኮ ዓዳሣና ጋዓ ባኮ ባሺ ዋይዜኔ። 12 ዩና ባዘ ዓጮይዳ ዓኣ ሳዔላ ባርጌ ዎዴና ዒኣካ ዳዓኒ ገኣጉዋያ ማዔሣረ ማርጌ ዓሳ፡- «ኑኡኒ ዳንዲፓፓ፥ ዳንዳዒንቲቶ ኬዶ ዘሎኮ ዓባ ጌላ ባንዖና ሃሣ ዶኦሎ ዘሎኮዋ ዓባ

ጌላ ባንያይዳ ዓኣ ፒንቄ ጌይንታ ቄርዳሴ ዓጮኮ ዋኣፆ ካኣሚሎ ዔቄሶ ቤዘ ሄሊ ዒኢካ ባርጎ ዎዶ ኑ ዓኣሦም» ጌዒ ማሊሢ ሺኢሺኔ።

ባዘ ጉዳሢ

13 ዓባ ኬሰኪ ጌላ ዛሎኮ ደኦሎ ዛሎ ዠባራ ዳካ ዠባርሺም ዔያታ ዛጋፆ ዔያታ ማሌ ጎይፆ ማዔያ ዔያቶም ማላዛ ዋኣፆ ካኣሚሎ ዓርቂ ዔቄሳ ዓንጎ ኮንጮ ቱጊ ዓኣዲፆ ዔቄኔ፤ ዔያታ ዋኣፆ ካኣሚሎ ዔቄሶ ቤዛጋ ዔቄ ባዘኮ ዓጮማ ዓርቂ ቄርዳሴኮ ኮይሊና ዓኣዳኔ። 14 ጋዓንቴ ኔጉዎፆ «ኬዶ ዛሎኮ ዓባ ኬሰኪ ባንያ ዓልጋሢ» ጌይንታ ዶዲ ዓልጋ ዋኣፆ ሳዛ ዓኣ ሳዔሎይዳጋ ዔቄ ዔያቶይዳ ሙኬኔ። 15 ዋኣፆ ካኣሚላ ሂዒንቴሢረ ሃሢ ዠባርዎ ቃዛኒ ዳንዳዒባኣሢረ ዠባራ ኑና ዒሺም ዚቴኖ ጌዒ ኑ ዓኣዳኔ። 16 ዩካጋ ቄዳ ጌይንታ ዋኣፆ ሳዛ ዓኣ ዳካ ዓጪሰኪኖና ካናዲ ኑ ዳንዲቤቃ ዋኣፆ ካኣሚሎይዳ ቱኪንቴ ዓኣ ዋኣፆና ፒንቆ ጎንጊሰኪና * ቶላኒ ዑኬም ሜቶና ኑ ቃዛኒ ዳንዳዔኔ። 17 ዋኣፆ ካኣሚሎይዳ ዓኣ ዓሳ ዋኣፆና ፒንቆ ጎንጌሎ ጎቺ ዔኪ ዋኣፆ ካኣሚሎ ጋር ጌልዘሰካጋ ሱሲና ዶዲሺ ቱኬኔ፤ ዋኣፆ ካኣሚላ ሃሢ ሱሪቴሴ ጌይንታ ዋኣፆ ዳማ ዓኣ፣ ኩሊንቴ ማኣሻላ ዳንዲ ዲዒንቴዋጉዲ ሻራሢ ጌይንታ ዳልጎ ዓፒሎጉዳ ባኮ ኬይሳፆ ኮዔ ጎይሢ ዓኣዳንዳጉዲ ሃሺኔ። 18 ጋዓንቴ ዓልጋሢ ሃሾ ዒፃሢረ ዚሬሎ ዋኣፆ ካኣሚሎ ዑፆይዳ ጮኣኒንቴ ማሆይዳጋ ዛሎ ባዘይዳ ዓሳ ኬኤሪሢረ ዓርቄኔ። 19 ሃይሣሳ ኬሎና ዋኣፆ ካኣሚሎም ኮይሳ ባኮዎ ዔኪ ዔኪ ፔ ኩቻ ዔያታ ኬኤሬኔ፤ 20 ሚርጌ ኬሊ ዓቢንታ ዠኦጎንታ ኑ ዛጊባኣሢረ ሃሢ ዓልጋሢ ዠባርሺፆ ሃሾ ዒፃሢረ፡- «ኑ ዳቃኒ ዳንዳዑዋሴ» ኑ ጌዔኔ።

21 ዓሳ ፔቴታፆ ሙኡዚ ሙዑዎፆ ሚርጌ ኬሊ ዳዔሢረ፣ ጳውሎሴ ዔያቶ ባኣካ ዔቃፆ፡- «ዓሲኖቴ! ዒንሢ ዎንዳ ታ ዒንሢም ጌዔ ባኮ ዋይዚ ቄርዳሴይዳጋ ዔቄባኣያታቶ ሃይ ዋኣፆ ካኣሚሎይዳ ማዔ ባካ ቢያ ዒንሢ ሄሊንዲዎያታንቴኬ፤ 22 ሃሢ ዋኣፆ ካኣሚላ ሌሊ ፑርታንዳኣጋዓቴም ዒንሢዳጋ ፆናይዳኣ ማፆም ባይሲንታ ሄሊንዲዎሴ፤ ዩፎር ዶዲዋቴ፣ ዒጊጪፖቴ፤ ጌዒ ታ ዒንሢ ዘራኔ። 23 ታ ዒዘር ማዒ፣ ዒዛ ካኣሽካ ፆኦዛሢ ዳኬ ኪኢታንቻ ዋንቴ ታ ኮራ ዔቄ፡- 24 ጳውሎሴ ዒጊጪፖ! ኔኤኒ ሮማ ዓጮ ካኣቴ ቤርታ ዔቃንዳፆ ኮይሳኔ፤ ሃይሾ፣ ኔኤና ዎላ ዓኣዳ ዓሶ ቢያ ኔ ጋይቴ ጌዒ

* 27:16 27:16 ዋኣፆና ፒንቆ ጎንጊ፡- ዩኖጉዳ ጎንጋ ማኣዳሢ ዋኣፆ ካኣሚላ ፑርቴያ ማዔቴ ጊዳ ዓኣ ዓሳ ዒዘይዳ ጌሊ ባዛጋ ኬሰካኒ፤ ሃሢ ዋኣፆ ካኣሚሎ ዔቄሶ ቤዛጋ ዳንዲ ዔኤቢ ዒዘና ዔኮያኬ።

ጾኑሲ ሃይቢዳፓ ዳቀሻንዳኔ» ጌቢ ታኣም ኬኤዘኔ። 25 ዩያሮ ቢንሢ ሃይ ባሳ ደዲዋቱ፤ ጾኑሲ ዩያ ታኣም ኬኤዘ ባኮ ቢያ ኩንሣንዳሢ ታጉሙርቃኔ። 26 ማዕቶዋ ዠባራ ኑና ዔኪ ፔቴ ዋኣሢ ሳዛይዳ ዓኣ ሳባኮ ዓቺዳ ኬኤራንዳኔ» ጌቤ።

27 ታጾ ያይዳሳ ዋንቶና ዓዲሪያ ባዘይዳ ዠባሮና ሂባንቲ ሴካ ሃንጋ ኑጌቢ ጌቢ ዓኣንቲ ሳዖኮ ጊዲሚሺ ማዓዛ ዋኣዖ ካኣሚሎይዳ ማዳ ዓሶ ኮራ ሳዖ ባንሢ ዑኬያ ማሌ። 28 ዩያሮ ባዘኮ ዔታዲያ ሚዒ ዛጎ ሱዞ ዔያታ ዓጋዛ፣ ባዘኮ ዔታ ሳሊታሚ ዋዳ ማዒ ጴዴ፤ ሃሣ ዳካ ናጋዖ ዛጎ ሱዞሎ ዔያታ ዓጌም ላሂታሚ ዋዳ ማዒ ጴዴ። 29 ዋኣዖ ካኣሚላ ባዘ ዓጮይዳ ዓኣ ሹጫ ዓኣዲ ዲይንቱዋጉዲ ዔያታ ቢገጪ፣ ዋኣዖ ካኣሚሎኮ ጊንዖ ዛሊና ዋኣዖ ካኣሚሎ ቃዛንዳ ያይዳ ዓንጎ ኮንጮ ሊካ ዓጊ፣ ዩካፓ ዲማ ካራንዳጉዲ ሺኢጸሢ ዓርቄ። 30 ዋኣዖ ካኣሚሎይዳ ማዳ ዓሳ ዋኣዖ ካኣሚሎይዳፓ ኬሰኪ ዴንዳኒ ኮዔያታሢሮ ዋኣዖ ካኣሚሎኮ ቤርቶ ዛሎና ዓንጎ ኮንጮ ሊካ ዓጋያ ማሊ ዋኣዖ ካኣሚሎይዳ ዓኣ ዋኣዖና ፒንቆ ጎንጌሎ ባዘይዳ ኬኤሪ። 31 ዩማና ጳውሎሴ ጻኤቶ ፖኦሊሶ ዓይሣሢና ፖኦሊሶና ኮይላ፡- «ሃኣታ፣ ዋኣዖ ካኣሚሎይዳ ማዳ ዓሳ ዋኣሊንቂዖ ሃሺ ዚቲ ጌቢ ዴቢባኣቶ ቢንሢ ዳቃኒ ዴንዳዑብ» ጌቤ። 32 ዩያሮ ፖኦሊሳ ዋኣዖና ፒንቆ ጎንጌሎኮ ሱዞ ቲቃዖ ዋኣዖይዳ ጉሪ ቢዛ ሴካ ሃንጋ ጋዓንዳጉዲ ሃሺ።

33 ሳባ ካራኒ ዑካዛ ቢያሢ ሙኡዚ ሙዓንዳጉዲ ጳውሎሴ ዔያቶ ሺኢቃዖ፡- «ፔቴታዖ ሙኡዚ ሙዑዋዖ ቢንሢ ካፓንቲ ሃና ቢንሢኮ ታጾ ያይዳ ኬሊኬ። 34 ዩያሮ ቢንሢ ሙኡዚ ሙዓንዳጉዲ ታ ሺኢቃኔ፤ ዩይያ፡- ቢንሢም ዋልቄ ደዲሻንዳኔ፤ ዓይጌንዴጉዴ ፑርታ ባኣዚ ፔቴታዖ ቢንሢዳ ሂላዓኬ» ጌቤ። 35 ዩያ ጌቤሰካፓ ካሣ ዔኪ ቢያሢኮ ቤርታ ጾኑሲ ጋላታዖ፣ ቡንዒ ሙዒሢ ዓርቄ። 36 ዩማና ቢያሢኮ ቢና ማዕም ደዲ ሙዖ ሙዔ። 37 ዋኣዖ ካኣሚሎይዳ ኑኡኒ ዓኣ ዓሳ ቢያላምዖ ጻኤታና ላንካይታሚ ላሆኬ። 38 ዩካፓ ቢያሢ ሙዒ ሚሸካዖ ዋኣዖ ካኣሚሎይዳ ጫኣንጌቲ ዛርጋሢ ባዘይዳ ኬኤሪ ዋኣዖ ካኣሚሎ ዴኤዖ ባኮ ሺሌዒሴ።

ዋኣዖ ካኣሚሎኮ ማቂዖ

39 ዩማፓ ሳባ ካራዛ ዔያታ ሄሌ ቤዘ ዔያታ ዔሪባኣሴ፤ ጋዓንቲ ማኣሻላ ዓኣ ባዚ ዓቺ ዔያታ ዴንቄ፤ ዩያሮ ዔያቶም ዴንዳቢንቲቶ ቢዘ ባንሢ ደጪሳኒ ማላዖ፣ 40 ዓርቄ ሱዞ ቲቂ ዓንጎ ኮንጮ ባዘይዳ ሃሺ፤ ዩማና ሃሣ ጊንዖ ዛላ ዓኣ፣ ዓጊሢ ዓጊሢ ቢሺ ዔኪ ዓኣዲ ዳልጎ ያዶዘ ሚዖኮ ሱዞ ቡሊ፣ ቤርቶ ዛሎና ዓኣ ዳልጎ ሻራሢ

ዠባር ባንሢ ጰጊዲ ባዞ ዓጮ ባንሢ ከሰካኒ ዔያታ ዓአጰኔ።
41 ጋዓንቴ ዋአዖ ካአሚላ ዋአዖ ዴማ ዓአ ኩሊንቴ ማአሻሎይዳ
ዲዒንቴ ቤርቶ ዛሎና ሊካ ደቁንቴ ዓጊጹዋያ ማዓዛ። ጊንዖ ዛሎና
ጋዓንቴ ጉዳሢዳፓ ዔቁያና ካአሚላ ሜቁሢ ዓርቁኔ።

42 ቱኡዞ ዓሳ ጹቢ ፒንቁ ቶሉዋጉዲ ፒንቃኒ ጌዔቶ ዔያቶ
ፖኦሊሳ ዋዳኒ ማሌኔ። 43 ያኤቶ ፖኦሊሶ ዓይሣሢ ጋዓንቴ ጳውሎሴ
ዓውሳኒ ኮዔሢሮ ዬኖ ፖኦሊሶኮ ማሊዖ ዔኤዖ ዒዳ፣ ጹቢ ዔራ
ዓሳ ቤርታዲ ዋአዖ ካአሚሎይዳፓ ባዞይዳ ኮአሚ ጌሊ ጹቢ ጹቢ
ፒንቃንዳጉዲ ዓይሣኔ። 44 ሃሣ ዓቴ ዓሳ ዋአዖ ካአሚሎኮ ዲማ
ዲማ ሜቁዖንታ ዳልጎ ላሻሢ ሚዖንታ ዓርቁ ዓርቁ ፒንቃንዳጉዲ
ዓይሣዛ ዬያይዲ ቢያሢ ኮሺና ሳዖ ሄሌኔ።

28

ጳውሎሴ ማልታ ጎዖ ዋአዖ ሳዛ ዓአ ዓጮይዳ

1 ዬካፓ ኑኡኒ ሳዖ ኮሺ ሄላዖ ኑ ሄሌ ሳዔላ ማልታ ጌይንታያ፣
ዋአሢ ሳዛይዳ ዓአ ዓጪ ማዔሢ ዔራኔ። 2 ዬኖ ዋአዖ ሳዛ ዓአ
ዓጪሎይዳ ናንጋ ዓሳ ሚርጌና ሄርሺሳ ኮሺ ማዳ ኑኡሞ ማዳኔ፤
ዬማና ዒርዚ ዋርቃያታሢሮ ጨኢዠሮ ጌዒ ታሚ ዔኤሢ ሄና ዔያታ
ዔኬኔ። 3 ጳውሎሴ ዒማና ሻርሻ ሃአኪ ዔኪ ታሞይዳ ዓጋንቴ፣
ሉ ታሞኮ ዖይዳይዳፓ ዔቁያና ፔቴ ሾኦሺ ሻርሻፓ ከሰካዖ ኩጮ
ዳይ ዓርቁኔ። 4 ማልታ ዓጪሎይዳ ዓአ ዓሳ ጳውሎሴኮ ኩጮ
ሾኦዣ ዳይ ዓርቁሢ ዴንቃዖ፡- «ሃይ ዓሢ ጎኔና ዓሲ ዋዳ ዓሲኬ
ጌይሢኬ! ዓይጎር ጌዔቶ ባዞ ጉዳሢዳፓ ኮሺና ቶሊ ከሰኬቶዋ
ኑኡኒ ጎኦሲ» ጌዒ ካአሸካ ፒዜ ዋጋ ዖአዛሢኮ ዋጊዖይዳፓ ቶሊ፣
ናንጋኒ ዳንዳባላሲ» ዋሊ ኮራ ጌዔኔ። 5 ጳውሎሴ ጋዓንቴ
ሾኦዣሢ ታሞይዳ ዉጹርቁ ዓጌኔ፤ ዒዛ ፔቴታዖ ዋኦቴ ባአዚ ባአሲ።
6 ዓሳ ጋዓንቴ፡- «ኔጉዋዖ ሃሢ ዑፃ ዒዛኮ ኪፃንዳኔ፤ ሃሢ ዒዚ
ዔርቴባአንቴ ሃይቃንዳኔ» ጌዒ ካፔኔ። ጋዓንቴ ሚርጌ ዋዴ ዔያታ
ዬያይዲ ካፔሞ ፔቴታዖ ዋኦቴ ባአዚ ባአዖ ማዔሢ ዛጋዖ ማሊዖ ጊንፃ
ላአሚ፡- «ሃይ ዓሢ ዖኦሲኬ!» ጌዔኔ።

7 ዬኖ ኑኡኒ ዓአ ቤዜሎኮ ኮይሎይዳ ዋአዖ ሳዛ ዓአ ዓጪሎ
ዋይሣዖ ማዔ፣ ፑፒሊዮሴ ጎዖሢኮ ሳዓ ዓአኔ፤ ዬይ ዓሢ ፔ ማአራ
ኑና ዔኪ ሃይሣ ኬሊ ቃራሲ ሾኦቹንሣኔ። 8 ዬማና ፑፒሊዮሴኮ ዓዴ
ቆሢና ደርዖ ደርዖ ሃርጌሞ ላሂ ዓአንቴ ጳውሎሴ ዒዛ ባንሢ ጌሊ
ሸኡቁ ኩጮ ዑፃ ጌሢ ዓሢ ፖዒሴኔ። 9 ዬይ ያዲ ማዔሢኮ ጊንፃ
ዋአዖ ሳዛ ዓአ ዓጪሎይዳ ናንጋ ሃርጊንቴ ዓሳአ ሙኪ ፖዔኔ።

10 ዓሳ ሚርጌ ኑኡሞ ዒንጎ ባአዚ ዔኪ ሙኪ ኑና ቦንቻያ ማዒያ ዔርዜኔ፤ ጊንሣ ዋአዖ ካአሚሎና ኑ ዓአዳኒ ዔቃአና ኑም ኮይሳ ባኮ ቢያ ዋአዖ ካአሚሎይዳ ዔያታ ጫአኔኔ።

ጳውሎሴኮ ሮሜ ዓጮ ሄሊዖ

11 ሃይሣ ዓጊኒ ማልታይዳ ኑ ዴዔሰካፓ ባርጎ ዎዶ ዒዛ ቤዘይዳ ዴዒ ዓአሢ። ዒሰከንዲሪያ ዓጨር ማዔ ዋአሢ ካአሚሎ ቶጊ ዓአዲዖ ኑ ዔቁኔ፤ ዋአዖ ካአሚሎሎኮ ሱንፃ «ሚንቴ ማዔ ዖአዘ» ጌይንታያከ። 12 ሲራኩሴ ጌይንታ ካታሞ ኑ ሄላዖ ዒአካ ሃይሣ ኬሊ ዴዔኔ። 13 ዩካፓ ባዘ ጊዶ ኑ ሃንቴ ሬጊዩሜ ካታሞ ሄሊ ዒአካ ፔቴ ኬሊ ኑ ዴዔሰካፓ፣ ዶኦሎ ዛሎ ዠባራ ዠባርሼሢሮ ላምዓሳ ኬሎና ፑቴዮላሴ ካታሞ ኑ ዓአዳኔ። 14 ዒዛ ቤዘይዳ ኪሪሰቶሴ ጉሙርቃ ዓሶ ኑ ዴንቃዛ፣ ኑ ዔያቶና ዎላ ላንካይ ኬሊ ዴዓንዳጉዲ ዔያታ ሺአቁም ዴዔሰካፓ ሮሜ ዓጮ ኑ ዓአዳኔ። 15 ሮሜ ዓጮይዳ ዓአ ኪሪሰቶሴ ጉሙርቃ ዓሳ ኑ ዛሎ ዎይዛዖ ዓፒዮሴ ቦኦኮ ካር፤ ሃሣ «ዎርቆ ቤሲ ሃይሣ» ጌይንታ ቤዘ ኑና ዔካኒ ሙከኔ፤ ጳውሎሴያ ዔያቶ ዴንቃዖ ዖኦሲ ጋላቴ ዶዴኔ።

ጳውሎሴ ሮሜ ዓጮይዳ

16 ሮሜ ዓጮ ኑ ጌላዛ ጳውሎሴም ፔቴ ዒዛ ካፓንዳ ፖኦሊሴ ዒንጊንቴሰካፓ ዒዚ ፔኤኮ ናንጋንዳጉዲ ዓይሢንቴኔ።

17 ሃይሣ ኬሊኮ ጊንፃ ጳውሎሴ ሮሜ ዓጮይዳ ናንጋ ዓይሁደኮ ዴኤፖ ዴኤፖ ዓሶ ዔኤሊሴኔ፤ ዔያታ ሙኪ ቡኩሰካፓ ሂዚ ዔያቶም ጌዔኔ፡- «ዒሾንሢዮቴ! ዒሰራዔኤሌ ዴርና ዓዶንሢ ዎጎናይዳ ታ ማዴ ዳቢንቴ ባአዚ ፔቴታዖ ባአሴ፤ ጋዓንቴ ዩሩሳላሚይዳ ታአኒ ቱኡቴ ሮሜ ዓጮ ዓሶም ታ ዒንጊንቴኔ። 18 ሮሜ ዓጮ ዓሳ ታና ዖኦጮሰካፓ ሃይቢም ታና ዎጊሳንዳ ባአዚ ዴንቁባአሢሮ ጉሪ ታና ሃሻኒ ማሌንቴ፣ 19 ዓይሁደ ዓሳ ታኦኮ ጉሪ ሃሻንቴዖ ዒፃም ማሌ ታ ዎኦታንዳ ጎይሢ ባይቁሢሮ፡- «ሮሜ ካአቴ ባንሢ ታና ዳኩዋቴ» ጌዒ ዖኦጮኒ ታ ዴንዳዔኔ፤ ማዔቶዎ ዴር ታኦኮ ታ፡- «ዎጌና ዓይሢሳንዳኔ» ጋዓ ባአዚ ባአሴ። 20 ሃሢያ ታ ዒንሢ ዔኤሊሴሢሢ ታ ዒንሢ ዛጋኒና ዩያአ ታ ዒንሢም ከኤዛኒከ፤ ታአኒ ሃያ ካኖ ቢራቶና ቱኡቴሢ ዒሰራዔኤሌም ዒንጊንቴ ሃጊ ማዓንዳ ዎዘ ዛሎናከ» ጌዔኔ።

21 ዔያታ ሂዚ ጌዒ ማሄኔ፡- «ዩሁዳ ዓጮይዳፓ ኔ ዛሎ ባአዚ ዳኪንቴ ኪኢታ ኑና ሄሊባአሴ፤ ሃሣ ሃካ ሙከ ናሶይዳፓ ፔቴ ዓሲታዖ ኔኤኮ ፑርቱሞ ሃይሳቴ ከኤዚባአሴ። 22 ኔኤኒ ሃኖ ካአሻካ

28:19 28:19 ዳኪ. ማዳ 25:11።

ካኣገፍሎ ደማ ደማ ቤዘይዳ ዓሳ ማኪ ዒፃያ ማዕሢ ኑ ዔራኔ፤ ዩያር ኔ ማሊፃ ሃሢ ዓይጎታቴያ ኑ ዔራኒ ኮሳኔ» ገዔኔ።

23 ዩካፓ ዋይዘንዶ ኬሊ ገሣዖ ሚርገ ዓሲ ዒዚ ናንጋ ማኣር ሙካዛ፣ ዒዚያ ጉቴይዳፓ ዴንዲ ዒባኒ ሄላንዳኣና ያኦሲ ካኣቱሞ ዛሎ ማርካዲ ማርካዲ ፔኤኮ ዓኣ ማሊያ ዔያቶም ፔጋሴኔ፤ ሙሴ ዔርዜ ዋጎና ያኦሲ ማሊያ ኬኤዛ ዓሶ ማፃኣፖናይዳፓ ዔኪ ዔኪ ዩሱሴ ዛሎ ዔያቶም ኮሺ ዔርዚ ኬኤዜኔ። 24 ፔቴ ፔቴ ዓሳ ዒዚ ኬኤዛ ቃኣሎ ጉሙርቄኔ፤ ሃንጎ ዓሳ ጋዓንቴ ጉሙርቄባኣሴ። 25 ዔያታ ሃሣ ማሊያ ዋላ ፔቴ ማሂ ገኢጉዋዖ ደማዲ ዴንዴኔ። ጳውሎሴ ዒማና ጋፒንሢ ሂዚ ገዔኔ፤ «ዓያኖ ጌኤዛ ያኦሲ ማሊያ ኬኤዛ ዒሲያሴ ዛሎና ዒንሢኮ ዓደንሢም ኬኤዜሢ ፒዜኬ፤ 26 ዒዚያ ኬኤዜ ቃኣላ፡-

ሃያ ዴር ባንሢ ዓኣዲጋፓ
ዋይዚ ዒንሢ ዋይዛኔ፤ ጋዓንቴ ዒንሢ ጳቂሱዋሴ፤
ዛገ ዒንሢ ዛጋኔ፤ ጋዓንቴ ዒንሢ ዒና ዔኩዋሴ ዔያቶም ገዔ።

27 ዓይጎር ገዔቶ ሃያ ዓሶኮ ዒና ደጩኔ፤
ዋያኣ ባይቄኔ፤ ዓኣፓኣ ዔያቶኮ ዴኡሚንቴኔ፤

ያዲ ዔያታ ዋንዴ ማዒባኣያታቴ
ዓኣፖና ዔያታ ዛገ
ዋዮናኣ ዔያታ ዋይዚ
ዒናና ሃሣ ጳቂሲ
ታ ባንሢ ዔያታ ማዔም
ታ ዔያቶ ዓውሴያናንዳኔ፤ ሂዚ ጋዓሢኔ።።

28 «ዩያር ያኦሲኮ ጳቂንቶ ኪኢታ ዓይሁዴ ማዒባኣ ዓሶም ዳኪንቴሢ ዔሩዋቴ፤ ዔያታ ናሽኪ ዔካንዳኔ።።»*

30 ጳውሎሴ ዒዚ ሚኢሾ ጨገ ጨገ ዋርቃ ማኣራሎይዳ ላምዖ ሌዔ ቢያ ዴዒ፣ ዒዛ ባንሢ ሙካ ዓሶ ቢያ ሾኦቲንሢ ዔካኔ፤ 31 ያኦሲኮ ካኣቱሞ ዛሎዋ ኬኤዚ ኬኤዚ ሃሣ ጎዳ ዩሱሴ ኪሪሶቶሴ ዛሎ ዒዛ ላኣጋ ዓሲ ባኣያ ማዒ ጫርቄ ዔርዛኔ።

28:27 28:27 ዒ.ሲ. 6፡9-10። * 28:28 28:28 ፔቴ ፔቴ ሚናኣ ማፃኣፓ፡- ፓይ. 29ይዳ «ጳውሎሴ ዩያ ኬኤዜሰካፓ ዓይሁዴ ዓሳ ዒናፓ ማርሚ ማርሚ ዒኣካፓ ኬሰኪ ዴንዴኔ» ሂዚ ጋዓያ ቃሲ ያኣፓኔ።

ጌሌዢ ማጻፋት

**The Holy Bible in the Maale language of Ethiopia,
using Ethiopic script**

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማጻፋት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023

bbcfb90a-3ae3-5452-983d-6c4c02375929